



皇明名臣琬琰錄卷之十

后集

前監察御史練公墓志銘

綱

王文肅公

傳

公諱綱字從道姓練氏蘇之長洲人高祖貞元浙江行樞密院都事曾祖文達海道萬戶府總管祖則成洪武初由春坊司直改河南道御史以直言授旌賞考哲封監察御史母王氏文靖公汝玉之女贈孺人公在童孺時已有鉅人志長而嗜學通春秋宣德乙卯領鄉薦其名在第二會試入胄監歷事都察院正統乙巳英廟親征北虜未還景帝監國尋卽大位時京師擾攘人心洶洶廷臣雖職居臺諫亦莫敢昌言國是公據古證今上中興要務八條一曰謹天變二曰急先務三曰正軍法四曰布恩澤五曰廣言路六曰屏奸邪七曰公薦舉八曰察羣吏其大要謂中興與創業無異因敗爲成轉禍爲福惟在君心一轉移之間冬十月虜寇進逼京城公復上勤王急務謂虜勢猖獗非直要求金帛而已未必不欲效金人以汴宋待我也然我國家興圖之廣倉廩之實甲兵之利

固非宋比然求其人种師道李綱輩亦未多見乞遴選武臣授以方畧俟其深人乃奮擊之卽敕邊將勒兵內向邀其歸路設有倡爲和議緩於武備且請南遷以圖偷安者卽爲姦臣宜急加誅以爲眾戒疏入上感悟命施行之且奇其才可任風紀卽日授公浙江道監察御史明年景泰改元上時政五事皆一時安攘之計辛未奉璽書巡視兩淮鹽課權貴爲之斂戢壬申還朝賜宴光祿寺以示優異尋以邊境未寧虜情叵測上軍國大計八條皆見嘉納時吏部缺尚書上命舉可稱任者公率同官言左都御史王翱嚴公峭直右副都御史年富操履端方大理寺卿薛瑄持正不回此三人者擇而用之庶能品藻人才追蹤王直公於是召王翱爲吏部尚書以年富爲戶部而薛瑄亦繼大拜三載賜敕命有式克振勵不忝厥官之褒先是京師有警兵多離次遣使四乃召募丁壯聚之勇敢營歲久逋逃者眾大臣請治其罪編之尺籍公上言召募之初旣諭以大義復許以事定遣歸故健夫勇卒雲集京師爭

先自效旣而淹留日久恩寵未及饑寒迫身勢必逃避且皇上嘗體天地好生之仁於犯大辟者尚原其死俾隸尺籍何至使應募無辜之民與之爲伍刑賞失中莫此爲甚方今水旱相仍流亡接踵萬一事例太重搜求太急致生事端爲患非小兼之邊務尚殷急於用武他日復有召募誰其肯從上是其言悉詔不問義勇得復於民者數千人甲戌巡按福建時官臺山民聚爲盜渠魁未獲而逮繫脇從公至釋之趣師勦捕且追咎其典守者於是與眾相忤按察使楊珏乃誣摭公於朝當道亦多忌公遂左遷陝西邠州判官再徙甘州前衛經歷部符未下而公已丁外艱歸吳自是絕意功名葺復舊業於尹山之陽爲終焉計建思菴於先塋之側塑先賢范文正公文信公像於中語人曰初吾自分得用於時當學范公否則爲文公死爾今兩失之奉其遺像以見吾志識者憫焉公賦性剛毅不肯屈下好善之心雖切而嫉惡太甚事有不可雖達官貴人亦面折之不爲少容以故立朝未久一斥不復亦其勢

然哉春秋七十有六以成化丁酉三月廿三日卒配徐氏封孺人子男四莊莘華莖孫男七元輔元佐元亮元齡元睦元桂元弼公初葬徐孺人於吳縣鳳凰山先塋亦自預爲壽藏至是莊等奉柩以戊戌三月二十二日窆焉先期奉河南陽武訓導陳頌狀來請銘予與公同朝最故故序而銘之其辭曰

練在成周官有世功暨其後人代濟顯融不隕益封延畀於公惟公才雄式克自奮憂國奉公讜言危論爰求其中有源有本曷不究施卒於困頓鸞鳳伏竄鴟鴞翔翔從古已然於今奚傷公道在人厥聲惟懿太史作銘垂千百世

脊菴彭先生傳助

葉文莊公盛

先生彭氏名勛字祖期別號脊菴宋御史中丞思永十二世孫也系出唐安定王後吉州刺史玘始居廬陵山口六世祖司農少卿少英從文天祥起兵勤王始遷今永豐故今爲永豐人曾祖貴德以書經試不偶乃業醫濟人家有種德堂蓋期待其子孫所以識

也祖景忠父叔敏先生生有異質七歲日記數百言嘗從鄉父老入佛寺獨不拜寺僧強之不從反叱之曰彼佛裸跣不衣冠我何拜爲人大奇之父聞私語之曰爾能力學以繼前聞人乎卽應聲曰吾能之於是遣從里儒曾以南游大通四書理經之旨年廿六登永樂乙未進士第念親老乞教職就養得南雄府教授在官凡得一美衣食必先奉親諸生化服其爲教以經書熟讀講解爲先作文次之每選諸生之尤者聚一室同飲食躬爲訓導至終其任不替造就甚多雲南鄉試聘爲考官驛舟抵廣南界有稱臨安府生求見贄以黃金先生笑卻之三日復尾其後因怒叱左右禽其人不得既至方鎮諸公禮待甚厚凡場屋事一惟先生言是聽乃知黔國公晟都帥昂二公以考官多私是科則各使人偵之獨先生嚴不可犯故爾九載赴吏部以急闕仍除建寧教授績效如南雄有許宗道者以醫畫爲權要所嬖因中傷官民人諂事之按察副使王增刷卷來卧疾道中許一女孫飲人家而寘轎於生員游

亨門亨歸怒毆其轎夫許銜之卽以游氏父子魘魅入誣且以其居近童五郎祠爲證增人其言遂眞亨父叔七人重罪俱就繫平民因神而下獄者四百餘家且以增素敬先生恐先生直其誣并讒先生不得見一日官吏聚指增言茲事不枉人畏其威皆曰然先生獨立而言游氏非巫者五郎非邪神初捐地築城人也事載郡志大人勿信讒眾駭愕而退少選召送志書人乃大愧悔盡釋無辜增亦卒正統元年以少傅楊公士奇薦召拜監察御史提督南畿儒學師道卓然教條畢立寬嚴得體一時東南士風翕然振起己未廷試三甲魁選悉出先生至今論南畿提學必以先生爲第一嘗辦嘉定縣民朱行等三人非謀殺人建平縣民陳良二陳文二等十五人非強盜眾服其明教官有持身不謹者卽就黜揚州安慶知府不稱皆劾罷之又幾九年以內艱去起復拔授考功郎中先是司府州縣及雜職等官考滿當黜陟者雖公罪但經納贖亦從私罪降用不報爲私過者有罰先生謂此不合公罪不降

律巡檢倉庫稅務河泊等官犯笞杖罪者不論其功績卽於原授資級降用先生謂此合從當升資級降庶不違定制而前官文過譁然相攻以爲行之年久卽爲例不宜遽更部堂爲大閱洪武永樂中已行卷牘一如先生言譁者始服至於吏胥厯役多弊言者方多法以繩之得罪者相繼先生謂法出奸生若不爲定規易守將攬撓不已乃自入奏詔可之俾部堂議條例以進考功爲之一清獨趙侍郎者頗怙勢自用與先生不合嘗面以言誘之先生應之曰勛所知守成憲以合公論耳若徇時干位非素志也遂奏先生學行雖優疏於吏牘宜調爲郡不報已而竟用闕補山東按察副使士論不能平王文端公雖極知重先生而亦莫能主也未幾有己巳之變廷議以先生可用乃敕簡練軍壯固守城池督造軍器送京營於是不憚出入之勞雖荒崖絕島必親歷以伸冤宣澤爲已任屢抗攘外安內之疏直言不隱如是者又四年以老疾自陳不許巡撫者再爲之奏始得歸時景泰癸酉年僅六十四先生

正學直道確然自守壯老一致不爲流俗所惑南雄學後舊有小
祠肖一女子中坐每稱之云靈甚學官弟子恆設祭先生初至家
人詹暴卒有爲之私禱遂安明日先生令積薪祠前躬寘火焚之
後屢見光怪有勸復之者拒不納怪亦尋息嘗奏言釋氏云凡人
平生所爲之惡皆可修齋懺脫道經有云不忠君王不孝父母姦
私邪淫之罪亦可誦經而卽滅夫人之爲惡明不天討幽有鬼神
而曰齋醮可滅豈理也哉且修齋起於梁武設醮起於林靈素固
非盛世可傳之典誠世之大害宜漸除之及毀去天下不係叢林
寺院停給僧人度牒勒令年少僧尼還俗禁止剏立菴寺修齋設
醮庶治道可復所至拳拳以名教爲事若建寧胡文定蔡九峯真
西山輩勅尊賢堂秩祀之官如漢五更桓榮大司農朱邑吳將周
瑜宋范文正公胡安定歐陽公朱文公游定夫元高郵守李齊等
墳祠皆爲修建又嘗言堯舜禹湯文武周公之道非孔子刪述六
經垂憲萬世則其道無傳所謂集羣聖之大成也濂洛關閩之學

非朱子注釋六經而哀集諸子之言則其學不明所謂集羣賢之
大成也今朝廷於孔子至矣而朱子建寧舊宅有祠無祭子孫身
服徭役誠非所宜乞定議褒崇幸甚疏入公議是之近年增入從
祀者多大賢之後累加恩典先生有以導之矣所著有詩文若干
卷山東郡邑通志勝覽等集藏於濟南書傳通釋傳學者又嘗集
朱夫子以下讀書規範名曰讀書要法若干卷

門人葉盛曰先生剛方正直道大而才高觀其在學校在執法在
考功皆有成蹟而獨不爲時宰所容大都可知已使當時處先生
而得其宜則所以發揚經訓丕變斯文不猶有可望者乎昔張子
厚浙東按獄明道先生特疏懇留彭先生則旣冒不嫻吏牘之詆
矣乃猶以一察官之亞僕僕走塵埃中迨老且休不聞有明道者
出一言留之先生亦不遇也哉先生亦不遇也哉

康齋先生行狀

與彌

婁訓導

先生姓吳氏始祖諱兢汴州人唐睿宗時累遷諫議大夫七世孫

諱宣娶蜀主孟昶女徙居撫州子孫因家臨川之種湖高祖諱景南號南窗工詩吳文正公序其集曾祖諱審號楚江博學詞藻清麗祖諱涇號逸愚徙居崇仁之蓮塘父諱溥字德潤號古厓國子司業剛介自守所爲詩文有古厓集母裴氏先生以洪武二十四年十二月十二日生逸愚夢祖墓一藤盤旋而上問墓傍一老人此爲何藤答曰攀轅藤翌日先生生因名夢祥長諱與弼字子傅號康齋繼母鄭氏先生資稟英異八九歲時已負氣岸讀書鄉校巋然有立侍親京師習舉子業科第可期矣永樂己丑年十九一見伊洛淵源錄道統之傳心慨慕焉及覩明道一嘗有獵心乃知聖賢之必可學遂棄舉業謝絕人事獨處小樓日玩四書諸經洛閩語錄收斂身心沈潛義理視世之所尚舉不足爲其志直欲造乎聖賢之域其詩曰九仞始一簣千里方跬步又曰誠當通鬼神志當貫金石蓋不下樓者二年辛卯冬以用工過苦致疾遂還鄉遭風幾覆眾皆驚怖失措先生還正襟危坐舟定問其故曰吾守

正以俟耳居鄉動必以禮或謂其迂或哂其僻先生介特凜然不少變於俗蓋其涵養體認功深而力定已如此每省親大學粗衣敝履人莫識其爲司成之子里閭之人多橫逆弗與校益厚其德久從其化中歲家益貧衣食不給風雨不蔽躬親稼穡手足胼胝非其義一介不以取諸人好學之篤不知晝夜寒暑雖在途或夜分或枕上亦默誦精思無一雜念敬義夾持明誠兩進自強不息日新程課毀譽欣戚不一動其心古之聖賢嘗形諸夢寐昨非今是日改月化門人胡九韶歎曰先生可謂日進無疆者矣先生剛毅疾惡慕明道之和易凡遇逆境必加含容用力既久渾然無復圭角之露然當風頽俗靡之中壁立萬仞非剛毅不能也深慨嗜利者多師道不立四方來學者卻其束脩雖饑寒切身有所不顧嘗語學者曰吾平生得患難進了學九韶曰惟先生遇患難能進學在他人則惰志矣嗚呼天所以困窮拂鬱其身蓋欲堅志熟仁而勝大任也及其工夫貫徹不怨天不尤人動靜語默之間莫非

鳶飛魚躍之妙其事親則致其孝親心或有不順負罪引慝終亦
底豫幼失所恃事繼母如所生待異母諸弟友愛慕篤夫婦之間
未嘗有惰容接朋友以誠敬講論義理每忘寢食待親賓隨其所
遇不强其所無間有寒士欲就學者克已爲義而館穀之惟恐人
不入於善歲凶餓孛相枕勸諭富民發廩賑濟全活者甚眾里有
灌蔭溝池久涸爲田率鄉人開墾修築之人有所賴倡明正學遠
近尊信皆知崇禮義斥異端惟恐不遵其教爲恥先生於世味淡
然年十九嘗從楊洗馬學見先生器識超卓未嘗以弟子禮相待
情義極厚洗馬位居保傅屢寄聲於先生竟無一字相達先生道
益高譽益廣天下仰之縉紳尚德之士累上章褒薦俱引疾弗起
天順元年十月忠國公石亨上疏論先生學行之高士類爲之矜
式朝廷宜禮聘至京崇以祿位俾展嘉猷英宗皇帝允其言遂遣
行人曹隆齋詔兼禮幣起先生于家十二月行人奉詔至小陂二
年三月上道五月壬寅至京欽授左春坊左諭德先生上疏辭職

上召人文華殿從容顧問尋遣使賜紗羅羊酒柴米續奉聖旨朝
廷久聞高誼特用徵聘今惠然遠來朕甚嘉悅然幣以將誠官以
命德禮非過也不充所辭士友咸勸先生就職先生曰淺陋之學
衰病之軀豈堪任使苟就職便須屹然風采動於朝端方不負天
書期待之重豈敢爲竊祿之官甲辰再疏辭職奉聖旨固知本心
不干仕進亦不煩以究務特處以宮僚之職不必再辭戊申學士
李賢請旨召先生入內閣講中庸已酉三疏懇辭奉聖旨固辭雖
得難進之義揆之中道無乃過乎欲觀祕書可勉就職丙辰先生
令子槩赴吏部告疾部以疾聞上知先生終不可以強留畧有允
辭之意七月庚寅四疏終辭奉聖旨既年老有疾不能供職准辭
丙申進封事十策一曰崇聖志二曰廣聖學三曰隆聖德四曰子
庶民五曰謹命令六曰敦教化七曰清百僚八曰齊庶政九曰廣
言路十曰君相一德同心己未召人文華殿上眷注無已丁酉纂
修書籍資以銀幣給以月廩復遣行人王惟善送歸仍賜詔褒嘉

以示拳拳之意先生既辭上命內臣傳旨敕行人惟善曰天氣近寒吳與彌年老一路好生看顧莫教他費力上之眷遇亦云至矣先生拳拳愛君之誠豈不欲行其所學以繼二帝三王之治願乃懇辭者蓋有不得已焉耳已卯九月遣門生車泰進謝表辛巳冬先生適楚拜舊師楊少傅之墓壬午春適閩拜朱子考亭以申平生慨慕之懷已丑十月十七日卯時以疾卒享年七十有九先生閒氣所鍾挺然獨立無所傳聞道甚早其爲學也尊德性以極乎道體之大道問學以盡乎道體之細反躬實踐隱顯一致其成德也人欲靜而氣宇和大本立而達道行知足以周萬物道足以濟天下其心歉然未嘗自以爲足也先生風格高邁議論英發善啟迪人聽其言者莫不踴躍思奮恆舉程子之言勵學者曰言人當以聖爲志言學當以道爲志言進修不可躐等必先從事於小學以立其基然後進乎大學以極夫體用之全讀論則以博文約禮爲要孟子則以求放心充四端爲本中庸則謹乎存養省察之功

以致中和之極明太極以知性之原究西銘以識仁之體易宗程朱而鄙後學新奇之說書則古文雖致朱子之疑或者以爲僞書而刪之先生以爲古文雖平易而義理亦精深固不得而去取也朱子詩解已無餘蘊春秋則本程子而資胡氏之發明三禮則講而習之以見聖人品節之精嘗歎宋末以來箋注之繁率皆支離之說眩目惑心非徒無益而反有害焉故不輕於著述異端雜說不接於目俗儒之說一覽而得失瞭然理明義精也程朱之言不忍釋手心契道合無古今之異也所爲文皆積中發外之實清明峻潔曲折迂紆讀之使人自然興起詩則本乎性情原於義理優柔雄渾有盛唐興致目錄紀日新之功發自得之蘊大小楷得晉體自成一派而妙於造化天文地志律厯醫卜罔不究其說若先生可謂全人矣嗚呼紫陽沒後世道統無傳所尚者文詞訓詁功名利達而已先生奮乎百世之下覽前迹而啟其任道之機遠續關閩之絕學誠曠古之豪傑也平生歷患實多務學甚苦竟不獲

少試於時惜哉先生始居石泉宣德戊申居小陂正統庚申居種湖祖基二載而復居小陂成化八年十月乙酉葬本邑羅原岡娶五峯陳氏子一人藥女三人長適豐城胡全次適同邑饒循幼承臨川饒協先生沒有年矣藥以諒受學門下俾狀先生之行顧諒之淺陋何足形容萬一特述聞見之梗槩以詔後世云謹狀

貞先生私諡議

孫

王文肅公

撰

儒君子經德不回卓行不忒以正己而率人者必其能深明理道洞徹事機判是非得失之途嚴內輕外重之分而聲利不能移形氣不能桎故以守則固以行則篤總萬善而探其本歷萬變而不失其正非如後世匹夫單人執小諒負偏行以成名而立方者其所就固淺淺矣而謂其可以輔倫導俗以師表於人乎哉明故廣東道監察御史致仕廬陵孫先生天賦真醇學力懇到行義著於州里材名播於都邑始領江浦教事再陟松江郡學閱二十年履繩蹈墨正模定範暨登憲臺兼總學政列郡遵化多士向方恤民

生之孳臻於饑饉則憂勤之念形於奏疏瞻聖駕之未返於沙漠則忠憤之心發於聲詩及夫請老而歸人斯仰止疾亟而終斂襟待盡若先生者可謂一息尚存終始不離於正者矣然先生性至孝奉二親務得其歡心在松江時嘗控騎郊迎以樂親之就養及御史績成遂銜恩歸省以榮上褒封母喪未除哀毀不輟父年及耄色養不違郡守欲薦聞於上邦人率觀化於下卒之身沒而父以壽考終若先生者可謂敬而能安安可能也卒為難矣先生沒既五年而壹惠之典未舉至是門人之在朝者以為知理之正而守之弗去者本天德之貞循仁之愛而行之不拂者全人性之孝此先生之善之大而可取以為謚者也翰林侍讀學士雲間錢溥先生之高弟也既為文以表其墓謂俛嘗辱先生之教盍申眾議而定謚焉與今郡守程宗亦嘗親炙於先生者使併刻石墓上庶過之者知尊其名而仰之不替不亦可乎僉曰可遂合而謚之曰貞孝先生云謹議

皇明名臣琬琰錄卷之十

皇明名臣琬琰錄卷之十一

后集

禮部侍郎章恭毅公神道碑銘

綸

尹侍郎直

南京禮部侍郎章公既薨之四年其孤南京禮科給事中玄應除喪來告於朝曰臣之先臣綸卒蒙遣官諭祭有司營葬寵終之恩渥矣第贈若諡未荷賜馬惟陛下哀憐嘉與之以假寵於章氏而覆蓋其遺脣天子曰噫茲予忠讜之臣也卹典其可弗備乃贈南京禮部尚書諡恭毅官其季子玄會爲鴻臚寺主簿玄應兄弟旣祇謝退而詣予曰先臣幸具蒙卹典矣惟是墓道之石未有刻詞敢以請予惟恭毅公之所以忠於朝聖天子之所以眷於公足爲忠義者勸宜有以著之初景泰元年英宗皇帝歸自北狩尊爲太上皇別居南宮今上在儲位又明年乃易兩宮疏隔嫌隙茲萌災異荐臻人心危懼廷臣無敢以言者時公爲儀制郎中特陳修德弭災十四事一畏天戒二任變理三養聖躬四節幸御五務儉約六勤論政七惇孝義八慎賞賚九重名爵十革巡撫十一擇重臣

十二辯異端十三卻貢獻十四汰冗官其畏天戒大意謂內臣不可干外政佞臣不可假威福後宮不宜盛聲色凡爲陰盛之類請悉革罷其悖孝義則謂上聖皇太后皇太后爲天下母受天下養可謂尊養之至矣然必躬修問安視膳之禮乃盡尊養之誠太上皇帝君臨天下十有四年陛下向嘗親受冊封爲臣子是天下之父也至是以天位授陛下尊爲太上皇是天下之至尊也每月朔望及歲時節且宜率羣臣朝見於延安門以極尊崇之道而又復舊皇后於中宮以正天下之母儀復舊皇儲於東宮以定天下之太本如此則倫誼篤而和氣充天意自回災意自弭矣疏上忤旨下公錦衣衛獄刑逼誣引大臣并南宮通謀榜掠慘酷體無完膚濱死者數卒無一語及他惟御史鍾同先嘗有言故并逮之俱欲重坐會天大風雨黃氣四塞刑乃少緩明年秋大理卿廖莊入朝亦以嘗請復儲杖於闕庭因命杖公與同至百同死公幾絕復生禁錮愈嚴公了無懟悔意越二載英宗復登寶位今上還正儲官

首錄公忠出之獄嘉歎良深遂升禮部右侍郎一時自王公而下至里兒巷婦皆嘖嘖歎頌不容口曰天祐忠義何若是其較然也公諱綸字大經姓章溫之樂清南閩里人其先出閩王審知大傳仔鈞第七子南唐靜邊指揮使仁政之子賁徙自浦城凡幾世元湖州德清典史諱開宗本北閩吳氏來繼章後公之高祖也曾祖諱性祖諱新民考諱文寶字叔珍號西源世有潛德祖父咸以公貴贈南京禮部右侍郎祖妣妣俱贈淑人公資稟殊常六歲失恃甫成童卽刻勵好學不事生業年十八丁父憂哀毀踰禮旣冠郡守何公文淵選補郡庠弟子員親爲之講授以詩經中正統戊午鄉薦明年會試第三人廷試賜進士出身給告畢姻時西源尚在殯公葬畢而後娶還朝授南京禮部主事景泰初升禮部儀制郎中適國家多故公知無不言言無不盡首稱增會試取士額次言太平十六事累數千言俱準議行北虜也先索使通好公言宜暫結往來之盟以待天時人事之至車駕欲幸大隆福寺公言以萬

乘之尊臨異端之地傳之後世誠非美事又因災異請下詔求致
災之由上示撤樂減膳之敬下推捐俸救荒之仁節濫賜之費罷
補官之奉慎差遣之擾備義倉汰僧徒諸事皆剴切明年遂以言
及禍矣其後佐禮部益侃侃不回天順二年山東水守臣請蠲租
未允公爲請得減其半宗室有被火盜乞振卹該司沮以無例公
言朝廷重親親宜出特恩遂賜金五百兩南京禮部闕卿佐廷議
屬公上面諭公曰根本重地非卿不可事有當言具以來聞賜白
金二十兩文綺二表裏以行四年調南京吏部八年今上嗣位有
司奉遺詔百日外請行大婚禮公言山陵尚新元朔未改百日從
吉心實不安釋服公除在前代固有常制諒陰婚娶於今日不忍
隨宜乞特諭禮部來春舉行時雖迂公言識者韙之成化紀元又
陳救荒四事四年奉詔考察南京官吏與都御史高明議不協遂
劾之并斥御史部屬數十人五年以星變求避位不許尋升南京
禮部左侍郎六年告歸展省踰歲還任十年丁母包氏憂將起復

遂乞休致許之家居創祀先祠及校定時祀拜謁儀節居家雜儀
爲子孫規宅西構重屋以皮圖籍日坐其上觀書覽勝東構小軒
瞰嶼西泉石時從賓客觴詠其中給事嘗得拜慶稱壽姻族咸集
公劇飲大醉歌吟笑呼甚樂也十九年三月二十二日以疾終於
正寢先是宅前山巖崩摧聲振林谷公歎曰吾其當之歟至是果
然配朱氏累封淑人母儀婦道閨門楷則前九年卒與公合葬於
橫嶼山子男二長卽立應朱出由進士授今職次卽立會庶也女
一孫男六嗚呼正統之末社稷非景帝未知如何一時安攘之功
卓矣所不韙者易儲一事耳使當時廷臣有能直諫以身殉之則
儲未必易後有繼公連章僉諍必從乃已則儲可必復正月十七
日之變亦何自而萌奈何獨公憤發一言遂罹楚毒豈意生全復
躋顯位以功名考終而榮及後人忠義之報何如哉蓋公孝友樸
淳剛方坦易學問該洽遇事敢言然皆政教大體匪訐匪誣厥後
景帝拒絕讒間全護兩宮其亦終有悟於公之言也夫彼棘蠅市

虎權鷹奸犬之輩徒猥瑣細故而於宗社安危綱常淪斃略不語及者皆公之罪人也漢汲長孺之剛直宋魯宗道之骨鯁杜祁公之勁氣直節以公方之亦奚媿哉春秋有大美惡不厭其詞重複肆余於公之忠讜始終言之其他文與行有過人者皆可略銘曰人臣事君忠讜是摠弼違繩正敢意全軀正統之末景泰之初疇資眾善國幸無慮久安易玩乃惑佞諛謂儲可易斯為永圖兩宮嫌間倫誼寢疏有列言責誰伏青蒲侃侃恭毅獨矢厥謨曰茲孝友政教權輿矧惟國本厥位可虛請復元良以敬天渝過不憚改庶免渝胥惟是逆耳遽罹孽拘備嘗楚毒屢絕而甦天久乃定雲開日舒英皇復辟今上復儲乃釋公繫深加獎譽乃貳宗伯橫金紆朱始終一德不斲其觚袞闕是補綱常是扶南都簡佐帝命公徂曰匪均逸庸示楷模事有可言予惟汝俞荐更兩曹益勵廉隅功成勇退燕申泊如探奇覽勝觴詠為娛巖傾谷震神游清都後昆繼美卹典尤殊墓道有石螭首龜趺惟公學行宜不一書太史

刻詞略其緒餘獨揭一忠以愧鄙夫越山可夷浙水可淤恭毅之名天壤與俱

侍郎廖恭敏公言行錄

莊

尹侍郎直

廖莊字安止江西吉水人進士歷仕宣德成化間官至刑部左侍郎卒年六十三贈尚書諡恭敏

公幼時卓詭不凡弱冠中江西鄉試宣德五年林震榜進士八年選工科庶吉士十年擢刑科給事中正統六年陝右饑命往振之公率以便宜從事賴以全活甚眾比還多所建白時東里楊公當國家人有不律者公率同列抗章論其不職或曰獨不為楊公地乎曰此所以報公也八年大理寺官屬悉以事坐累命公署寺事踰月擢大理左寺丞十一年升南京大理左少卿景泰五年上疏請朝謁南宮及加恩禮於今上大意謂仕中朝十餘年間見上皇臨朝遣使册命於廊邸歲時令朝臣謁賀於東廊恩禮隆洽羣下感動今上皇臨居南內問安侍養大聞曠闕是非所以篤忠愛友

梯之誼慰天心而召和氣也且上皇之子猶子也宜令親近儒臣講明經義輔成德器以端國家之本以繫天下之心由是忤旨明年丁母憂入見命撻於廷幾死明日謫河州定羌驛丞與曳就道天順元年英廟復位召還爲大理左少卿時母服未闋聞外艱遂以情自陳命賜祭營葬蓋特恩也服闋調南京大理寺五年升南京禮部右侍郎七年調南京刑部成化改元御史有言公於朝者公引咎請老上獨知其故斥不聽而遷公刑部左侍郎且曰莊大節可取公益竭誠奉職踰年以疾不起上聞悼惜遣官賜祭有司治葬事贈刑部尚書諡恭敏公爲人直易表裏怛然性剛急詞氣激烈少不當意輒面折已則釋然雖間爲深機者所中率不能自易也廣廷大議棘棘不撓及以言被罪名稱藉甚四方想聞其丰采然不子子爲異飭細行以取譽接對士類不見有纖毫貴勢態尤甚於鄉里故舊營護拯拔極其力之所至賓至卮酒豆肉輒與爲懽無一食不對賓客旣爲法官所親或勸稍謝往來遠嫌議公

笑曰昔人有言臣門如市臣心如水吾無愧吾心而已沒之日無以爲歛鬻居第供費歷時不能售鄉之仕於朝者相與哀助假貸以佐之於是足以見公之平生蓋賢於世之深情厚貌事邊幅者遠矣故河東文靖薛公謂公於議論知識獨能得其遠者大者真知言哉並彭教撰墓志尹直贊曰知識遠大胸次坦平早列諫垣歷贊司刑昌言讜議人紀天經孰謂鳴陽乃致批鱗廷撻幾隕旣償乃興大節可取天語褒榮章鍾同傳聯炳汗青

監察御史鍾公言行錄

楊尚寶 廉

鍾同字世京江西永豐人第進士歷仕景泰閒官御史以直諫死錦衣獄年三十二天順初追贈大理寺左丞世京飽庭訓踐孝友培忠義之基厚矣景泰庚午領鄉書明年登進士拜貴州道監察御史風采壁立嘗因待漏與儀制郎中章公綸期論易儲事願獻狄梁公之誠脫受比干之慘無所憾詞氣嚴正繼之以泣綸亦慨然以身許之某年某月某日公疏上言宗社之本在儲位宜復不

宜緩兼陳一切弊政聞者毛竦咸度事年難破勢重莫移躋其朝陽鳴鳳而危其手犯逆鱗既而綸疏隨入并收下錦衣獄某年月某日公死焉蓋知其國不知有其身也英宗復辟下詔謂其忠誠義氣貫於金石追贈奉政大夫大理寺左寺丞官其長子啓知縣當今皇上亦謂其死於忠義詔祿其妻羅氏官其次子通政司知事先是世京遺骸猶在園土啓陳情乞得歸葬浪田之陽頻年鵲巢邱木累產白雉喙距紅而異常人以爲精神所感故名其地爲忠義鄉

利也天道義也君臣首揭三綱攸敘五倫凡厥有生罔不同具蚩蚩眾人氣拘物蔽三五凝精惟公獲粹中兮虛靈善兮由備載帥以志載充以氣允矣讜言天下大計旬然雷霆弗驚弗懼猗與那與孰不有死林林總總草木萎靡龍逢比干雖死不死於昭上帝乃眷乃顧湛恩龐洪爰及後裔巍巍泰華中柱天地耿耿列星垂耀萬世高明撰御史鍾同之死刑部侍郎林鶚之好禮其烈與嚴

美矣名臣贊錄

兵部尚書程襄毅公墓志銘信

劉文和公

成化己亥秋九月二十有七日南京致仕兵部尚書兼大理寺卿休寧程公卒於正寢有司以訃聞詔贈太子少保諡襄毅遣官諭祭營葬朝紳咸曰公一代人豪而今已矣可惜雖然朝廷於其生加以穹秩於其休寢以璽書於其沒優以卹典且有象賢之子昌大其業是公雖死猶不死可謂無遺憾矣既而其子敏政慟謂予曰先生交先君子三十餘年僕又曾聆先生一日之教茲墓中志銘敢以爲託乃志曰公諱信字彥實世居徽之休寧其先聞臣大儒載在簡冊可考高祖諱社元至正末用薦者起爲承奉班都知不赴曾祖諱吉輔兩世妣皆吳氏祖諱社壽國朝洪武中謫居河間考諱晟俱以公貴贈兵部尚書兼大理卿祖妣汪氏妣張氏俱贈夫人公以易經中正統辛酉順天府鄉試明年第進士授吏科給事中己巳英廟北征公偕廷臣上疏諫止不報已而師潰土木

虜遂南侵京師戒嚴命公守西城上言五事曰新號令以振軍威
募勇敢以備警急召勤王以遏南侵設武備以防內變養銳氣以
備戰守皆見采納虜酋也先自西山一帶進薄都城都督孫鏗禦
之失利乞領眾入城公堅持不可躬督諸軍自城上以火鎗礮石
鼓譟爲鏗援虜引去景泰改元命公充副使持節冊封華陽王妃
凡王府有餽遺悉卻之歸升左給事中辛未九月英廟還自迪北
居南宮公復上中興固本十事曰敬天求賢納諫謹災節用詳刑
選將練兵尚儉隆師而敬天一事則當時天象屢變請景泰帝隆
孝友之實以答天心之仁愛聞者壯之王申升山東右參政總理
遼東邊餉巡撫都御史奏倉官吏卒盜糧石以上者死乃造新斛
視舊加二寸付公公立碎而火之曰使彼真盜死不足卹今故爲
此斛置人於死地豈情也哉遼卒至今能道其事會以憂去轉四
川分巡所至問民疾苦松潘夷人作亂公偕侍郎羅綺進攻破其
黑虎諸寨天順丁丑英廟復辟公奉表入賀時方錄景泰閒上言

之人遂畱公爲太僕卿遼東巡撫缺員陞公都察院左僉都御史
賜敕以行守將海盜伯董興姻聯曹欽公一切裁之以正又造戰
車創義倉行贖罪法設月輪簿凡百號令一新建州夷酋董山潛
結朝鮮公使土官佟成授以成算往廉之得朝鮮授董山中樞院
使制書以還公疏曰乘其未發急遣二使問之可伐其謀朝廷迺
命一給事往朝鮮一錦衣譯者往建州兩酋初不肯承出制書示
之咸相顧愕然各貢馬謝罪虜酋孛來聚眾欲入寇自率師巡邊
營於境外者凡三月得風溼之疾自此始都指揮夏霖事多不法
與董興相結納僉事胡鼎按其罪四十公以狀聞詔中官及錦衣
郭指揮逮霖而籍之不意中途受賂乃奏虛實相半都御史寇深
因併劾公輕聽胡僉事言調南京太僕少卿刑部缺堂上官廷臣
言非公不可召升右侍郎尋以憂還河間今上皇帝卽位起復公
於兵部又轉左成化丁亥四川貴州山都掌蠻據大壩山箐之險
叛服不常升公尚書提督軍務與襄城伯李瑾統番漢兵討之公

至永寧自督大軍入金鷲池又分四路兵期會於大壩將士依公方略用神銃勁弩攻賊賊不能支連破二千餘寨獲銅鼓數十斬首五千級生禽二十餘賊復走入深洞公命軍士以土石窒其門以兵圍之月餘賊死洞中臭聞十餘里又陰察九姓土獠之附於賊者還師撲之未及載都掌悉平又布置衙門邊事以定凱還進兼大理卿有白金綵幣襲衣之賜前此公營大壩凡兩月淫雨不時瘴癘荐興舊恙復作至是四上疏請老俱不允辛卯春上以雨雪不降求言公上言兵事可更張者四兵弊可伸理者五詔下所司執政者難之未幾三邊有事悉如公言所料南京缺參贊機務大臣廷臣交章薦公爲宜上允所請公至南京適彗出軒轅乃與六卿合議復上言興利除害三十餘事多見諸行他若汰貪縱修舊典可書者尚多在南京參贊已四載復疏乞休上重違公志賜敕還鄉有疾若去體其勿久安於家之語明年公還休寧里第又四年謝世距其生則永樂丁酉閏五月十六日得壽六十有三葬

邑東南南山之原配林氏累封夫人子男三長卽敏政成化丙戌進士及第授翰林編修累升左春坊諭德學行爲時所嘉次敏德太學生次敏行孫男三壩圻塏嗚呼公儀觀魁偉性資剛果六籍百子無不涉獵爲詩文略不經意而雄渾可傳事親孝少時嘗力耕以養居憂廬墓側有芝產之瑞教子弟嚴而有方待內外親族恩義兼盡遇故人子矜恤振拔惟恐不及凡百玩物一不以挂目爲諫官知無不言言必達大體而嫉惡太嚴佐兩藩及法司必以敬正輔長官不隱忍坐視以爲賢掌兩京兵政及征伐俱有成績又能任怨南京守臣或欲預錢穀詞訟公曰守備機務所以謹非常若此乃有司之事也斷不可預論者以爲得體征川貴時詔以便宜之權付公公自發兵至凱還不爵一人不殺一人同事者以爲言公曰刑賞人主之大柄懼闖外事不集而假之人若幸而事集又竊弄之豈人臣之道也論者又曰此古名臣之心名臣之言可以爲後世法若今敏政輩進進未已能昌大其業安知天之報

公不在此耶號晴洲釣者有晴洲集若干卷藏於家銘曰
於惟襄毅晉臣之系宋儒之裔豪傑其才剛大其氣於昭襄毅

科第高登祿位馴致兵刑聿司留後是寄果哉襄毅車轍所至吾民獲

勞勞我獨易易不數言閒能決大議偉哉襄毅車轍所至吾民獲
利威震蠻夷名揚畱世無憂襄毅文事武備有人承繼誕昌前列
自而弗替無憾襄毅善始令終皇恩特異歸於南山垂休千祀

興化知府岳君墓志銘

葉文莊公

英宗皇帝既復辟宥密之臣累出親擢其第五人則吾友燕山岳
君正也君固奇士而王吏部忠肅公又嘗亟稱其賢上雅重之君
亦自幸魚水之遭凡所陳請所撰述所對答竭盡忠盡多稱旨一
日湯序言變異將以占法進云姦臣未盡之故上以問君君叩首
曰姦臣未聞求之將人人自危况序術疏淺宜不足信上悅時石
曹二猾勢方張君虞其將來必不靖因極言於上前且退而面開
導之使爲保全計二猾雖陽喏好辭中實銜之蓋未幾君之禍作

矣上猶惜君甚止出爲欽州同知既又追及逮繫責成甘肅之鎮

夷二猾尋踵敗上惻然有思曰岳正言是也召還將復有所用而

龍馭上升矣成化初君居母憂服闋御史有言當亟召用君以勸

忠詔仍元職吏部言當調南京有旨其勿調命充經筵講官纂脩

本朝實錄適兵部清黃官缺部院大臣會薦君遂以成化元年四

月俾知興化府以行君在官生財惠民始謹而終服號賢守有

司者或不知禮君君迺有歸志歲己丑來朝請致仕家居越三載

爲成化八年九月十一日疾卒得年五十五公卿以下皆往弔哭

莫不嗟悼曰岳先生亡矣君字季方別號蒙泉畿內灤縣人曾祖

德甫祖思銘父興懷遠將軍輕車都尉府軍衛指揮同知母太淑

人劉氏君少年已能學有名二十一領鄉薦卒業太學正統戊辰

會試同考誤寔落卷中侍講杜濩獨驚其文以爲此吾輩中人遂

占首選廷試第三名授翰林編修景泰三年升右春坊贊善兼編
修天順初元改修撰是年六月被命入內閣參預機務及其得罪

去僅一月耳君偉貌美髯言論灑灑動循矩度居家孝弟交朋友有始終之誼平生性剛而志高抱負經濟不輕屈下人有古豪傑之風石曹事或迂議之且以未信爲言直應之曰何得以諫官處我我道當如是其篤於自信如此人有不可意事雖權貴人當言卽言之無宿藏而人不之察以故愛君者雖多卒不能勝夫嫉君者之屢也配宋氏孺人側室周氏子男二增堂皆天女六長許嫁而卒已嫁者婿朱景生員李經翰林編修李東陽餘未行君之學精博旁熟莊騷至方外度數諸書無所不窺所著經解務出新意多儒先所未發惟深衣纂誤成書文章有類博稿若干卷書法晉唐可名家嗚呼美才如君卽特置華要先皇帝之明也中間蹇連坎坷有若不堪處者然觀君今日之金緋在躬考終牖下自非先皇帝今皇帝之明且仁則雖欲得此難矣若是者在君其亦可以無憾哉以卒之年十一月十一日葬祖塋之側君之兄端府軍千戶祥哀君無子率猶子坪培均垣墉長號嚮予乞銘予爲作銘慰

答之亦以慰君於地下焉爾銘曰

古有李白其人亡嗣亦有柳州擯斥以死其名之長弗繫乎此侍郎葉文莊公言行錄盛

楊尚寶廉

葉盛字與中直隸崑山人第進士歷仕正統成化閒官至吏部侍郎卒年五十五諡文莊公授兵科給事中己巳之變公率同列劾將臣扈從者失律敗事請誅夷之以謝天下然後選將練兵以復不共戴天之讐如此則大綱以正大義以明時邊境未寧大臣有奏畱邊將守京師者公言今日之事邊關爲急往者獨馬營不棄則師何以陷土木紫荆白羊不破則騎何以薄都城急宜遣固守宣府居庸爲便已而河南陳州流民扇動命公往視公卽兼程以進除貪虐振饑寒民用安輯

景泰元年八月北虜送駕還京將入關矣有隱名具帖言迎復事者大臣見之顧忌不敢舉公曰此野人無情之言達於上感動必

矣或沮以匿名書公不顧且疏言之有旨令尚書胡濙封進帖雖畱中而正論有不泯焉

遷山西布政司右參政協贊獨石等處軍務先是獨石馬營八城遇虜失守殘破未復公列其利害可興革者爲八條以進次第罷行之八城旣設暖鋪以便行旅均蔬圃以給將士制度品式纖悉備具而又請官銀五十兩買牛千餘頭摘戍卒不任戰者俾事耕稼歲課餘糧於官凡軍中買馬勞功恤貧諸費皆於是乎取給自是邊人歡洽歲亦屢登以外艱去擢右僉都御史巡撫兩廣公乞終制不允至廣興利革弊尤盡厥心請許鹽商計鹽多寡入米餉邊而後出境公私兩利之

八年北虜出沒河套爲西邊患有言增兵守險者有言大舉搜套驅出河外沿河築城堡抵東勝徙民耕守其中者公爲吏部侍郎受命往議方略奏言搜河套復東勝此皆事勢所難惟增兵守險可爲遠圖宜令守臣剴削邊牆增築城堡收新軍以實邊選土兵

以助守此不但可責近效而亦足爲長便也從之

公溫雅簡重崇道誼尚名節言動思古人居家惇孝友莅官清慎勤恪設施不苟與僚友論事不激不隨其取人先行檢而後才藝終不及人之過公退手不釋卷考古辯疑殆忘寢食而於世俗聲色財利之好澹然不以經心惜乎大用未究遽卒

顯允文莊萬夫之特博學宏詞忠言遠識君子焉依樂善無斃給事青瑣以登憲職撫綏朔南保釐勿失吏禮之貳德音秩秩希文不相古今所惜

彭韶贊

皇明名臣瑤琰錄卷之十一

恭順侯忠壯吳公神道碑銘

李文達公

皇明名臣瑤琰錄卷之十二

恭順侯忠壯吳公神道碑銘

天順辛巳逆賊曹欽謀為不軌

潛俟七月二日早朝入內為亂恭

順侯吳公先於是夜一鼓聞之即與其弟廣義伯琮約總兵懷寧

伯孫鏗走詣長安門告變於是禁門不啓賊計遂窮舉火燒禁門

公等率兵勦殺奮不顧身賊雖誅滅公已捐軀矣嗚呼先機告變

公之忠也殺賊喪元公之勇也然則逆賊之敗豈非公之功乎皇

上聞公之歿哀悼殊深輟視朝一日追封涼國公諡忠壯凡祕器

諭祭賻儀之類悉從厚典復命有司為營冢壙以安葬之蓋痛念

勳戚之臣為社稷而死故報功之典倍徙尋常也既而琮詣予泣

且告曰先兄不幸歿於鋒鏑茲欲立石墓前以白於世非先生之

文不可辭弗獲按通政司參議趙君昂之狀公諱瑾字廷璋其先

西涼人祖諱允誠永樂中累以戰功封恭順伯父諱克忠嗣伯爵

洪熙初以戚里恩進封恭順侯正統甲子以征虜功加太子太保

洪熙初以戚里恩進封恭順侯正統甲子以征虜功加太子太保

已巳秋禦寇北邊力戰而死追封邠國公諡壯勇母楊氏封邠國夫人叔父克勤官至左軍都督府左都督亦同兄沒於陣追封遵化伯諡僖敏公生而英銳襟度爽闊親賢好善未嘗以門第驕人以故縉紳士大夫樂與之游相與議論古今講說道義而公頗能識其旨趣尤嫻武藝精騎射方其父叔禦虜之際公亦在陣中發矢射虜洎父叔矢盡而亡公始就執其酋長念公忠義之後釋之乃還京遂嗣父爵天順改元皇上復位公以勳戚隨侍應對稱旨自是日備顧問賚予甚厚尋命理左軍都督府事公益感激夙夜效勤一旦遭變委身則其允蹈忠義視乃父乃叔爲無媿矣公生於永樂癸巳十二月一日享年四十有九配李氏故會寧伯之女有淑行封侯夫人生子男三長曰鑑次曰鏞次曰錫遵化公之子卜以是年八月某日葬公於順天府房山縣之新莊從先兆也銘曰。

世祿之家忠義無幾有若吳門展也無比彼美忠壯虎視耽耽

化之姪邠公之男忠以捐軀壯以禦侮相繼如歸光照中土飾終追榮惟帝之恩匪帝之私惟以報勳闋矣泉宮西山之麓祕器旅陳穹碑載陸仁者有後公則成仁銘以貞之何千萬春

左都御史寇莊愍公神道碑銘

深

李文達公

賢

都御史乃糾慝繩違之任總憲度肅百僚權奸之所最忌者寇公居是職五年矣持法嚴明見逆賊曹欽父子兄弟恣意妄爲乃率御史劾之欽等遂行反逆首害公賊雖誅滅公命殞矣朝廷震悼特贈少保諡莊愍加賜賻儀遣官諭祭令有司爲營安葬蓋深念任事之臣遭此凶禍而恤典宜厚也其子林泣且告曰先人不幸弗獲全歸而墓石之銘不可以無託敢固以請辭弗釋按知府張杻狀公諱深字文淵其先山西渾源人世多顯宦曾祖廣仕元爲提舉有才行見寵於世祖爲擇宣寧縣黑虎之乾河里俾居之至國朝洪武初以閭右給省檄過保定唐縣止連頤莊見其風土之美因占籍焉今爲保定人祖彥和父禮俱以公貴贈資善大夫都

察院左都御史祖妣宋氏妣李氏俱贈夫人公自幼警發永樂中爲郡庠生上言時務朝廷奇其人召入胄監時山東要路軍需錢穀有弊政遣中貴人陳保孫往廉之求國子生精敏者同事得公甚喜宣德初擢刑部主事有勤能之譽尋升員外郎丁外艱服闋復任益盡心刑獄凡疑獄人不能辯者必屬公正統甲子用執政薦升山西按察司副使時天久不雨朝廷念刑獄有冤抑者特委公錄山西諸郡大辟囚公察其情有矜疑者五十餘人悉奏釋之又上邊務數十事多見采納丙寅四川松潘夷不靖守臣請出師勦之朝廷念撫治者非其人乃命廷臣推有風力者僉謂公可卽日召至京師拜都察院右僉都御史以往遂破賊寨禽其渠魁送京師諸番讐伏獻盛甲刀劍三千童男三十七人駿馬四百餘匹繼後人貢不絕公暇則撫恤士卒相地要害築關堡城池六十處道路險峻者咸削平之以便儲運番夷酋長或率其黨來見公宣布朝廷威德且諭以享福之道莫不感化地方底寧朝廷嘉公之

能進左副都御史加食二品祿綵幣白金之賚甚厚一日得母報平安書潛然出涕曰老母在堂久曠定省安能爲懷卽上章懇乞終養朝廷優詔慰而畱之景泰辛未召公還特加獎勞番人乞畱者十有七奏不從未踰月提督遼東軍務缺人廷議復屬公遂假公以便宜之權賜白金綵幣慰勉以往公至遼左威名益振乃積糧練兵畫防禦守備之計中外守臣咸敬畏之海賊李福挾妖術以惑山東之民聚眾萬人公得報略不改容乃親率數百騎直抵海州遣都指揮周英授以成算捕之遂獲千餘人公詰其造亂之由得首惡者二十餘人械至京師餘皆釋之景泰甲戌北虜入境會總戎得公所議巡邊之策因其勢便斬賊首七十餘級獲馬六百餘匹公在邊歲久思親益切或與同事者言及母老輒流涕終日不食累上章乞歸不允丙子得還京議邊事時母年九十有四已感風疾曰吾得見吾兒卽瞑目矣公悲泣懇求歸省至家母一見而逝公哀毀踰禮朝廷起公復任乞終制章凡三上不允天順

改元皇上復位乃許公終制時臺長缺人思臣僚中老成剛勁無
踰公者復起公視事進左都御史公威望日隆百僚敬憚上深嘉
之寵賚優厚嘗召公咨訪政務但加老字於姓上呼之而不名蓋
重公也公天性至孝雖居顯仕惟以不得養親為歉諳於世故凡
本朝舊典歷歷能記聽獄能斷人服其明未老即以家事付林綜
理曰吾受朝廷重託惟職務是盡餘不恤也生於洪武癸酉五月
七日歿於天順辛巳七月二日得壽六十有口配李氏累贈夫人
生子男三長即林國子生次彬次桂卜是年十一月二十四日與
夫人合葬於連頤西岡之陽銘曰
惟錐在囊穎脫斯見惟楠在壑昂霄可羨彼物且然而況於人惟
人之傑眾孰與倫侃侃寇公早有大負厥歷仕途才智稱首兩鎮
邊陲邊塵不揚人總臺憲大振朝綱賊奸忌之竟為所害恤典有
加遺澤未艾惟孝與忠在公則崇有志不餒名位攸隆墓碑峩峩
昭此行實永閔泉臺曷其有極

姚冢宰誄并序

夢

楊文懿公

守陳

成化九年二月九日太子少保兼吏部尚書桐廬姚公墓於長安
里第其子兵部郎中璧奉柩以歸嗚呼哀哉公諱夔字大章正統
中鄉試省試皆第一遂為進士擢吏科給事中英廟北巡國勢方
岌岌羣臣議尊景泰帝公贊其決虜犯都城符召遼宣二藩掎角
賊駭而遁公預其謀超陟南京刑部右侍郎轉禮部被命考官雲
南三載奏績畱任禮部景泰帝疾甚其部之長在告公強之出率
百官詣闕問安退集東閣公倡言復太子眾翕然議定俄而英廟
復位時方征苗又誣獄連襄府懼有變迺詔班師慰王中外大安
蓋公之策也既而不悅於用事者復遷南京無何上思其忠驛召
至京拜禮部左侍郎轉吏部尋陟禮部尚書國家頻歲多吉凶大
禮或常或變公皆據古酌今裁定允當嘗知貢舉剗革舊弊有得
士之稱今上嗣統之初及戊子星變及慈懿太后之葬公皆草疏
率百官上之有曰節嗜慾以保躬修禮法以齊家出入有防燕遊

有度官爵勿濫投金帛勿虛費土木勿妄興齋醮勿頻設又曰均
愛六宮以繁子姓親決萬幾以臨臣民近君子遠小人皆人所不
敢言者至謂山陵宗廟聖孝所先綱常倫典國家攸重慈懿之葬
或違典禮在庭百辟將有言之宗室親藩將有言之天下後世將
有言之能保將來無據禮而改正者乎世尤傳誦其言拜吏部尚
書繼加太子少保先是藩臬由臺省會舉臺省由天子親簡吏部
僅選守令以下耳公至乃悉委之連舉臺省藩臬十數皆稱職輿
服其公明公益自信日思進賢退不肖以臻治平庚寅早霾辛卯
彗見壬辰南方大水公皆上疏條陳天下大利弊乞罷行者以十
數多納而施行每議大典禮大政事環視莫敢先或甲可乙否
公徐一言以決上益信任之嘗以災異兩乞歸不允比疾遣上醫
進藥中貴遺牢醴既薨賜賻祭葬贈榮祿大夫少保謚文敏嗚呼
自古優於政者多劣於文高其名者或庠其位騁之前者槩蹶之
後通於身者或寒於子而公無一歎焉獨年齡未及乎耄期勲業

未臻於極致故上下多悼惜之走也少欽英譽跋而望之長挹令
儀輒被知遇恆時觴詠笑談忘乎位與齒之懸也孰謂公遽弃而
歿哉哀歎方殷而璧以誅請是安可辭遂作誄曰

越有大江其名粵浙怒潮驚濤轟霆湧雪其上羣山崢嶸嶽嶽紫
蓋錦峯富麗尤絕聚靈鍾神千載一發篤生姚公間世之傑儀容
魁岸識量廣恢烏有鸞鶴馬惟龍駮百氏淹貫六行具該瑚璉之
器棟樑之材鄉書省選連奪倫魁文播天下厥聲若雷遂登甲第
在中給事有卓其囊可否獻替大輅北巡儲宮猶穉國覬長君社
稷之利發言盈庭首鼠疑避公奮而前遂決其議虜犯京城國若
旒贅謀夫孔多將怯兵脆公請發符窺間遣銳徵兩藩兵刻期並
萃掎而角之其畏弗斃先聲所臨電閃雲際虜聞震驚遁返荒裔
錯節既遇利器迺稱擢居重任舊都亞卿用刑惟卹典禮惟清察
官還遯黜陟幽明入奏厥績畱居於京不擇夷險以篤忠貞倡議
復儲獻謀安荆視寵弗媚復南其行不遠而復天寵荐增遷貳天

官陟大宗伯恭敬神祇柔撫夷狄先帝陟天嗣皇登極大禮便蕃
動皆中式一主禮闈令行弊革奸倖既驅譽髦斯得屢草章疏以
率羣辟並拜偕進匪朝伊夕自內而外鉅細休戚備談極陳以匡
聖德暨論山陵明盡懇直上回天心卒正兆域進位冢宰寅亮天
工內自卿署外達藩邦下逮胥子小大窮通孰哲孰否疇勤疇慵
旌別進退衡平鑑空誓登英傑驅去妄庸庶官稱職民安歲豐時
多災異公心忡忡屢獻大計以輸至忠豈其憂瘁竟殞厥躬嗚呼
哀哉昔歲有彗西及台衡去冬長至天雨水冰何期妖孽殲我老
成訃聞震極哀軫聖情贈諡祭葬賜賻與并百辟卿士長歎失聲
姻戚舊故雨涕填膺昔余髫鬣已知公名長而翹企鳳凰景星壯
登翰苑幸挹儀刑高位宿齒獎掖後生賡歌酣嬉懽若舊盟六元
方會一老遽薨俯仰今昔能不淚零嗚呼哀哉憶公立朝百僚之
上屹若泰山萬峯環向奄云其頽眾所安仰國有大事事有大疑
眾皆視公金鼓著龜遽云殂謝其疇之歸崇善應變九轉無滯琦

有奇骨可屬大事公最似之今也則逝相條便宜漢宣中興沆陳
災異宋眞守成公將伍之今歸於冥萬方元元誰惠誰撫九重穆
穆孰匡孰輔如何昊天弗弔下土嗚呼哀哉吉日攸屆靈輻啟行
祖奠載道執紼傾城素驥躡躅丹旒悠揚春雲慘淡旭日淒涼渺
渺長路蕭蕭故鄉黃腸下窆玉樹埋藏佳城鬱鬱長夜茫茫芻狗
灰滅石麟薜荒寒露碧草悲風白楊鴉嘯狹嘯狐狸跳梁雍門之
言萬古悽愴嗚呼哀哉

吏部侍郎范公墓志銘

楊文懿公

公諱理字道濟一字士倫號省菴宋太傅覺民之後世居台州自
臨海徙天台又九葉矣祖諱彥善考諱起宗皆以公貴贈正奉大
夫正治卿貴州左布政使祖妣陳氏妣潘氏皆贈夫人公少敏悟
端凝佔畢一呻輒能記縣官嘗以聖壽節習儀鼓吹旗仗喧簇塾
小生羣往觀公獨若無所聞坐誦不輟眾異之長爲縣學生博書
工文山蓄水湧譽髦皆自謂弗如甫踰冠中鄉試第一會試第三

皆有文銀之梓擢壬戌進士高第宣宗嘗召諸進士至齋宮親試
用以得真才論公居第二賜白金五兩楮幣五十緡既而例歸省
還朝時重守令之選拜知江陵縣作榜文諭民懇切且明盡民口
熟之縣當四方之衝過客旁午公嚴禁令雖權貴無敢漁一錢先
是民累歲負租至十四萬石都御史徵之嚴公以民貧不能償也
乃召將卒家之佃田號畸零戶者諭之曰世言戶役既佃田立戶
而免役可乎遂定其等俾各出募役之米因以償負租畢完且平
訟徭勸樹畜卹窮振弱禁奸招逋訪孝子節婦及忠賢之裔謹學
校正禮俗民慶未始得也以舊令復遽去用薦知德安府亦先榜
諭吏民大率如江陵教養之政後悉踐其言每歲必再按屬以省
耕收廉利弊每季必命題試諸生而第之拔其尤寘府後堂暇輒
躬爲其師隨州民數百家田爲楚府護衛所占猶輸租公備奏盡
歸其田民感甚皆立主而生祀之滿去以最異超陟福建布政使
時大兵勦賊鄧茂七等公司饋餉善調度兵皆給食民不加賦朝

廷嘉其功賜綵幣表裏各二楮幣千丁潘夫人憂起家拜貴州左
布政使初貴州草創卽驛爲布政司以夷之難擾也久莫能改作
公奏徙貴州前衛於他所以其地造司數百楹不擾而就土官無
訾弗能襲職者十五六公悉俾襲吏無敢難常移文以通夷情間
抗章以蠲逋稅餉兵春以糧秋以銀便省漕四川湖廣饋糧貴州
艱甚公俾代糧以銀爲之糴減時直十二貴民旣獲利而川廣被
惠尤溥秩滿擢南京工部右侍郎南京創自國初歲久凡百皆弊
葺造費鉅公不欲煩民迺請鬻蘆場之新葦抽分局之腐木碎炭
內府庫之苦瑣布帛通售銀殆萬兩又請南畿獄囚贖者隨葺造
所需而納於是自郊廟宮殿內外諸署城樓街表或造或葺動輒
百千間旣修巡戰諸船數百兵食諸器數萬皆以次成而民不知
又奏各處饋南京糧者自船抵倉多所費每米石費三斗請兵就
其船人支三月之餉官取費米歲可萬石以備振貸從之果利尋
轉南京吏部左侍郎考課公明白百僚憚之嘗請老至再不允滿

考赴京途遇疾輿就其子進士綱之第輒舉手加額曰無以報朝廷無以報朝廷遂薨成化癸巳五月四日也壽六十四上聞嗟悼命有司祭葬之公配湯氏累封夫人先公卒葬於縣西長洋之原公以薨之年某月某日合葬焉子男六長綱次卽綱次統次曾同次昌齡蔭國子生次玄齡補縣學生女二人孫男女十人公早孤事潘夫人孝處昆弟友居官清慎忠勤凡政皆精慮而果行之一以惠利為主故江陵纔七閱月而去之日民遮阻不克則奔餞數十里慟哭而返少保楊文定公溥聞之曰世有為縣七月遽得民如此怡愉各書所薦皆公名馬公謂公賢而文宜督學之職文定曰為縣既得民矣俾任民牧尤宜馬公諾合詞以聞迺有德安之陟逮其去德安去貴州也民祖餞如江陵尤甚德安又勒去思碑於府治焉自庚戌逮今同時輩行無在者歸若魯靈光之獨存而德業聞望隱然動天下殆書所謂耆壽俊史所謂名大臣者其為文章操紙筆立就率温厚坦明深切事理嘗著讀史備忘天台要

略皆八卷詩經集解三卷德安府志丹台稿皆十卷藏於家綱將奉柩還葬乃具狀泣請余曰先君治命固以銘屬先生嗚呼余童而慕公壯被知愛深矣公嘗入賀萬壽節退燕余第同燕者今戶部尚書兼翰林院學士商公故太子少保兼吏部尚書贈少保姚文敏公國子生故盧君楷今余弟守吐凡六人皆浙解元也三公勲德位望冠當世而公與文敏對居兩京天官豈惟浙之儀固四海之表也今文敏殂矣公又繼之悲感可勝道哉銘固晚生之職也況公治命其敢辭銘曰

太公國齊簡禮從俗僅五月終報政何速公為江陵政非呂望加其二月仁滂惠洋去不能馳稗耄遮阻執袂號啼如子失母黃霸守郡治莫與夷及為丞相勳烈小虧公自令長郡守方伯入副尚書居守是職材非偏長所在有績於赫厥聲不損彌益晚秀獨揚行輩凋盡一老之遺天胡不憖有馨其俎有舉其封皆帝之賜恩榮始終台有赤城萬古絕只公之休光庶或與比

毛宗吉傳

吉

楊文懿公

守陳

毛宗吉餘姚人也名吉自少攻文學尚氣義言論侃侃不少屈舉進士授刑部廣東司主事嚴明廉鯁訊囚多立驗權貴無敢撓之苞苴雖半蹠一縷必峻卻山東人有居京者女歸壻反目令女逸匿之山東因誣壻殺其女權嬖右之壻誣伏坐死獄疑當讞已更數司閱數歲適宗吉讞得其情密訪女獲之壻乃免一部推服京城姦民有畫竊人家貨賄謾途人翦其囊者諺呼小李宗吉捕得其魁箠死之其黨稍戢錦衣衛卒迫百司鈎撫傳致書片楮以聞輒報可至有被誣坐族者公卿皆重足待之干請必徇然或犯罪例入廣東司莫敢孰何宗吉獨法治之如他犯指揮門達怙寵擅威福能生死人在俄頃百官遇之途皆躍馬避恐後宗吉獨與舉鞭抗揖於是皆銜之偵其過百方無所獲一日宗吉以失朝下錦衣獄衛卒羣吠脅之宗吉徐曰有國法在爾曹奈我何達聞益怒喉健卒掄巨梃挺之見骨幾死猶行行自得療數月方愈人語之

蓋少貶徇俗宗吉笑不應復職一如故輿論賢之名聲藉甚升廣東按察司僉事分巡潮惠二府黜墨吏推強宗殄海寇民用監輯期滿代還民乞更巡一載從之劇賊楊輝據程鄉縣之寶龍峒其黨曾玉謝瑩分據石坑龍歸二峒四出剽虜刻期攻縣治宗吉曰先人能奪人之心亟調官軍集民壯僅七百人倍道馳至石坑賊三千人出拒宗吉定計令兵佯退以致之賊躍而進乃督兵殊死戰良久磨伏兵起遂克之縛曾玉明日乘勝破龍歸禽謝瑩又明日攻寶龍賊伏山上篁竹間發弩矢我軍阻深谷弗克進宗吉乃簡敢死士百人人懷十石子從間道攀蘿陟篁竹後投石子亂擊之楊輝殪餘眾驚潰凡破三峒斬首五百級俘六千人獲白金八千餘兩他物稱是功奏未報時廣西蠻賊滋蔓高雷廉三府尤苦之眾推宗吉往巡道路榛塞村落爲墟數百里無人煙攬轡四顧悲且憤慨然有削平禍亂之志至廉州內官監珠池者方繫民數十人徵賄箠擊幾死宗吉歎曰民幸不死於賊者又死於此何忍

也遂盡釋之凡黨內官者悉寘之法眾口稱快至雷州報賊劫大體村遽檄都指揮石鼎出擊鼎懦不敢宗吉素知海康縣知縣王麒忠勇可任卽命麒率民壯偕擊賊走之斬首數百級奪還人畜無算賊入吳川縣分爲三其一由水道宗吉覘知復命麒舟兵追破之其二聞風潰去相戒勿犯自是部內稍寧因條平賊方略奏之上嘉歎升本司副使降敕獎諭委總廣東軍務宗吉益感激思報以滅賊爲己任惠州河源縣告急卽兼程進兵敗之鋪前又敗之長峯徑口賊遁至清遠縣守將都督僉事張通遇之戰北宗吉亟進援賊見其幟呼曰毛家軍來矣遂奔潰凡斬首三百級奪還人畜數千踰月廣州新會縣告急宗吉提兵至火磴斬賊首數十級賊遁入陽江縣營於雲岫山仕峒我師夕至比明擊敗之賊棄營走山上師徂勝突入其營陣亂賊乘之刺殺前驅潘百戶石哨指揮閻華師遂潰宗吉勒馬大呼曰劄住劄住潰已不可遏從騎勸宗吉退避宗吉叱曰爾去吾誓不與此賊皆生益奮而前

揮刀砍賊不已力屈被害成化元年三月一日也是日晝晦烈風雷雨大作山谷皆震動踰七日得屍貌猶若生櫬還官吏士民弔哭祭奠相屬事聞贈通議大夫廣東按察司按察使遣廷臣諭祭賜其家米四十斛布四十疋錄其子科爲國子生

論曰嗚呼兩廣之毒一何酷耶自昔任邊事者賊至僞不聞聞亦不往往亦不戰戰亦不力甚者十餘賊驅子女數百過城下亦莫肯以一矢相加遣人以告則詬誶之賊去乃始耀兵入墟落殺掠齊民以爲功王師兩征猶踵其故智權貴右之濫封溢賞不吝也朝奏捷夕告急不詰也陷城棄師失律之將不戮也非誨之縱賊殘民耶亦無異乎毒之酷矣獨一宗吉如兩廣何人孰不死而宗吉聲光將與日星照終古彼偷生倖富貴者竟何如哉竟何如哉

皇明名臣琬琰錄卷之十二

皇明名臣琬琰錄卷之十三

南山黃先生墓碣銘

潤玉

楊文懿公

守陳

后集

山環吾郡而其南若金峨諸峯尤峻秀先生樂之故自號南山而學者稱南山先生無異詞先生嘗仕有官階矣皆不稱其官獨舉其號而先生之者崇其道也先生之道性於天而成於自得其學以聖賢為一鵠以知行為兩輪嘗曰學聖賢一分便是一分好人又曰明理務在讀書制行要當謹獨此其所以學而道也方其少時已負文行之譽及其壯強益修耄老不懈德足重於眾功足昭於時言足立於世其可謂有道而甚文者歟先生諱潤玉字孟清世為鄞人曾祖長卿仕元蟹浦巡檢祖啟翁隱鄉授徒父良以先生貴贈文林郎行在交趾道監察御史母嚴氏贈孺人生母史氏封太孺人先生方五歲侍母病夜不就寢家人已稱其孝六歲就塾坐立屹然不與羣兒狎書過目輒成誦師奇之十歲行道見遺金不拾途人悉嗟異歲十二聞郡守王公璉舉鄉飲酒禮於郡

庠往觀之默識其儀歸書於冊師愈奇之歲十有三時改元永樂命江南富民實北京其父當行先生詣官請代官少之對曰父去日益老兒去日益長官異而從之踰年抵京受廩北城外十里所沙漠寒沍茫無人煙先生與同役築室成比閭傾訾給徭賦墾圃鬻蔬以爲生人不堪其劬率先生安之稍隙輒肆力於學以己心爲嚴師而靳造乎聖賢擇然後語確不可易焉揆然後動端無所苟焉京有富翁僅一女招先生寓宿其家而同賈先生辭或問之曰瓜田不納履也其慎行若此里中弟子多從之因敷且學閒爲文辭不作組麗嶄刻之語而理致淵永人喜誦味之補郡庠生京闈鄉試擢禮經魁會試授建昌府學訓導丁文林公憂改訓南昌府學蔚有聲績用薦拜行在交趾道監察御史出按湖廣罪斥藩臬郡縣之不職者至百有廿人威望赫然英廟卽位以學政衰弛命廷臣舉有學行者爲憲臣以董之楊文貞公以先生薦遂陟廣西按察司僉事屏浮薄獎俊賢士風丕變時寇起軍興都指揮吳

某妾掠子女萬餘口先生劾而歸之副使李立入民死罪且數百人亦爲辨出之萬口稱快南丹衛在萬山中瘴甚戍卒歲死或幾半爲奏徙於夷曠之地人感之至今丁史孺人憂改湖廣按察司布憲亦嚴巡撫都御史李實張甚藩臬皆折節下之先生獨無加禮而連黜墨官二人又皆其鄉戚也故發憤誣奏先生不諳刑律先生弗辯也左遷和州含山知縣浚麻湖以復逋租閱蘆場革其積弊徭均訟平民感悅之請老致仕尋以子隆貴封承德郎南京刑部廣東司主事閒居簡出曰惟玩味經義無厭足平生著述甚富以朱子嘗欲編禮記附儀禮乃取儀禮析爲四卷而以禮記比類附之不類者附諸卷末首亦各有意義又以五禮獨缺軍禮因取周官大田禮補之而以禮記諸篇載田事附焉別爲一卷通五卷皆爲之注釋總曰儀禮戴記附注以小學四書諸經注家或遺或誤撰經書補注以大學中庸旨皆淵奧撰庸學通旨以禮記深衣制十有二幅鄭氏誤注爲裳而玉藻長中繼掩尺注亦誤撰考

定深衣古制以四明新制蕪穢撰寧波簡要志以道德經陰符經
古注皆昧各爲之注嘗因安遠侯溥問古兵法爲注孫子其他備
論理事曰南山錄雜著詩文曰南山稿皆藏之家居二十載壽八
十有九而卒時成化丁酉五月二日也卜某年某月某日葬某處
隆具狀屬余銘嗚呼詩有之雖無老成人尙有典刑老成人之重
於典刑也尙矣吾鄞風俗自古樸淳大里之高節董溪之純孝可
徵也宋慶曆淳熙以來諸老傑出表以馴行闡以正學既駸駸於
古矣有國初士猶修德行礪名節尙道學而文藝仕進不甚貴之
逮於今則文藝日以盛仕進日以繁而尙所謂德行名節道學者
或莫知省於是老成人凋謝盡矣而先生巋然若魯靈光之獨存
後生小子有志於古者尙可憲而則焉今亦已矣噫可痛哉先生
性剛介寡交游其所稱許者四方若李文毅公時勉薛文清公瑄
不過數人而鄉邦尤鮮獨與守陳祖考樓芸先生雖顯晦不倫而
以道德相契往還閒人見兩先生皆偉貌豐髯莊重嚴毅畏之若

神莫敢卽所談惟性道之淵文辭之奧未嘗一語及世故守陳少
撰杖履侍側聞緒言爲多長與隆同舍講學且久逮先生歸老尙
時獲親炙之故知先生爲深宜隆之以銘屬之也先生室范氏封
孺人贈繼室以舒氏五男長性永新訓導次教次道宣議郎次隆
以進士累官四川按察司副使廉毅文雅政聲章甚次達國子監
生孫男廿有七曾孫男十有九先生位不滿德而年齡之高子孫
之顯且眾若償之矣況又有不朽者在乎銘曰

在古聖人未始不學其學伊何道德矩矱數爲勲勞著爲言議以
澤當時以覺後世譬彼天道生物爲心霆雨發育日星照臨是二
道者蓋難乎備姬孔至哉程朱其次爰及吾郡二敏豐清敏四先舒沈深寧王應文潔黃東亦各有傳晚生黃公天性孔懿自其少
時已克孝義長而好學昕夕簡編心驗躬履誓趨聖賢明理在書
謹行於獨發是二矢射彼一鵠乃齒鄉論乃作校師道尊教洽厥
聲四馳迺陟於朝六察是職茹雪齧冰隼翔鷹擊天子曰咨學政

日靡慎簡憲臣俾振而起八桂成林丹徼之極鳩舌卉裳在泮挾策先生不鄙示之周行沃醉俾醒警豁而明徙涖湖湘專典臬事驚車所臨風聲逾厲彼貴方逞我守其恒呢訾慄斯則匪我能巧詆既成用宰百里斲楹為榱大匠斯喟素位安命何有怨尤利興害去惠仁滂流尙丹其心遽白其髮飛不盡翰歸休於樾有子克肖亦豸其冠孫曾蟄蟄敬恭暄寒閒居簡游舊著是嫺清墨磨丹之死不輟儀禮為經傳惟戴記合而注焉晦翁之志經書補注庸學指歸有刊彼誤有拾此遺道德陰符暨孫武子亦各注之以闡厥旨深衣制幅誤注為裳千載之謬一朝用章格言孔多厥有別錄餘文暨詩亦溢於櫝古者不朽惟德功言先生庶乎鄉之前賢嗟彼蚩蚩孰寵與利紆朱懷金以炫於世奄其逝矣湮滅無聞孰與先生身亡名存我銘斯邱匪但焯德且以砥愚庶其有擇

右僉都御史汪公神道碑

楊文懿公守陳

都察院右僉都御史汪公被命整飭薊州山海邊備兼巡撫順天

永平二府越二載得疾請歸未及報疾已亟輿至京師之寓第卒成化十六年四月二十三日也年纔六十有三自將佐守令下逮兵民皆悲慕不已交章列其行治請賜葬祭以寵異之制曰可舊典凡四品以上賜祭三品以上加賜葬今公官僅四品而葬同三品實異數也非有大得乎下而深獲乎上曷克致是哉公姓汪諱霖字潤夫廬之六安州人高祖富德安府同知曾祖景道莘縣知縣有能譽嘗被賜金帛之徵祖克敬不顯父洪麻城縣學教諭以公貴累封大理寺丞母某氏累封太恭人公承家訓起州學登進士第拜監察御史出按雲南操已慎布憲公讞獄多所平反吏民安之丁封寺丞公憂復職按浙江持其素益勵時錦衣衛指揮門達方秉權能其子商於浙自鎮守官以下皆曲意悅之以公獨不禮也歸諧之達怒遣校尉偵之卒以無罪也還掌江西道適今上嗣大統言官劾門達抵罪薦前都御史王公竝李公秉皆復任天下謹快公預力焉先是兩廣蠻寇出沒且十載屢征不克至是

命趙都督同知輔率師征之遂命劉御史慶與公察官軍有生事
與冒公者皆寘之法公與劉協心申令師肅然憚之自京抵兩廣
所過按堵且以策贊帥擣賊穴如破竹既而審首級有妄者斥之
俘獲有係吾民者縱還其鄉凱奏論功拜公大理寺丞秩滿陞本
寺右少卿尋擢都憲被劾邊撫郡之命遂乘驛徧所治戒將佐練
士卒葺城堡樓櫓器械軍聲用張虜莫敢犯且厲守宰俾勤恤
民隱無或怠違舊例邊軍糧餉永平府給古北口薊州給山海關
皆以車運費重而途艱然緣邊米價頗賤公請以銀代糧分給之
兵民兩便皆歡欣戴感至今公性孝喪父哀甚迎母就養京邸遠
都憲考最例進階公請輟階進母太恭人之封比死惟以弗克終
養爲恨其爲人寬厚溫恭臨政詳慎未始徼赫赫名然其所治無
論朔南人皆悅慕之公聚張氏封孺人子男五人長曰陸陰陽訓
術次曰暉曰曉俱州學生又次曰昉曰眼孫男十有二人陸輩上
葬於其州之某地既請邱祭酒仲琛銘周侍郎堯夫表矣乃復請

余碑焉余與公有雅弗克辭系之銘曰

六惟古國皋陶所封於今爲州公家其中公之高曾以逮於考三
世顯榮公大厥紹奮登甲科遂典六察威惠所加六詔兩浙兩廣
麻沸帝命師征公監以憲有聞無聲孰狼孰貪孰猛如虎孰敢干
令以犯吾斧運籌佐帥帥擣賊窟封豕長蛇是絕是忽於彼係累
有我赤子釋而從之還厥宅里奏捷第勲丞於大棘貳卿無何都
憲是職鷺車按邊將士用銳高城深壕虜駭而喙督守與宰字其
下民雨稿俾秀化愁爲欣胡不耄老僅耆而逝大小邇遐交傷並
喟天子有詔斧封巍巍刻石墓道過者式之

少詹事柯公傳

潛

王文肅公傳

學士柯公諱潛字孟時別號竹岳興化莆田人其先晉江人五代
時有諱寶者官大理評事徙莆之武盛里生宋戶部員外郎峽戶
部生長陽尉濟長陽生潮陽令璿璿之孫贈承事郎昱再徙邑中
安樂里今所居柯山是也承事生海豐令新之由海豐二世至海

陽尉啓海陽以下又六世至公高祖憲孫曾祖君寶祖德平皆不仕父原璞用公貴累封奉訓大夫尙寶司少卿兼翰林院修撰配戴氏累封宜人公生有奇質穎異絕人數歲能作詩十五能爲舉子程文從鄉先生林知縣庭芳方行人解游補邑庠生正統甲子領鄉薦當赴會試以未忍離親未果行遂攜書入蓮峯僧舍講讀不輟戊辰會試中乙榜辭弗就教職入胃監攻苦食淡益肆力於學景泰辛未再至禮部遂中甲榜進對大廷賜狀元及第賜宴賜朝服冠帶公上表謝越數日授翰林修撰公丰神峻整言動謹飭是時翰林諸老多在咸愛重之爲之延譽未幾賜五倫書五經四書尋用薦入經筵自是凡朝廷用人有制作加恩典公皆與焉壬申四月升右春坊右中允兼修撰五月預修歷代君鑒書成賜白金十兩綺二表裏甲戌二月禮部會試爲同考試官五月預修寰宇通志三載滿授敕命進階承德郎推封二親及妻戴氏繼室俞氏丙子五月通志成升司經局洗馬仍兼修撰加賜白金文綺八

月考應天府鄉試舟維淮揚有舉子鬻私者暮夜投公公叱之彼固以請以所賂遺置公前公怒命執付有司治以法是秋場屋肅然比揭曉咸稱得人還朝乞歸省未行英廟復辟改元天順更授公尙寶少卿兼職如故仍許歸省己卯二月命修玉牒庚辰春命偕呂學士原考禮部會試十二月命充東宮講讀官尋給誥命進階奉直大夫加封其父母妻癸未二月復命偕陳學士文考會試會場屋火罷甲申今上卽位以隨侍恩升翰林院學士三月有旨選進士年少質敏者李東陽等十八人入翰林爲庶吉士命公教以古文詞學八月上御經筵敕公兼經筵官仍賜白金三十兩寶鏹三千貫文綺二表裏九月奉旨纂修英廟睿皇帝實錄成化改元八月考順天府鄉試九月玉牒成賜宴兼賜日金文綺寶鏹丙戌廷試與讀卷賜鈔千貫是月再奉旨教庶吉士林瀚等二十四人十月賜新刻貞觀政要十二月命掌翰林院印丁亥五月實錄成升詹事府少詹事兼翰林院學士賜白金三十兩金織綵緞三

表裏折衣羅三表裏賜宴禮部十月賜大明一統志戊子二月命
日侍經筵講讀自辛巳迄戊子凡遇午節輒賜牙骨聚扇上有御
製清暑歌解愠歌及諸家繪畫金織扇袋五色圓壽絲縷虎頭條
畫艾虎七月有詔議慈懿太后山陵事內閣大臣先進章公率僚
屬繼進論合葬於禮為宜明日文武羣臣復繼進未得旨公復具
疏期以死請曰朝廷大事臣子大節舍是奚所用心頃之俱召至
文華殿諭可其奏眾懽呼而退十二月賜經筵儒臣七人襲衣冠
履公已聞父喪上命卽其家賜之既而有司為少卿公請祭命並
與葬蓋異數也公感激銜哀就道抵家不入中門寢苦枕塊不脫
經帶擇葬地於所居東一里許和溫山麓以不忍離喪次圖繪形
勢付其弟通州學正江董成之時母戴宜人在堂事之逾謹備極
甘脆已丑九月季弟澍病親為調藥比卒殯殮皆從厚朔望易期
服哭失聲而後返衣衰居苦次君子謂之有禮庚寅正月戴宜人
屬疾越五日卒公哭踊絕而復甦朝廷聞之復遣官諭祭辛卯四

月有詔起復時祭酒缺員久難其人上知公剛方將用之以厭士
論公聞命具疏乞終制大略言忠與孝豈有二致事君事親初無
兩心使親喪可短則他日所以事君者可知矣上覽疏許之初公
素無疾至是以久居苦塊患左足風痺未平而寒熱繼作公自知
不起呼學正君與之訣瞑目而逝時癸巳八月十一日也年五十
一計聞上悼惜遣官賜祭復命工曹營葬公娶戴氏先卒繼俞氏
南京禮部侍郎綱之女子三長森次林戴出季宗文側室王氏出
女二公天性孝友養親養志友愛二弟撫育從子尤極恩意念季
氏早沒悉以先公所構寢室讓與其子宗璧而自與學正君別作
室於都廳東西以儉陋自居人以義稱公稟氣峭直操行耿介發
為文章嚴整有法類其為人其為詩新清微婉尤有風致其性喜
遊供職之暇時偕二三知己窮覽勝概雅歌投壺分韻賦詩襟度
豁如也既總院章卽詞林後圃結清風亭亭下鑿池蒔蓮決渠引
泉公退宴坐其中又翛然若真登瀛洲者至於遇事感發言論侃

侃揚摧古今毅然自負如公者可謂動靜不違守之以正者矣故雖官庶僚已繫天下之望位曰通顯望曰益重雖嘗以聖賢之學啟沃聖心其平生所蘊蓄抱負蓋未及少施於天下故其歿也匪徒士君子傷之雖天下蒼生其素所屬望者蓋不能無缺然也使天假其年上柄用之其所經綸贊理宜何如哉予聞之宋儒明道之卒也或有問於富韓公公曰伯淳無福天下人也無福又不知今日之知公亦有如富公之知明道與否也俱忝與公同年及第同官翰林二十年辱公契愛為深公易簀時其家人咨以後事公無他語第曰爾往南京見王學士訪之噫願予何人敢承公死生之託耶閱月計至予既為位哭之謹論次其平生以為傳授其子宗文使傳焉

太常寺卿王公墓志銘

王文肅公

公姓王氏諱獻字惟臣號退菴杭州仁和人也會祖諱思誠元醫學提領祖諱性安冠帶醫士贈太常寺卿兼翰林院侍讀學士祖

妣楊氏贈淑人考諱智初封編修後累贈太常寺卿兼翰林院侍讀學士妣顧氏亦累贈淑人繼母俞氏封太淑人公天賦穎異羈貫知讀書記誦日數百言不煩熟復即終身不忘十五學通經肆筆作舉子程文十七領鄉書明年景泰辛未登進士第與狀元柯潛等二十八人同進學東閣賜居第給大官酒饌及膏紙費命內閣大臣典領之蓋不別立師不出就外署一如永樂初科故事公感際遇益肆力於學工古文詞在同年中最號敏贍時公猶未娶吏部侍郎淳安項公見而奇之以女妻焉癸酉授編修與修寰宇通志升修撰天順初乞歸省賜路費鈔逾年還朝命入內館授中貴人書癸未春同考會試會貢院火秋復試復為同考是科先後兩入簾不改命者惟公一人丙戌修撰秩且滿先公計至即日陞辭星行抵家治喪葬戚易兩至暇日與鄉人接恂恂謹厚無一毫早達貴侈之態人以為難尋用薦起復之公疏乞終制服闋升左春坊左諭德兼修撰庚寅命充經筵日講官賜大紅織金襲衣東

帶冠履辛卯再賜大紅羅衣一襲是秋主考順天鄉試壬辰充廷
試讀卷官賜寶鏹千緡未幾升翰林學士癸巳賜金帶本朝學士
非典密務侍日講者皆不與是賜蓋異數也乙未復充廷試讀卷
官賜寶鏹千緡丁酉朝廷用儒臣議追崇先聖禮樂遣公祭告闕
里比還適所嘗與修宋元通鑑成升詹事府少詹事仍兼學士戊
戌皇太子出閣命侍講讀於文華殿又命偕學士南昌謝公教庶
吉士梁儲等於玉堂外署滿三載乞恩移封父母詔許之今制凡
朝臣五品已封者卽四品不封先公旣贈論德今加贈詹事皆兼
兩銜妣亦由宜人加恭人人亦罕與爲媿辛丑主考會試壬寅修
文華大訓成升今官甲辰丁未再充廷試讀卷官復再賜寶鈔蓋
自擢第入翰林於今三十有七年先後握院章者十有六年而年
已五十餘後進推公爲先達知已期公於大用公雖謙不自居而
亦頗自信其必至然訖不登樞筦履要劇以少展其所抱負君子
惜之所謂行止非人所能爲而天實爲之也公爲人性度夷坦襟

宇澄霽與人交洞見表裏爲人謀不擇利害嘗有同官最厚者卒
而子幼家事爲二弟所持公忿然不平乃拉二三僚友爲之處分
不得逞遂造爲無根之謗以誣公好事者從而扇之公雖弗爲辨
而亦不能釋然於懷卒之以此齟齬終身而不克永年於是識者
又深惜之謂人眾勝天而不可盡諉之命也公學通春秋三傳作
詩文有奇氣好持論而切於用事作字亦飄逸類其爲人客至對
弈終日其所自奉雖儉而供具必豐比遭謗則罕與人接遇親舊
亦寡言初拜官時年方少而癯眇中歲漸豐腴比年乃更羸然如
不勝衣蓋時已屬疾猶日侍朝供職相知者纔一再晨不見而公
已易簀矣成化丁未八月四日也享年五十有四訃聞上憫惜之
贈禮部左侍郎遣官諭祭命有司營葬及後三月兄惟貴自鄉邑
來歸其喪以某年某月某日葬某山某原因念公之子寔久廢於
痼疾慮無以紹其嗣乃請於朝以其仲子雲後公制可之併以雲
爲國子生俾之有世祿焉吁哀卹之典厚矣公配項氏贈淑人先

十二年卒生男一卽靈女三繼劉氏亦卒側室生女三皆幼子曩
在景泰初與公同年及第同讀中秘書又同官翰林同居一坊交
相契而往還甚款密一日公與童庶子大章過予大章好詭浪喜
說相談死生之理自謂其體太魁碩當不壽公亦清修不耐老吾
二人先死銘皆於子是屬蓋予僅長大章一歲死先後未可知若
公則少予十稔我銘當以屬公皆笑而領之後予去官南京二十
年不返大章卒予不及銘惜其有二大節如不附石總兵求官至
挽之不去解紛一朝士廷辱石氏之黨上怒索其人而大章不妄
指以道已責當時稱之而後世無傳焉予深有負於大章也頃予
被召北來而公歿甫十日謂可圖踐言於公而公家不予知遂不
嫌自售請於編修君得其所述事狀爲按而序之蓋予載之傳雖
不宜託之蕪陋譎淺之詞而片言之諾庶足以全夫朋友死生之
義故不復他恤而卒爲之銘銘曰
仕旣逢時位亦不庠直驚橫馳靡適不宜胡嗇其施而止於斯尙

承於垂刻此銘詩

戒軒先生傳

都御史門人楊璿撰

先生常郡錫邑人也諱善字擇賢姓馮氏故邑著姓高祖亨甫曾
祖達卿皆業儒大父彥嘉福建都衛經歷父景春先生天才極高
性剛果遇事不少假借故號戒軒以自懲時學者未知所向慕先
生立言行已皆以放斥浮詞敦尙實行卓然爲東南文學之倡年
二十爲州里師擿發疑義爲學徒陳道諸老生無能論難者長益
肆力問學期底於實用宣德初兵科給事中陳玘左遷邑丞察其
賢以經明行修薦爲本縣儒學訓導先生辭不獲迺曰廟堂之臣
恢弘事業學校之官陶冶人才人才成則事業見卑其職豈朝廷
養士意邪乃拜受之先生雖以書經起家而博通五經其論學術
則曰五經一理也兼通而時出之始克稱儒自漢以來儒者執一
經以名家非所以博學而反約也其論道統則曰斯道在天下有
統有原原出乎天統存乎人吾邑自喻尤諸公得楊文靖之傳於

紹興嘉定間既久而晦蝕數百載之下豈無上接其傳者乎乃建
議以爲先賢乃儒教之根源道德之脈絡學宮舊有祠多歷年所
浸至蕪廢今宜以中楹復祀文靖公以下五先生東楹則祀鄉先
賢如唐李紳輩西楹則祀有功於學校如元虞薦發輩上書當道
遂從其議蓋先生以繼往開來爲己任倡明道學力拯頽風復還
於正是以士子翕然從之而先生之聞望益高旣而丁外艱治喪
參酌古禮含斂葬祭痛革俗弊不用浮屠大爲時輩詆笑縉紳閒
亦有毀其難行者乃取朱子家禮質以太祖高皇帝御製孝慈錄
等書並朱子後來所行與家禮不同者逐節筆之如喪禮舊以嫡
繼慈養母斬衰三年祭祀則四代其一祝板之類皆革去家禮舊
文一遵國朝制度如深衣續衽鉤邊喪禮惟父母用衰辟領負版
與夫祭禮冬至立春不祭始祖之類一以朱子晚年所行爲主家
禮原文不復采錄以至引用諸書並漢唐宋以下諸儒居家雜議
有可依據者萃爲一編目之曰家禮集說敘而習之以立修齊之

本大意以爲時有古今禮有損益修而正之變而通之此家禮舊
文雖少變於今日而未始失其禮意也知禮者是之其書遂行今
江南士庶家皆遵之民風亦爲之一變初先生父以誥誤備邊母
悲哭喪明先生畚耨侍養躬自浣濯衣不解帶者十年母目復明
至是父歸卒廬於墓者三年有司欲舉孝行先生以母老固乞近
地迎養奏可復升安慶望江教諭先生自負甚遠恆欲草封事論
天下大計復念犯位卑言高之分則又歎曰時不我值命也奈何
一折去牙角旣無所發其忠愛則以勸進後學爲事旁引曲諭務
啟其聰明故出門下士隨才各足一時登拔者獨盛於他郡嘗典
江西鄉試黜浮陟實士論多其得人景泰紀允以秩滿赴銓曹見
撤民居爲巫立廟走告大宗伯胡公澐願罷其役詞氣激切胡公
壯之謂其心術正大不宜屈置閒散方將薦聞而先生竟致政歸
當是時年六十三矣又十三年而預自爲誌又三年而終得年七
十又八其自誌曰昔孔明自比管樂時人莫之許今時人許先生

有匡世之才卒靡冷官而止人皆惜之先生無悶也其教人以倫
理爲本詞章次之化導諄懇能得士心故沒而士子思之有司崇
之錫山望江各崇祀於鄉賢祠有子三人泰濟豫泰世其業領丙
子鄉薦其平生所著扶樹教道有戒軒文集若干卷宣寄性情有
戒軒詩集若干卷參訂古禮有家禮集說敦厚風俗有錫山望江
三誌其門人分職中外

皇明名臣琬琰錄卷之十三

皇明名臣琬琰錄卷之十四

大學士彭文憲公言行錄

尹侍郎

后集

彭時字純道安福人進士第一歷仕正統成化閒位至少保吏部
尙書兼文淵閣大學士卒年七十贈太師諡文憲公自少端重寡
言不與羣兒相狎戲惟奮勵讀書治春秋從叔父僉憲及憲副二
公學屬文輒有驚人語二公喜謂他日必爲宗工及領鄉薦入國
監博學精思爲海內士所推服祭酒李文忠公尤以公輔器待之
初入閣與泰和陳芳洲諸老遊公雖晚進積學素履殆無愧焉後
復入閣英廟方倚任李文達公有事數召面議文達退卽諮處於
公輔益居多其有不可者每據理力爭不肯一詭隨初或意相忤
久之心服其公且明語人曰彭公眞君子也天順末錦衣衛指揮
使明達甚見寵任忌文達與相軋陰中傷之上曰李且得罪行專
用彭某中貴以語公公矍然曰李公何遽至此因爲力辯其誣語
聞文達得釋

河南有衛官頗強橫陵人用事者誣其謀反門達煨煉成之公曰
人可輕殺耶具言於上竟得從末減活其家數十人今皇帝嗣統
進吏部右侍郎兼職如故是歲秋同知經筵丙戌乞歸省詔馳驛
往還太監許安致道里費長隨張敬護送抵家未踰月手敕促還
朝丁亥二月至上慰勞之六月以四川宣府遼東地震上疏陳六
事皆規切於時政八月總裁英廟實錄成進太子太保兼文淵閣
大學士尙書如故戊子夏陳莊靖卒公上疏言才識迂陋今冒居
內閣首僚何以下副羣望乞妙選出眾才賢擢居前任上曰卿輔
導有年才識老成何以辭爲慈懿太后崩詔大臣議葬所眾相視
莫敢先發公曰梓宮當合葬裕陵主當祔廟此一定體無可議者
具疏引漢文帝合葬呂后宋仁宗合葬劉后故事乞念綱常之大
體先帝之心必求其至當此實綱常典禮萬一有違在廷百辟將
有言之宗室親王將有言之天下之大萬世之遠亦將有言之豈
能保其終無據理改而從正者乎上猶重違母后之意未允公與

在廷文武羣臣伏文華殿以請或至嗚咽泣下上爲之感動卒從
禮制是秋彗星見越三台公上疏乞痛加修省而謂外庭大政固
所當先宮中根本尤爲至急望正名分均恩愛以中繼嗣爲宗祖
大計又言大臣進退皆宜斷自宸衷不宜專任臣下如平昔察知
其人或召吏部面議或召臣等參詳庶權出於上皆嘉納之平涼
土達滿四反官軍連失利都御史項忠奉詔往撫捕之公料其必
成功而朝議洶洶咸欲再遣將出師公執不可或以危語動公公
不爲動未幾獻俘至議者始服上嘉賜俘奴一人己丑冬無雪上
疏言自古旱災皆由下民困苦怨嗟之氣感動天變而致近日光
祿寺之買辦各城門之抽分掊剋太甚而獻珍珠寶石者私賄估
直之人倍增其直以規取府庫以萬民之供輸而爲奸人之所侵
奪伏望盡革其弊以惠生民上是其言京師爲之踴躍辛卯十一
月彗復見上疏言德政之要其一乞崇正道而毋惑於佛事其二
乞謹命令之傳庶事出於一而無詐僞其三請退朝之暇延接大

臣面議政事兼問軍民之休戚訪人材之賢否察治體風俗之得失其四言近聞嬖倖無故而受金帛者多工匠無故而冒官職者眾是賞太濫也或罪不應謫戍而謫者或罪不至死而死者是刑太深也宜節賞慎刑以遵成憲其五乞以古之聖賢為法聽受羣言勿惡其切直勿忽其迂遠苟當理者宜即行之其六言股肱之臣耳目之司近多主於奉承而嫌於違覆直行已意而不加斟酌乞戒勵各官慎修厥職股肱者事有不可宜再三執奏毋率意而行司耳目者遇事為民蠹宜即劾奏毋徇情而默庶百官奮厲興起事功其七乞清理三營草場減退豪勢莊田嚴有司掊剋之禁庶軍民得所邦國永寧上曰然卿等宜益勉佐理太監劉永成沒言其有軍功宜追封為伯公力爭之或曰自古有封王侯者公曰此盛世事耶祖宗成憲具在誰敢違之事遂寢壬辰天下水旱相仍復上疏言時政闕失乞放歸田里不許乙未正月升少保尋復病蓋自己丑以后凡七在告上輒命醫視疾遣內

臣致豬羊鷄鵝酒米之賜踰月不出則必再遣焉病革衣冠端坐徐言曰死生常理不足驚但冒居天位上不能報國下不能養老父耳無一語及私問之亦不應是夕遂不起三月二十二日也公資稟既異加以學問之純自少至老敬謹如一日居閒無惰容行則兩手常端拱飲食不聞匕筯聲尤不喜紛華先後蒙賞賚白金幾千兩綵幣數百鈔十萬緡冠帶衣服書籍器玩鞍馬飲食之類有加而公處之泊然終歲不一二宴會會未嘗有音樂於物尤愛惜雖片楮寸墨未嘗輕擲然非其義一毫不苟取與人接色亦有和無疾言無喧笑諧謔聲至於論辯事理則確然有不可拔者交朋友久而益敬人有善稱道之唯恐其不彰論薦人材未嘗私以語其人嘗一典應天府鄉試一主考會試四為廷試讀卷官皆稱得人大臣閒為新進所媒孽者必反覆辯析且以愛惜人材之意上達言官以言語或微過被譴亦必委曲言其不足深罪賴以全者甚眾

並彭華撰行狀

尹直贊曰洵美文憲早躋木天粹温如玉

沈靜如淵歷事三聖抒誠秉謙不大聲色浮敦躁恬化機潛幹豈徒代言

少保商文毅公墓志銘

尹侍郎直

成化丙戌冬詔起前兵部左侍郎兼翰林院學士商公於淳安山中至則復職仍參密務公辭不允乃感激就任累遷太子少保吏部尚書兼謹身殿大學士丁酉以疾懇休上察其誠從之升太保兼職如故賜璽書金幣襲衣寶鏹給驛以歸抵家十載始卒丙午七月十八日也沂生永樂甲午二月二十五日壽七十有三計聞深見悼惜贈特進榮祿大夫太傅諡文毅遣官諭祭者四命有司營葬如制嗚呼始終榮哀至矣公諱輅字弘載號素菴姓商氏始祖諱瑗宋嘉祐間自西夏都知兵馬使來歸賜地於邑芝山子孫因家焉三世俱以蔭補官至祖敬中考仲宣咸因公貴累贈資政大夫兵部尚書兼翰林院學士祖妣胡氏妣解氏俱夫人公幼穎敏卓越宣德乙卯以壁經發解浙闈正統乙丑會試俱第一授翰

林修撰尋命進學東閣務期大用繼選經筵展書遂命進講已巳升侍讀擢入內閣時英廟北狩國勢危疑妄有倡議南遷者公力沮之虜逼京城公與文武元僚經略戰守遣官撫輯旬居之虜徵各邊師選兵入援揭榜賊營購虜猶偽為喜盜報誘禽也先書故遺於虜營虜得榜與書故自相疑遁明年景泰紀元之秋往迎英廟回鑾於居庸關草詔稱旨賜酒果馬疋既而錦衣盧指揮妄言南內事窮治不已公言此不足信獄遂不竟壬申初議易儲公謂此國大事有皇太后在上臣下誰敢議此明日有旨會多官議附和者眾公爭不可踰歲鍾同章綸相繼請復儲下獄禍不測公因召對力救綸竟得免丁丑春景皇帝不豫公即與陳公循倡請復儲以繫人心不允繼具疏公援筆增二語陛下為宣宗章皇帝之子當立宣宗章皇帝之孫擬詰且進至期變作正月十七日也先帝復辟首召慰諭且問改元公對當同循等具請裁定又明日權奸嗾言官摺撫再劾坐免朝廷尋知非辜欲復用不果公家居怡

然養母訓子杜門不出及復起首疏八事舉切時弊戊子以地震乞罷諭以方託調變豈宜去是夏詔議慈懿皇太后葬禮公同彭文憲公力言附陵耐廟理不可易至率廷臣伏闕泣請卒從尋因彗見言官有所誣詆公力求退奉旨朕用卿不疑何恤人言至詰責言者唐太宗用王魏朕用商輅何不可欲加譴調公言臣嘗勸優容言官已荷嘉納如修撰羅倫復請召用今因論臣而反責之如公論何特允所言召公至榻前勉慰再三尋升尙書仍兼學士蕃酋滿四叛官軍往討未下廷臣規再出師邀公有危語公與同官執不從未幾捷至上喜賜公等俘奴各一己丑冬燠公陳時政之弊辛卯冬彗見復疏八事壬辰以天下水旱相仍請省科斂減力役寬兩稅弛利禁悉從之是冬奉敕續修資治通鑑綱目乙未夏進兼文淵閣大學士丙申加太子少保改吏部賜冠帶一品服時禁中建玉皇閣公論毀之又請建儲尋因黑青見極陳時弊丁酉兼殿學士時內城注直創西廠刺事權傾中外公與同寅

指斥激切卽爲革罷公亦決於去遂得辭公配盧氏封夫人先卒敕葬邑西山之原子男三長良臣第進士仕至翰林侍講先公兩月卒於京次良輔以公蔭授禮部主事孫男四汝謙國子生汝順邑庠生汝晉汝泰女四曾孫男四良輔將以卒之明年某月某日奉公柩啟盧夫人之封而葬焉前事以太常卿兼學士王臣所述事狀屬銘直公門生素承愛重方聞訃悲慨不勝銘何敢辭惟公丰儀山立襟度淵澄詞氣溫徐平居敬慎不懈接人恭遜早擅三元旋登內閣以經濟爲己任以薦賢爲首務閒論古今治亂事機得失賢否亶亶不倦文牘盈案裁決如流中遭誣開夷然不校權奸旣敗事白復起倚毘益切建明良多一時儉玉構傾舉無能爲卒之身退名完德業著于當時風聲聳于後世視古名相碩輔如勃之重厚崇之應變且之沈靜亦何忝哉先後蒙賞賚金幣冠服書籍鞍馬飲食之類頗腆而自處泊然嘗一主考會試五爲廷試續卷官皆稱得士於書無所不讀爲文渾厚雅贍詩主平澹不雕

刻有集若干卷傳於家蓋一代偉人宗工銘以昭之宜矣銘曰

天佑
皇明川嶽鍾靈篤生魁傑爲時偉人有偉文毅早擅三元薦登內閣參秉衡鈞展志行道克濟中興尋遭變故東歸角巾坦懷泊慮訓子奉親蠅玷自白寵命更新匪躬匪懈弼亮經綸因天仁愛讜言屢陳宸衷孚契海宇又甯明良魚水今昔奚頻羣比醜正力辯以貞松柏挺秀陰霾廓清倚毘方切其如功成辭盈戒滿奉身完名涼風曝日洛社耆英慶延哲嗣澤在斯民諸福克備始終哀榮流芳百世視此銘文

副都御史魯公墓志銘

能

尹侍郎直

都察院右副都御史魯公奉勅巡撫甘肅也甫下車卽嚴明號令簡閱部伍振張頷目補剔利弊兵備咸飭聲威遠著虜寇不敢南牧朝廷可無西顧之憂矣無何遽聞父喪請歸守制屬邊務方殷代者不至弗克輒離日尙墨衰從事摧毀勞劬形神瘠耗疾作不

可治卒於關內道之公館實成化丙午八月十日也有司斂襲如禮歸其喪計闈上深悼惜遣官諭祭命有司治塋域卹典厚矣其孤以予爲公同年素相善持同郡副都御史李克承所述事狀來請銘按狀公諱能字干之姓魯氏世居寧國涇縣曾祖通寶國朝洪武初以民兵守禦宣州有功升總旗十七年調廣東新會縣守禦千戶所子孫遂爲新會人祖諱保輒考諱真號素軒先生以公貴累封戶部員外郎妣周氏繼母陳氏俱宜人公資質端重性聰敏早嗜學素軒喜曰吾世武弁以儒業起家必是子也遂遣從經師遊年十六選補邑庠弟子員勤勵不懈學大造詣景泰庚午以書經領鄉薦甲戌登進士高第觀政冬曹時永興王薨公奉命營葬事提督有方事如期集還朝除南京戶部四川司主事天順戊寅丁周宜人憂辛巳服闋改戶部山西司初考績最推恩給敕封贈父母成化丙戌升員外郎明年以繼母喪去官辛卯起復改江西司壬辰考最給誥推封如制尋升湖廣司郎中癸巳升陝西布

政司右參議戊戌進右參政庚子升右布政使尋轉左使甲辰升
都察院右副都御史巡撫甘肅公歷戶部曹務繁劇區畫總理嚴
密而均適國用以舒司徒多倚重之在陝藩時分守臨鞏二府清
木縣城久犯虜寇卒至公親率官兵且築且戰城成虜自遁去
繼奉璽書總理八郡三邊糧餉都行二司屯種徵運以時遠近有
等而民力不疲每歲戶部給來糴米銀數十萬兩舊多乾沒於權
要公估直分糴會合無虧而兵食以足創會計堂一所於公堂之
左凡民徭邊儲洎王府祿米所當預計者則集僚佐疇度其中務
在均節官民兩便故歲雖侵無稽連甲辰陝右亢旱不登民相食
公虔禱羣望百方區畫古今救荒之宜舉行殆盡由是多所存活
雖閒至死不怨而一方卒賴以無虞公之力居多朝廷嘉公勞勩
肆有巡撫憲臣之命是年十月也公生宣德戊申九月二日娶羅
氏有淑德子男二長文衡次文鑑嗚呼公爲人溫厚坦易慎交際
口不道人過失至論公事則執定見侃侃不回職所當爲鞠躬盡

瘁歷官三十餘年位躋二品甘嗜淡素如布衣時蓋志在澤民安
社稷而已銘曰

嶺海之間清淑攸萃允毅魯公穎越羣類早與計階甲科廷對薦
歷民曹國賦充倍出牧陝藩旬宣罔懈振張領目簡略苛碎屬歲
大侵百方振貸億萬生靈撫摩勞來民免流亡感激愛戴僉曰微
公此生豈再合聞以昭帝心簡在制曰爾能敵吾所懷乃遷都憲
凜凜風裁惠滿棠陰威行榆塞素志方伸營星奄墜卹典旣優弗
壽奚慨勒詞貞珉昭示永代

兵部尙書謝公墓志銘

尹侍郎直

皇上臨御廿有三年旣久於總攬洞鑑羣情乃赫然渙比繩違更
置一二大臣首召直於南都參典密務且起致仕都憲劉公叔融
正中臺繼擢李公咨德位冢宰公位司空劉公召和爲少宰黃公
文昭貳宗伯吾江右士夫素以剛介寡偶一旦聯陟輿論翕然稱
快子輩感激胥規誨矢心匪躬期不孤簡任而工部政務尤號猥

允公方去翰墨躬校案牘嚴句稽剔蠹弊謹物料出納之數正匠作通匿之罰工師宿黠者悉斥遣之不得近左右凡有營繕必計程期慮財用以授屬職廉能者董之故費出有經力役無困明年春公得痰疾在告三月上書辭俸優詔不允疾少閒亟出視事病復作是夏五月十九日夙興盥頰訖衣冠出坐小齋溘然而逝計聞上深悼慨特賻鈔萬貫贈太子少保遣官諭祭再命有司治塋如制蓋寵任方隆而遽不祿惜哉其孤紀以刑部侍郎何公遷秀所述公事行劄予銘天順庚辰予同考會試得公卷列之第三爲天下書經魁進試於廷英宗皇帝覽公所對策嘉悅之擢第一傳臚之且褒然眾中縉紳屬目閣老李文達公尤喜得人復有及第者輒曰安得偉器如謝某者乎除翰林修撰同庶吉士讀中祕書由是所學益博而精上初嗣統進公侍經筵被賞賚預修英廟實錄據事直書得史官體書成升左春坊左諭德加賜銀幣尤腆繼修續通鑑綱目時預修者僅十有四人公分修元史凡所褒貶一

依朱子書法多正前史之繆既成進御升翰林學士宴賚有加嘗因星變上疏陳五事一正宮闈以端治本二親大臣以詢治道三開言路以決壅蔽四慎刑獄以廣好生五戒妄費以足財用忠懇剴切多人所難言者丙戌同考會試甲午主考南畿鄉試鑒別精明得士居多戊戌皇太子出閣詔簡儒臣侍講讀公與焉庚子升禮部右侍郎凡制度儀文多所裁定前所未有者必稽經據史參以時制具爲儀注務使考行一時同事者咸推公練達故遷司空政績卓然有非迂腐者可比公諱一夔字大韶姓謝氏其先本晉太保文靖公安之裔世家南昌之古源祖永亨避仇匿姻丈王氏家遂從其姓及公貴顯迺請於朝復謝姓曾祖公政祖卽永亨父得仁福建汀州府推官俱累贈資善大夫工部尙書前母安人母范氏俱夫人郡推始授汀經歷以廉惠得民被薦升推官獻獄明恕正統己巳沙縣大盜起攻圍汀城勢熾甚郡推集民兵助闔帥守禦屢剽賊鋒圍既解官軍誣執村氓四百餘眾爲賊又爲力辯

得釋民德之尋卒於行營汀人建祠焉公嘗得告歸省先塋因往汀祠祭奠遺民迎拜靡然相愛皆歎公賢貴信爲郡推陰德之所致歟公娶鄧氏累贈夫人先公三年卒敢葬邑之某山之原至是諸子卜以某年某月某日奉公柩合窆焉子男三長綱鄉進士早逝次紀次經孫男五驥邑庠生驥國子生次鳳驊驥俱習舉子業惟公天資溫粹性樂易待人接物一本於誠未嘗有所忤故人無貴賤咸愛敬之尤篤於友誼有誤罹法網不能自白者必語所司爲辨之或材可用而淪抑下僚者薦諸當道不幸客死爲歸其喪或卹其孥又置義學以訓鄉族子弟置義田義倉以振貧乏皆仁厚之所推也公自少至老好學不倦所著述不爲奇崛雕刻之詞而溫厚詳雅類其爲人有古源文集若干卷藏於家初公從侍讀尹鳳岐先生游先生語人曰大韶他日所造吾不及也吾於文字閒見之矣卒以大魁官學士位司空文行功業所成若此先生之言信哉予少公二歲先入翰林及公一歲位予右願以座主見待

不少違然同官同事朝夕洽比幾二十年予乃出貳春卿改南都睽隔久之幸復同躋崇秩重期白首相周旋孰意永訣予尙忍銘公之隧耶然匪予銘其誰宜銘曰

皇明傑魁多出江右有偉謝公早鍾靈秀經史博通義理精究先皇策士惟公實裒華秩崇資榮躋顯授論思獻替蜚英騰茂纂書典禮正訛刊謬聖明勵精任人求舊賢碩彙興駕行聯筵公陟司空專裁紛糾宿弊以清人望以副惟公先君式遏亂寇開釋非辜陰德實懋公食報宜蓋自天佑名位旣崇胡弗遐壽壽雖弗遐卹典優厚天匪昧茫殆昌厥後勒銘賁幽永世無朽

皇明名臣琬琰錄卷十四

皇明名臣琬琰錄卷之十五

后集

昌寧伯壯敏趙公墓志銘

勝

尹侍郎直

國朝膺天御宇百二十載內安外攘豐亨熙豫固由聖明繼作於上而亦文武夾輔於下之所致肆惟英桓果毅之才瓌偉頎碩之資入則纓冠珮玉位保傅議百辟出則縮章持節總師旅敵王愾使朝廷有所恃而安夷狄有所憚而不敢發者蓋世有其人焉若太保兼太子太傅昌寧伯趙公其一也乃茲已矣嗚呼惜哉公諱勝字克功姓趙氏系出漢充國之裔世居河朔至伯父赤考再興國初始徙家永平之遷安遂占籍焉太宗文皇帝靖難師興赤以謀略從征有功授永平衛百戶沒於戰陣無嗣再興襲升千戶永樂庚寅北征大破虜酋本牙失里殺敗阿魯台餘眾升指揮僉事洪熙改元復以征虜功升指揮使尋卒公襲甫髫鬣賴母王夫人矢節育教底於成立恆念父遺言我生為壯士而志弗就爾長須努力報國亢宗毋負奇男子也由是刻志勵行事母極孝敬始終

無違禮正統己巳虜寇犯京畿公率兵出西直門扼其衝突躬履
戰陣斬馘無算虜遂奔遼景泰庚午擢僉都闔名以發聞英廟復
辟錄公舊勞加僉前軍都督府事佩刀侍衛天順戊寅選管三千
營操辛巳秋曹孽叛逆公擒獲居多遷都督同知時虜寇深入陝
西固原公充左參將率師往勦敗之今上嗣統命兼果勇營典
操推恩給誥進階榮祿大夫褒榮三代成化乙酉重建承天門公
董軍應役既訖工適山西邊徼有警命公佩平胡將軍印統軍往
援次鴈門關報虜已遁乃還明年秋往征延綏河虜酋聞風渡河
趨大同納款入貢師旋即命典操耀武營戊子夏建州毛憐海西
諸夷弗靖廷議請以公總鎮之乃佩征虜前將軍印仗節以往至
則申嚴號令簡閱軍士調度有方屢奏克獲賜敕獎諭辛卯春召
回總典五軍營壬辰春調三千營是夏至甲午秋兩奉制敕佩印
總師北征虜輒遠卻丙申總督軍士濬築京城垣塹兼葺西直門
城樓升後軍都督府左都督戊戌冬加太子太保癸卯秋敕封昌

靈伯歲食祿千鍾丙午冬加太保兼太子太傅丁未春皇貴妃萬
氏薨奉敕董工造墳於天壽山之西南朝夕督視觸冒寒暑邁疾
輿歸遂不治是歲七月朔也訃聞當世惻然嗟悼特賻鈔二萬貫
給蘇苾白口有差輟視朝一日敕所司爲造塋域遣官諭祭者屢
追封昌靈侯諡壯敏卹典渥矣公生永樂庚子後正月之朏享年
六十有八曾祖寶山祖保洎父俱贈榮祿大夫同知都督府事曾
祖妣閭妣王及原配李繼冉俱贈夫人先卒葬昌平縣太平鄉之
原子男一瑄以舍人選侍春官詔賜冠帶先公一年卒女三長適
都指揮白璽次適定西侯蔣公仲子驤孫男三長鑑恩授冠帶次
鉞次錫女三曾孫女二俱在室鑑衰以卒之秋八月日奉公
柩啟夫人之封窆焉前事具公世出行實請予銘維公早襲勳階
斃子乃克篤志奮興閑習武略涉獵儒書累膺簡命佩符建節東
征北伐英威勇譽聳聞夷狄所至虜輒聞風奔遁靡敢抗拒乃不
窮追遠襲僥功啟豐所謂不戰而屈人之兵厥功懋焉矧平居總

操督工簡教有方卹撫周至士卒感悅立朝行已慎重無違縉紳
推敬朝廷倚重凡奉敕遣出辭還見輒有白金文綺寶鏹餼醴之
錫蟒衣玉帶歲節恩意尤夥而卒也賻襚葬祭封爵加諡有隆無
殺始終榮哀何其盛哉余與公同朝久知公深去秋參典邦政兩
偕公考閱武學官舍諸生相歡竟日益見公之忠亮端凝信爲國
之干城而於古之名將奚忝然則銘於子宜銘曰
皇明奠安泰山盤石曰惟文武篤斐勵翼桓桓趙公系出充國世
有聞人儲休委澤粵若公考早世兄職從我文皇勳階累積公自
幼孤式克修飭武略究通體貌軒特虜寇薄郊慨然舉檄乃率虎
旅乃肆鷹擊乃僉都閫英譽炫赫先帝錄勞崇登顯陟出則總操
入則侍直今上倚毗寵恩彌益屢佩印符屢奉制敕東征北伐所
向無敵或聞風遁或受俘馘恬不邀功邊不啟隙惠周司徒威襲
夷狄帝曰汝勝久樹勳績予維汝嘉其進封伯公拜稽首曰敢忘
德報德維何委身戮力營星俄隕尙勞敦役計聞九重良深痛惜

卹典渥優哀榮何極太平之原鬱鬱松柏最跡勒銘永賁窀穸昌
寧之號於昭千億

戶部尙書陳公神道碑銘

王文肅公

成化壬辰夏六月辛卯南京戶部尙書陳公以疾終於位今制凡
兩京文武大臣喪朝廷必遣官諭祭命有司營葬至於勳業位望
之炤灼者又益以賻贈之禮凡此皆公所宜有而必得者南京戶
部旣以公訃聞其叔子鵠遂奉柩去歸其鄉以俟命焉公諱翌字
冲霄鳳陽虹縣人其先居朱陳村宋季徙彭城今居虹縣者又徙
自國初祖敬先考鑑皆以公貴累贈資政大夫南京戶部尙書祖
妣妣皆夫人公幼有異質先考尙書公指以語人曰吾家世農業
人知吾所治者稼而不知種德吾兒其稼之獲乎宣德壬子中應
天府鄉試正統丙辰會試中進士第授行在戶部主事歲己巳虜
寇犯邊王師北征命往永平等處備芻糧永平圻內郡征輸繁重
民無宿儲公百方區畫民不厲而兵饒給還奏稱旨復出內帑金

數萬兩命糴粟遼陽實邊廩竣事升郎中尋奉璽書督漕江西先是歲賦皆卒伍漕輓時朝廷用武始更以民有司承望風旨嚴程趣辦民殆弗堪公曰賦無後期足矣奚以亟爲乃循行郡邑求得其富厚者俾具舟分漕且諭之曰此一時權宜爾師還當無爾勞眾樂從焉景泰初上崇孝敬錄忠義備財用清贓罰申舊典體羣臣六事未報聞尚書公計乞歸三司御史交章留之上命公卒事公遽已馳歸喪次聞命復往督漕抵京師而歸服幾終會上命廷臣舉堪任方岳者僉以公對卽其家拜山西右布政使馳傳赴任公問民疾苦爲蠲其逋稅至十餘萬石民素利五臺山木至是有禁公弛之樵蘇自若鴈門旣設兵守禦益戍以民咸釋之使歸農業公旣厚民生謂可以役其力矣始於其暇日築忻州城除道通平西嶺又感發其良心俾修陽曲諸廟學蓋民不知勞而頌有德者至多不容口英廟復辟召還拜都察院右副都御史給從二品祿巡撫寧夏時西邊連歲用兵民罷敝甚公拊循之又籍其貧甚

者計口給食奏蠲逋租之累里正者寬兩稅抵輸布帛厥貢果實皮革諸物皆乞權罷之其地故有宣聖廟祀禮與中州等頃歲儉止行釋菜公曰其實幾何而用以化導邊氓其利溥矣俎豆之事吾何敢廢亟復之久之孛來入寇邊將失利虜勢猖獗公檄諸部固城堡繕器械募材武士爲土兵參以官兵守要害旣而朝廷命將出師虜始引去西師解嚴公乃上章乞省墓不允然上亦念公在邊久思有以少休之矣未幾升南京戶部左侍郎今上卽位敕公總督京儲及屯田諸務公始至會臺臣建議令諸司察舉其屬公首劾罷其不事事者數輩而薦用其才且賢者廩庾廢壞其修復之資咸取具軍役而公有餘材則積以待敝公曰糜有用之物困無告之民吾不能率於吏議以隱忍於心也卽日以便宜從事人謂公一舉而能除數十年之弊復因災異上卹民力錄囚徒裁省鹽糧俸鈔三事丁繼母憂賜葬祭旋命起復公懇乞終制祥禫召還京升南京戶部尚書總督如故三年乞奏最上以其兼領諸

務止之賜誥命進階資政大夫公至是功業既成精力向衰在他
人若可以少自暇逸而公感知遇期於盡瘁每晨興入公館治事
食頃詣臺迄日旰未休屬僚文移趣辦不少貸卒之以此成疾疾
甚猶日省署不廢嗚呼必如公而後可謂無負於委任矣公爲人
嚴偉立朝稜稜有風望自爲郎署人已憚其剛直無敢有忤之者
及出更藩鎮入踐臺省位敘日高年德日茂晚生後進以得公接
納爲幸而小官下吏趨走聽令有莫敢仰視者矣公生於永樂甲
申壽六十九配李氏封夫人側室樊氏朱氏五男子鳳沂州判官
鸞虹縣陰陽訓術鵬義官皆李出鵠國子生樊出鶚朱出三女其
長者嫁郭宣錢宗季在室孫男五公之卒也其同年友南京戶部
尙書崔公既經紀其喪復述公履歷以授鵠俾持以乞文於予將
立碑神道予雅辱公知愛公之妣文夫人喪嘗忝執筆爲銘今於
銘公又奚辭其葬以卒之年十一月壬寅其墓在邑西南沱河之
陽銘曰

維古大臣以道事君道用於時惠利在民烈烈陳公遭逢列聖煌
煌兩疏詞嚴義正豈不公用人孰究知其所知者公之緒餘秉德
懷成初終一節何歉於公元侯大臺沱經夏邱爰墓其陽勒銘穹
碑永永不亡

副都御史盛公墓志銘

邱文莊公

英廟復辟之初權臣之冒功者朋比爲奸鑿空起邊釁欲樹奇功
以蓋其迹率師闖塞卽還虜因乘之而入十三道御史欲有言同
事有洩之者彼先入愬於上誣御史中有與被繫內臣張永同族
者欲爲之報復以激上怒卽逮所誣御史下獄明日眾御史章始
上上御便殿召眾入盛氣待之擲章付御史誦之至半上曰止摘
章中所條事折之令其分疏復諭之以終誦上意稍悟然重違權
臣意姑從輕典凡列名者俱調外任其一人錫山盛公也時掌河
南道事出知保定之束鹿縣先是權臣啟邊釁其勢燄可畏人無
敢言者公首與同官涑水張公鵬謀謂事干軍國某等官臺憲烏

可畏禍不言張公以爲然卽入謀之兵科都給事中王鉉約以章交上機事因之而失時聯官者皆未知也亟召入永平周公賓倉卒誦所上章音吐洪亮略無阻滯及對上之言詞直理正天下聞而壯之而不知首啟其謀者盛公也同日出補外者若干人其後惟盛公年最高官最顯而能以令德終嗚呼天於忠直之報固獨厚之耶公諱顥字時望常之無錫人正統辛酉以尙書蔡氏傳得雋京闈在太學十年所交皆海內知名士景泰辛未始登進士第首擢河南道監察御史尋以老成掌道事時初經已巳之變朝廷懲前政委靡之失稍開言路一時言事者毛舉細故攻訐陰私以張直聲公獨顧大體惜人才掩其疵疾不爲已甚善類賴之嘗兩奉命出按治按淮時值歲大歉發倉振貧全活者甚眾按閩時適當大比拔賢振滯是科得人爲盛及是首謀摧折巨奸直聲凜凜聞天下其知束鹿也邑多顯宦往往怙勢爲不法聞公至相戒曰是嘗劾奏石總兵者其人不可犯也公變搏擊以爲撫循吏畏而

民安之未幾丁內艱去民留之不可俟其服闋相率詣闕乞公公得再任不復用刑法有爭訟者諭之以理輒叩首聽受不復辯鄰邑聞之訟多年不決者各來請判於公公折以片言各心服而去時人有清如水明如鏡之謠邑介真保閒四境之民雖非所治亦聞風趨赴郊外有荒地自然聚以成市邑人因目爲清官店旣去任民築亭爲立去思碑請文士爲作記至今存焉歲甲申擢守邵武行所無事不動聲色而郡大化旣而巡撫都憲以延平民狡而事繁請於朝移公治之延平與邵接境聞公政聲有素莫不革心向化巡按御史錄公兩郡政績請旌異於朝進公一階封贈父母及妻癸巳升廣西參政專督糧餉丙申升雲南右布政使丁外艱服闋改陝西尋遷左時廣西殘破之餘公委曲措注民夷賴以不擾陝西地臨三邊公在任日邊報無虛月適歲多歉公調度有方而餽餉不缺入爲刑部右侍郎佐其長以明刑恆舉歐陽公求生不得則死無憾之語爲寮屬告有深文巧詆者輒不樂之刑用是

平僅再閱月調公南京蓋當道者之鄉人有欲得公處者或以爲言公曰吾南人往官於南固其所也明年山東旱飢盜賊將乘之而起廷議建遣大臣巡撫僉曰無如盛時望者改公都察院左副都御史乘驛往命至公即日就道甫下車禱於天雨即大注枯稿復甦公多方設法凡前人救荒之政於今有益者次第舉而又因時之宜條數十策行下所司民賴以濟振卹之餘所儲尙百餘萬又有餘力以及於前代聖賢有功於齊魯者爲之建祠宇以報祀之公山東之政大抵以黜貪暴表忠良除苛政以固民心爲本在山東者三年齊俗翕然以變年近七十以老疾上章乞致仕上以其情詞懇切從之馳驛歸至徐州適所部有大獄以公知其始終有旨命鞫之獄成後歸公自家食時家事一以付其弟頤至是抵家伯仲怡怡友愛加篤公於家事一不問頤爲之構方塘書院疊山鑿池蒔花植竹以爲娛老之地公時靜坐一室焚香讀書以自適泊如也歲丁未以上皇太后徽號恩進公一階家居者六閱寒

暑以歲壬子正月二十六日卒享年七十有五訃聞賜葬祭如例卜以是年臘月六日葬於惠山之原弟頤命其子虞持狀來京師求余銘按狀盛世常州右族世多聞人曾大父諱茂之大父諱子實父諱文珪俱以公貴贈都察院右副都御史祖妣吳氏妣馬氏俱贈淑人公凡三娶殷氏贈淑人顧贈恭人何封淑人子男三唐義官龍蔭補國子生女三人孫男二銘釗女四曾孫男一女二銘曰公爲循吏仁中有義公爲憲臣義中有仁公撫邦國變荒爲熟公佐邦刑於死求生最其功業所在烈烈曰鉅而艱摧折大奸因銘及之補史之遺

浙江按察史楊公墓志銘 瑄 楊文懿公 守陳

天順初英廟復辟時廣西道監察御史楊公印馬於畿內民羣訴太監曹吉祥忠國公石亨奪其田若干頃公具以聞併言其怙寵擅權之罪詔稱公敢言稱職命吏部記之蓋將以大任也既而還京

彗孛連見祥亨二凶日益張十三道御史謀劾之有私泄於亨者
亨乃與祥合謀上譖暨彈章入上震怒召諸御史詣文華殿俾誦
彈章而歷詰之某道御史周斌與公同輩且誦且對歷陳二凶罪
狀明甚然天意入先譖莫能回悉下錦衣衛獄逼公誣引大臣刑
甚慘酷數瀕死卒無一語他及有司文致坐公死而十三道長皆
坐成餘多坐貶奏上矣會京城大風雹拔木壞屋走正陽門下馬
牌於郊外於是獄皆從減死者成成者貶貶者復而公就成遼東
之鐵嶺道遇赦還或謂公宜詣二凶謝庶免後禍公不可復謫成
廣西之南丹居五歲二凶相繼以逆誅公被特旨還里居今上嗣
位以言官奏復公舊官改陝西道尋升浙江按察副使居父憂起
復舊治巡海後升按察使卒於官自古亂臣逆黨必先淫刑重法
以箝羣眾之口而攝服其心俾莫敢不從然後逞其志此二凶所
以必欲寘公死也既而公幸生全二凶卒皆誅滅而公乃復於位
由天子之明足以別忠邪智勇足以定禍亂故也公姓楊諱瑄字

廷獻南昌豐城縣人其始祖曰王君權唐季相南平王累官金紫
光祿大夫居南昌之武寧傳十有五世曾祖回仲猶王姓國初徙
豐城占籍始訛爲楊蓋其方言王楊無異者故也公祖名高不仕
父子榮以鄉舉累官蜀府左長史母周氏公以甲戌進士爲御史
僅兩期而罹二凶之禍再起爲御史歲餘遂副憲於浙杭州衛指
揮陳鼎父子肆凶惡海鹽民管簾沈琦工詆誣皆莫敢孰何公悉
寘之法屬府造上供紙歲若干萬工估價每張銀一兩公計量織
悉減十之九歲省銀若干萬兩民德之其巡海道以軍官多放戍
卒嚴禁之立五日一操點之法以邊餉太糲而屢空爲革勢豪攬
糧之弊奏增一通判專理以武臣多不學無識爲葺學延師教其
子弟凡城隍墩堠廨署舸艦兵甲皆以次繕葺之無遺餘力及定
海之城北捍海塘縣西走馬隄霸衢所之裏外海塘健跳所之海
塘海鹽縣之大海塘皆修築之以奠邑居以興民利而海鹽塘踰
二千三百丈工尤鉅禦患尤大非公莫能爲也在杭州以按察司

卑隘逼塞迺撤舊宇改創數百楹穹鉅偉麗闢其前衢廓然四達以西湖舊深廣能溉諸邑田至十六萬頃今湮過半奏請浚深之如舊防於湧金門北關水門放湖流入城河出清湖閘抵海寧黃灣以溉十六萬頃田復於畏吾寺前後建三橋以通水門俾小舟常入湖取淤泥以濬深可久不堙功雖未就慮則深遠矣公巡海數歲波恬風息成化丁酉春忽報倭船數百犯邊公時在杭寮案驚問公徐曰彼果來犯吾將盡誅之乃出巡至寧波府衛已戒嚴守令呼民壯投甲林立矣公謂曰海上甲兵自足內地不須虞安用民壯今農事方殷亟散之至定海數日迺知倭僅兩船入貢耳於是皆服公之智量其爲按察司以憲度久弛力振之嚴門禁察吏奸斷訟明敏無畱獄禁官署毋桑蠶以爭民利諸婦女毋入寺觀以隳風俗甫半載而病病寮案往問尙與論築海塘之法浚西湖之利無片言及私成化戊戌七月朔日卒年纔五十有四耳公疏爽有志節喜建功業而才足勝之視天下事無不可爲者然賦

命不永而止此無不惜之公娶計氏封孺人生三男長源縣學生次淮次潤側生一男澮最少卜以某年某月日葬某山原以余與公有雅持憲副胡君榮狀請銘余讀狀至天順閒二凶事爲之慟哭流涕不能已豈獨爲公悲也哉嗚呼正統之末社稷非景帝莫可保而一時竭忠殫勞者皆可謂社稷臣也二凶於是時亦受恩不貲富貴極矣而勞蔑如逮景泰末誠可謂惠懷無親者矣天下非英廟其誰歸而二凶者貪天之功弁髦景帝魚肉其社稷之臣殆盡此余所謂痛哭流涕而不能已也嗚呼二凶是舉豈直要功以固位而已哉蓋以圖改玉之兆也於是勢燄炙天孰敢一睚眦之而公露章顯斥濱死而不易辭可謂忠讜之臣矣曾不數年而二凶者身刑家戮遺臭無疆而公乃高陟令終流譽千載豈直薰蕕之辨而已哉嗚呼使二凶不自作孽則國家無釁而貴富延及於來胤未已公非以忠讜著則須有他表見豈能若今之焯焯後世決不可潛哉是亦足爲萬世人臣之自戒至勸矣余修國史旣

嘗書之然春秋之法辭之重言之復必有大美惡焉故因源請重
書之併及其勳業之著者其他文與行皆略之銘曰
人與萬物生天地中惟厥性貴不與物同父子之仁君臣之義是
惟綱常允不可離有或離之以肆厥欲宜兩其趨宜四其足策名
委質以服事人有死無二是名曰臣烈烈楊公事我明辟豸冠繡
衣實有言責視彼跋扈害國殃民忍不能默飛章奏陳彼曰鴟張
志將改玉凶燄炙天莫或敢觸公草白簡以率其僚歷數彼惡願
肆諸朝天威之嚴國典之極濱死不渝厥心惟赤爲國之故以忘
其身是曰忠讜庶幾誠臣瀕死而生入幽而顯帝心孔昭天道不
遠公有巨才亦有嘉行有學有文有繁厥詠我皆略之不書於石
獨揚一忠以勵百辟華嵩可夷滄渤可湮惟忠讜臣億載不泯

皇明臣琬琰錄卷之十五

皇明名臣琬琰錄卷之十六

副都御史楊公神道碑銘

王文肅公

后集

都察院右副都御史無錫楊公以成化十年四月二十七日卒於
河南之行臺壽五十有九訃聞上命驛舟歸其櫬禮部諭祭工部
營葬公之子紳卜以是年十二月丙申奉柩葬神獲鄉長腰嶺新
阡乃具事狀請銘其神道之碑公諱璿字叔璣自少穎悟喜學正
統戊午中京闈鄉薦已未登進士第尚未授室乃以假歸還朝拜
戶部主事升郎中累遷山西參政陝西右布政使河南左布政使
命下公已聞母喪服除召爲戶部侍郎入謁改都察院右副都御
史奉璽書撫治荆襄流民巡視北直隸節制永平山海密雲居庸
等邊關巡撫河南敍歷中外幾四十年以勞瘁乞休章再上不許
崇王之國郊迎感寒疾殆甚猶曰就卧榻治官書郡縣吏白事戒
直入卧内口占酬應敕至命加公服猶強起不能支頃之遂卒嗚
呼公可謂盡忠於國一息不懈者矣公才質通敏負器局論事果

現王后金一
斷無姘阿態在地官爲大司徒金公所器財賦出納凡經公籌畫
不復訾省在山西徧歷州郡覈實戶數立上中下三等法均其徭
役民用利便奉敕督輓軍餉二十萬石實邊廩事集而人不知勞
陝西地控三邊動輒有警往歲西夏用兵芻粟轉輸皆公調度洪
渠水溢涇陽縣治堰以殺其勢振恤匱乏存問熒獨其治民如山
右而加勞焉蓋在山右者八年在陝五年而有河南之命先是流
民嘯聚荆襄南陽山谷聞以百萬計朝議求堪任拊循重寄者僉
宜於公故上始欲任公典邦賦尋撤公以去授以峻秩加賜寶鏤
公單騎直抵其境勤宣帝命周行振贍留者占籍去者羸糧遠邇
晏然未幾有盜起房竹縣境相挺剽劫公曰是曹殆困於饑寒者
猶撫諭之弗從乃請加兵俘獲數千人眾議謂當揃刈公持不可
曰殲厥渠魁脅從罔治此上意也第戮首惡數人餘悉縱遣之是
歲畿內八郡歲凶公開命兼程以進首閱預備四倉空無所儲百
方營聚有司怠於趨事者公繩之急而豪宗鉅室又憚公勸分遂

騰口肆謗公一無所顧惟汲汲以康濟斯人爲務比移河南先聲
所至人益慕賴化行俗阜上嘉念公寵賜綵段四表裏而公亦感
上知遇益勤於事剖決無滯日力不足繼之以夜所至數求人瘼
搜剔吏弊禁游末抑豪右奸究屏跡而善類知勸公天性介特與
人交不苟合始舉進士鄉人有爲中官者氣燄熏灼人趨之恐後
公絕不通問家雖富饒其自奉極清約祿俸所入分給姻族一姊
嫠居時加問遺二兄傾逝厚撫其遺孤子而處諸弟篤友愛塾師
夏處莊匡文佐卒亦卹其後嘗闢義阡葬死無歸者蓋公旣豐顯
從弟叔瓛亦起家甲科歷官郎署羣從子姪或輸粟補官或明經
擢科後先相繼父每以盈滿爲懼寓書戒之俾知嚮義故公平生
所爲多義舉其性尤酷嗜文史殘碑斷碣打搨殆徧見異書必重
購得之作爲文章渾厚沈著於詩尤有思致遇佳山水詠眺終日
公退手不釋卷蓋其嗜學之心久而不倦中歲既有退志遂題其
居曰宜閒有宜閒集若干卷藏於家其先世有令德曾祖廣元季

舉義保障鄉邑時識者已占其後必興祖原振考宗淵皆以公貴
贈通議大夫都察院右副都御史祖妣張妣朱皆贈淑人配唐氏
由安人累封淑人子男一卽紳以蔭補國子生孫男一曰昂公自
束髮卽有志天下濟世康民之具皆其素蘊嘗與其僚南劍黃琛
西蜀陳价三人者以意氣相期嘗曰使吾輩爲朝廷獨當一面憑
仗威靈徇以驅馳功業之成期於不負後三人果相繼爲方岳陳
仕至都御史黃卒官戶部侍郎出入朝著卓然與公相望質諸前
言不爽毫髮傳曰事君先資其言拜自獻其身以成其信如伊傅
管樂是也嗚呼使天假之壽考上信任不衰其所就不庶幾古人
已乎銘曰

天佑聖明英賢挺生發名成業爲時股肱地方劇曹岳牧重鎮肅
肅蘭臺秩號雄峻士霑一命亦足爲榮公於其閒屢踐屢更步履
所至茂隆聲實維皇聖明嘉乃丕績邦計所屬錢穀委輸黍累絲
棼待用無遺暨歷雄藩於秦於晉或專或禕厥聞大振民有父母

國有屏翰公宜久任遽罹家難入貳司徒既有成命屬茲流移須
公撫定回授中丞秉鉞南征公霽其威仁施惠行弄兵潢池何物
小醜苗蕩髮櫛微公孰宥邦畿千里凋瘵以蘇越茲大梁載道歡
呼公官雖進而志則退天不憖遺邦國殄瘁訃音來聞哀感宸極
賻奠有加肇建瑩域華皓一節哀榮始終銘以美辭以詒無窮
戶部侍郎馬公神道碑銘

王文肅公傳

南京戶部左侍郎致仕馬公以成化壬寅十二月廿四日卒於家
訃聞上命知和州葉睦諭祭進士王琳營葬有日其子永賢乃持
葉知州狀謁予請銘公諱諒字子諒其先汴人六世祖必興仕宋
江淮統制因家於滁之全椒必興生天麟元江淞儒學提舉高祖
正甫龍興路學教授曾祖信叔登延祐進士第元季倣擾伯祖九
成舉義從太祖高皇帝渡江累建奇勳授金牌萬戶與陳友諒兵
鏖戰鄱陽湖死之上憫其遺孤賜居和州故今爲和州人祖九思
考雲以公貴贈通議大夫應天府尹祖妣鄭氏贈淑人妣徐氏累

封太淑人公生之前一夕太淑人夢月光入室叔祖澤聞而異之曰顯吾門者必是兒也自幼聰穎絕人書數百言過目便能成誦七歲入家塾十五入州庠初習書禮二經後專攻於詩宣德壬子領鄉薦癸丑中進士第觀政戶部督賦廣藩丁外艱服除授行在吏科給事中數陳時事闡切知大體奉使山右封藩王恪謹禮儀賞賚一無所受正統甲子升山東布政司左參議景泰辛未升應天府尹天順丁丑升南京戶部左侍郎三月奉表賀闕下陳情歸省有寶鏹之賜六月丁太淑人憂庚辰召至京涖事戶部壬午復南京戶部癸未滿九載上疏乞骸骨詔許之蓋公尹應天時嘗忤權貴思有以中傷之久矣至是以公老疾爲言而公年纔五十八實未老士論惜之公爲人精敏究心吏治其始至山東也循行郡邑訪庶政得失察百司賢否廢興黜陟悉協公議會河決張秋朝廷雖遣大臣治之然分理之務多出於公水訖不能爲患正統末胡虜犯邊降虜安置山東者欲乘機爲亂朝廷憂之以敕諭三司

戢民守誠公曰此敕不可使聞於眾俄有馳生禽胡寇文移至者乃集眾諭之眾咸帖服民有惑於後妻而欲置子於法公喻其父母曰昔夫子爲政誅少正卯而宥不孝以教令不明也今爾子有凶德乃吾屬教令之失非由爾民之罪也其父母感悟遂請釋之還爲孝子有民婦與父兄有隙而縊殺其子姦人之婦而殺其夫匿其碑券以強佔民田盜米廩餘地以廣其居皆久訟不決公一訊卽狀其辜歸其侵地而於負寃者尤力爲辯雪比至應天府事填委公裁決如流案無畱牘溧水民素健訟一日投牒至八百公視其虛實而異置之召訟者曰某也實某也虛虛則受笞實則待勘民願受笞者十七八待勘者不一二焉其俗人死而利其妻者出棺斂之人已出棺復有載棺至者妻欲嫁後至者用其棺而先歸安用令爲乃杖出棺者以棺給貧民而歸其妻於所親使俟終喪別適焉六合貧民與其弟妻同劫人三斛粟事覺當棄市公曰

以三斛粟而殺一家三人吾不忍也乃爲出其弟妻其人臨刑號
於眾曰吾死無所憾但吾尹之德無以報爾句容有因人死而棄
毀其屍者所司擬以支解人罪獄上公不可曰死後棄毀詎可與
生前支解同科爲輕減之先時堂鈔獨歸於尹凡有供需悉出倚
郭二縣民不勝擾公至一無所取分給僚屬之餘則儲以備燕饗
饋贖又積其餘以爲工傭之費名曰公餘錢凡重建府治修葺廟
學創立貢院皆取給於此無勞民傷財之患旣而擢貳地官曾未
越月綱紀秩然政有未便者條陳於上苟益於時無所顧忌先是
爲參議時陳撫安軍民五事府尹秩滿陳卹民十三事朝覲至京
又陳便民九事上覽疏嘉之多見施行蓋公歷官中外餘三十年
門無私謁謝事而歸囊橐蕭然田宅讓諸弟姪別建居室少買田
業治常產而家無綱紀之僕多公自綜理暇則閉門焚香緝閱墳
典課子姪業明經而已當道至訪以時事輒謝曰老耄無所與聞
與守臣言無一語及私鄉人以請託至者拒絕之或以利動則曰

吾後事具矣安用此爲其清節雅操至於老而不變公素感末疾
至是復作召子孫語以後事姻戚以候疾至者亦語如平時乃促
沐浴衣冠端坐而遊春秋七十有七卒之又明年正月丙午葬歷
陽山祖塋之次配王氏封淑人先十四年卒子男二長永賢王淑
人出成化甲午中京闈鄉試次永年國子生側室出王女孫男一
曰中公爲人厚倫重誼以孝事親恭兄友弟撫遺孤接族姻皆篤
於恩意與人交惇尚道義處同寅和而有節御屬吏嚴而不刻故
其處爲名士其出爲賢臣德器修於家勳業著於朝名聲彰於時
雖去不待年用之不究其才然舉以儕之古哲聞人於公復何歉
焉是宜銘銘曰

馬氏世胄實基於汴滁和再遷繼世逾顯維公祖考蓄德弗施慶
鍾於公乃荷寵綏公才夙成決科從仕黃門顯秩銓衡是涖出佐
魯藩入尹舊都帝曰汝賢貳我司徒輔理宣化裕民足國曾幾何
時有焯厥績北臺之召尋返於南去險卽夷公志所甘公年未耄

超然引退讒間雖行君子所貴古有名言保晚節難幽室全歸亦
罔後難寵終有恩裕後有澤太史作銘垂耀無極

副都御史吳公神道碑銘

珠

王文蕭公撰

成化乙未八月二十五日總督兩廣軍務兼理巡撫都察院右副
都御史繁昌吳公終春秋五十有一上悼惜之命有司葬祭如制
公之子約以明年丁酉正月某日葬公於邑汪冲山之原葬已走
京師謝上又命約入冑監以承厥蔭約感激上眷追念先烈期有
以表彰之遂奉其鄉人威遠知縣宣達狀以神道之碑來請嗚呼
予與公同爲畿內人同領鄉書同第進士官兩京才名位望予雖
不及公遠甚至於以道義相期氣節相許固未嘗少間也公未終
之前數日嘗以書抵予賀予子沂擢第謂吾亦有子頗知好學伺
其成立當乞身於朝以歸從兄遊噫公之所以望於予者何如也
而今已矣晚節末路顧何所賴以爲規哉故於公之終旣爲位哭
之又爲辭弔之則斯文也非予其誰宜爲哉按狀公諱琛字與璧

號愚庵賦性警敏年十四補邑庠生日誦數千言爲文章操觚立
成儕輩莫敢與爭雄正統甲子以書經登鄉榜乙丑戊辰兩試禮
闈不利益勵於學一日方讀書嘔血數升母蔣氏驚往視之戒勿
復學曰脫以是戕生學亦奚爲而公竟不少輟但挽覆無使母知
居數年學大有進經史子集靡不淹貫下筆爲文益奔放不羈景
泰辛未登進士第援例還家畢姻先已久聯章氏蓋不第不娶至
是始娶年二十七矣癸酉秋拜雲南道監察御史奉敕往甘州犒
軍已亥巡按四川所至黜奸貪雪冤滯明達果斷蜀人懷之三載
給敕命封父聽如其官母妻皆孺人天順丁丑英廟復位武靖侯
石亨以功封忠國公專權自恣漸蓄無將之心公與同官劾奏之
忤旨補外知遷安縣五日天變雨雹命還公臺職尋被選居臺端
掌文案故事凡三司會讞獄囚十三道文移刑牒必擇老成諳練
御史二人綜理之蓋以裨總憲之不及而爲諸道之領袖古之雜
類也時公與同年高公明對筦五年臺中稱賢辛巳升大理寺丞

歲餘升都察院右僉都御史巡撫西陲莊浪去城四百里有地深入狄境前檢田者占數屯糧五千七百斛迫於徵輸軍多竄匿公首疏罪之西番扒沙巴哇等七族累歲盜邊撫之不服協同平羌將軍宣城伯衛公穎征勦之斬獲千三百級馬駝牛羊甲仗輜重無算賊平升俸二級是歲朝廷推恩加封父聰官都御史母蔣氏恭人成化改元還朝議事適四川妖人趙鐸謀叛改命公往討鐸敗中止泄臺事時淮陽荐饑尋命公振卹公勞心焦思凡事有益於救荒者率以便宜行之而言事多切直大忤權貴雖民賴以濟而公之謗滋矣明年春召還言官劾奏必置公於法公危甚賴天子聖明帝遷官南臺時代者都御史林公聰於公所行事一無更張且言於人謂公實有益於民無負於國於是其誣遂釋而聲稱益重來南未幾丁母恭人憂繼丁都憲公憂兩遭親喪哀毀踰禮再期不御酒肉四方賻贈一無所受朝廷凡兩遣官論祭公先以僉都御史三載秩滿至是始頒誥命進階中憲大夫加封章氏恭

人已丑服將終遣使齋敕卽其家授之命巡撫兩廣至廣纔半載代回南臺未至復遣使以敕授公巡撫湖廣時湖南已數月不雨民嗷嗷望哺公禱祈不數日雨霑足自是拊循郡邑間民疾苦窮荒僻陋之區無所不至凡在湖廣者五年威行惠施殊俗輯和會寧夏花馬池達寇入境兵部以公嘗在邊方熟知軍務擬奏巡撫陝西都御史徐公易置而湖廣鎮守三司又從民之欲兩上章畱公甲午有旨許畱進右副都御史適總督兩廣都御史韓公致仕朝廷求繼韓者僉謂非公不可於是掇公以去去之日都邑父老扶攜攀送齋咨涕洟而公亦爲之悲不自已當時士大夫言巡撫大臣能深得軍民之心如公者前此蓋未見也公至廣其撫民無異湖湘而於訓兵練士則尤加之意蓋嶺南寇盜矯虔其爲患尤非他方比也英德流民羅英郭瓊輩聚眾剽掠命兵禽之新會新興連界有劇賊嘯聚流劫村落餘十年公一旦滅其渠魁殲其黨與六百餘人猺獞聞之大駭相戒斂迹柳慶諸州其巢穴也公親

至其地檄召之許以自新詣軍門俯伏聽命者日以萬數公曉以禍福無不踴躍而去時識者又謂廣寇冥頑可以威情而不可以理論以理論之而革心向化如公者亦前此未見也公爲人勤敏自童艸至沒齒無日不雞鳴而起二鼓而寢雖閩外事叢酬應絕無壅滯少有餘閒博觀羣書以資聞識上自公卿大夫下至閭里後生書教往復靡不手答動輒盈幅初若不經意者而文理通貫情意孚洽雖屬草有所不及雖身居顯位其自處一以謙抑待人無貴賤必以禮處故舊無相忘有所饋遺纔及金帛輒辭不受其平生所得俸祿又日費於賓友教子姓衣食或不給身沒之後貲業蕭然視先公所遺不長尺寸娶恭人章氏先四年卒至是合窆焉繼妻鳳陽千戶任君女一子曰約讀書有成卽公所語予者今爲大學生四女長惠廉道戶部員外郎嚴君子瓚餘幼在室公先世歛人宋季諱伯繁者徙居太平之繁昌三梁山下公八世祖也曾祖可立祖廷升皆不仕其先世譜牒散逸公纂成之又爲家規

十八條以訓戒後人予爲之序公平主所著詩文多不存稿其存者惟愚庵集若干卷年譜若干卷上所賜璽書與公之奏議具在亦足以垂不朽矣銘曰

於赫皇明道治治隆列聖紹統羣賢奮庸暨我吳公官登侍近珥筆臺端接節邊郡遂丞大理荐陟中丞帝曰汝諧殿我西平屬寇搶攘將命中止淮人阻饑尋命往撫頌聲旣作流言亦興不擯於危賴我聖明比官畱臺出鎮南服湖湘救寧嶺海讐伏允文且武有煜其光人孰無死公胡可亡有亡者存有功有烈雖存奚爲有歎名節汪冲之原有碑墓門垂耀無窮跡此刻文

煇字晉之... 其... 公... 山... 州... 文... 且... 知... 院... 察... 升... 武... 節... 將... 軍... 正... 千... 戶... 甲... 寅... 七... 月... 備... 禦... 永... 昌... 考... 來... 口... 征... 哨... 哈... 刺... 脫... 歡... 山... 遇... 敵... 擒... 達... 賊... 首... 完... 者... 帖... 木... 兒... 等... 升... 宣... 武... 將... 軍... 本... 衛... 指... 揮... 僉... 事... 乙... 卯... 八... 月... 策... 應... 鎮... 番... 等... 處... 九... 月... 涼... 州... 破... 阿... 台... 賊... 兵... 於... 三...

皇明名臣琬琰錄卷之十七

后集

伏羌侯武勇毛公傳

鄧都御史

公諱忠字允誠姓毛氏先世蜀人曾祖始徙雍之武威祖諱刺國

初率眾歸附遂隸籍蘭州洪武丙辰沒於王事考諱寶以雄勇選

充總甲永樂癸巳收捕沙州叛寇老的罕加伍長甲午集眾隨駕

北征授昭信校尉永昌衛百戶並贈右軍都督府都督僉事祖妣

都氏妣皆氏並贈夫人公少膂力絕人善騎射年二十代父領兵

進征寧夏至賀蘭山後禽番王也先土於并部眾馬駝以歸永樂

甲辰復從北狩至半壁山荷賚與回衛甘州操備宣德庚戌九月

征曲先叛寇散即思追至恰思禽斬鎖南朵兒只等升武毅將軍

永昌副千戶癸丑八月征亦不刺山禽僞少師魯卜至伯牙忽僞

知院乞察歹升武節將軍正千戶甲寅七月備禦永昌考來口征

哨哈刺脫歡山遇敵擒達賊首完者帖木兒等升宣武將軍本衛

岔河禽偽千戶土昇十一月黑山禽賊朵兒別台升指揮同知賞
賚有加正統丁巳調甘州右衛操備戊午二月達賊朵兒只伯擁
眾寇邊公從平虜大總兵蔣公征勦追至兀魯乃遇敵當先交鋒
以七騎破陣奇功升昭毅將軍陝西行都司都指揮僉事有銀碗
文綺之賜詣追封祖考如其官壬戌九月哨巡沙州繕修城堡邊
民賴之甲子四月巡池北天倉毛目等處乙丑正月朝廷念公勦
績賜敕獎諭加升都指揮同知仍舊操備丙寅□月哈密使臣朝
貢歸過赤斤沙州罕東遇達賊被掠朝廷以公素爲邊夷信服命
出罕東追撫公至大集渠魁諭以恩威虜卽羅拜悔罪盡還其所
掠時聞沙州都督喃哥偕弟卻領占潛通瓦剌將謀內寇其弟鎖
南奔已密受僞封祁王逸去因令公覘之廉得其實遂禽番僧加
失領眞并徵兵虜檄三紙械送京師復領兵往沙州收捕喃哥等
千二百人招降赤斤達保帖木兒男婦四百餘口事聞升都指揮
夏且有白金文綺之賜戊辰三月奉敕征進罕東等處至失刺哈

眞界夜襲虜營生縛僞祁王鎖南奔并部下二百餘人招降沙州
等處土達七十餘人升右軍都督僉事尋被誥命追贈祖考如其
官己巳七月哨接參將劉震軍馬至半截墩遇敵奪獲被虜人畜
甚眾敕充右參將鎮守甘肅景泰庚午二月領兵繕修高臺城堡
堅完有備人甚賴之公一日令男佺赴京奏事蒙特授佺百戶令
齎敕回諭爾父子務在同心協力盡忠報國時英廟出狩虜廷公
前所獲奸僧加失領眞因得不死遂投虜也先以師事之適朝廷
遣禮部侍郎李實爲通好計至則奸僧加失領眞欲圖復讎中公
以奇禍因設聞告李實實遽以其言歸報公將獲罪而甘之內外
守臣及其邊人俱爲公訟朝廷亦知其僞置之不問適福建賊起
命公馳往協守公居閩七年天順改元英廟復辟卽日召公於閩
升都督同知賜白金三十兩紵絲二表裏慰勞有加時公以勤勞
膺疾上遣太監賜羊酒藥物及日遣御醫診視公疾愈入謝上思
甘涼爲西北重鎮欲得老成練達武臣乃命公協同總兵西盩侯

宋誠鎮守迨行前一日召至文華殿玉音下詢防邊之策公應對咸稱旨上嘉歎良久從容諭之曰卿為國老臣舊在西陲民情土俗諳練有素此行當宣布朝廷威德加意撫輯人民俾知感恩報國遇有調發必得其用毋致乖違有負委任之重論畢上親授公以玉帶明日陞辭復賜白金五十兩金織蟒龍袍尋召至文華殿面獎丁寔賜重寶一錠蓋上在虜廷時極悉奸僧之間而益信公之忠誠故恩遇之隆如此九月領兵昌寧等處截殺鎮番等處隄備策應涼州哨至板井寇聞公威聲皆遁去明年戊寅上遣使就鎮賜明甲鳳翅盔繡春刀以壯軍容仍降敕獎勵是年佺病卒公令次男傲奏辭原授百戶有旨毛公在邊效勞還著男毛傲做百戶公受恩感激愈深每征伐罄竭心務務圖成功五月永昌黃城兒西石門六月山丹紅寺兒甜水湖七月花寨寺溝凡三戰皆大捷禽斬賊眾并奪獲人畜軍器不可勝紀已卯五月升右軍左都督仍舊鎮守公嘗護送都指揮馬雲奉使撒馬兒罕及程俊使土

魯番撒馬兒罕使回又護送之公威望素著中外畏服所過略無梗阻辛巳正月虜酋孛來擁眾寇莊浪公與總兵宣城侯衛穎分兵追擊之禽斬賊眾奪獲戰馬軍器人畜賊勢少卻隨領騎士三千於涼州十三里鋪墩安塘眾方集適賊騎數萬突至公嚴督將士併力拒敵自黎明至次日晡時士皆殊死戰凡百餘合賊應弦墜馬者不知其數賊眾稍卻虜酋復立陣前宣大言以惑我軍重圍愈固公單騎往見責其不臣之罪目皆皆裂援兵且俱至賊遂解去全師而還八月虜寇永昌公屢截殺或夜劫營壘以撓之斬獲首級戰馬軍器并奪回男婦三百餘牛羊驢騾以萬計癸未冬總兵衛公與公計曰把沙巴哇等族皆咂馬吉思冬沙思俄思哥兒阿兒加倉等番夷久在莊浪涼州永昌阻截搶劫殺害官軍不舉兵剿除深為地方患遂合奏刻日分兵攻之公分巴哇大族阿兒加倉小族至期拒者戮之降者撫之不旬日功成惟莊浪軍馬進攻咂馬吉思冬沙等族不下公又合兵攻之盡滅黨與各族

良善番官酋長公與總兵撫安之按堵如故捷奏進公爵爲伏羌伯食祿一千石協守如故成化戊子八月陝西固原州土達滿四叛聚眾萬餘據石城礮架山流劫鄰境震驚關陝其山七峯險峻前此官軍追剿每失利至是公奉敕以行遂率甘涼兵馬與總督項公會行自十月初九發哨期以軍至放礮掣軍舉煙次日至石城前門會議適遇賊迎敵時甘州軍馬在後遂以騎二百餘人衝陣至礮架山截山奪險對敵後哨至賊已大敗礮石滾木至以車輪磨石俱盡公與孫鎧督我軍乘勝直擣七峯聞山上老稚皆號泣奔走功垂成忽昏霧起他哨誤先舉煙掣軍賊遂乘風盡抽餘黨以死決戰公顧孫鎧曰勢急矣我受高爵厚祿職在滅賊誓不與賊俱生鎧亦顧眾曰我君我祖在上盍與賊同死遂首騎與鎧破陣以進孤軍相持自巳至酉戰凡十餘合射矢皆盡拾賊矢射亦盡公遂中流矢鎧前翼救仍奮馬殺十餘賊賊執鎧斷其指裂其額曰爾復能射否海亦赴救死之是月十一日也夜半風起折

旗拔帳營中士卒皆聞甲馬聲幕下卒王寬夢公曰我必將滿四馬上活活禽來旣覺驚愕御史鄧公本端隔帳聞之卽起焚香祝曰公果有靈能助我禽賊當爲具奏立廟祀公未幾滿賊就禽伏誅忠義所感天固有以相之耶訃聞上震悼輟視朝一日且曰毛忠奮勇殺賊忠義可嘉其與葬祭給麻布一百疋齋糧一百石造塋域明器錫以鐵券贈奉天翊衛宣力武臣特進榮祿大夫柱國伏羌侯諡武勇食祿一千石子孫世襲伯爵公體貌雄偉器量宏豁故人望而畏之卽而愛之性仁孝事先都督公盡色養母皆氏早喪事繼母都尤孝謹能樂友士大夫習知古兵法料敵制勝雖古良將不能過平居不喜遊畋不嗜貨利存心一以忠義爲主其訓子孫亦如之嘗又賜五倫書謂子孫曰忠義盡在是矣汝等奉誦之母忽待士卒務察其饑寒勞苦惟恐有一人不得其所故士卒樂爲之用嘗征甜水湖陣中一軍馬被賊箭而仆公以所從馬乘之其招來達軍新役者幼丁無倚悉派殷富軍家給其月糧冬

布之半養之其半貯候長成爲婚娶之費凡士卒疾必與湯藥至
躬自省問如己子其愛護軍士皆類此軍旅所至市不易肆農不
輟耕晏然不知有兵故喪還之日關中餽運道塗行旅之人雖非
甘涼部屬而平日威信所感動者莫不揮淚相弔至有迎櫬而奠
望門而哭者自公卿以及偏裨將士弔奠賻祭相屬於路越數月
不絕凡荷朝廷暨親王賜祭無不嘉其忠義之節生榮死哀可謂
至矣是歲十一月二十八日奉葬甘州城南公生洪武甲戌六月
二十一日薨以成化戊子十月十一日享年七十有五配眞氏封
夫人子男四長佺錦衣百戶贈伏羌伯次曇事釋氏次俊甘州右
衛百戶又次傲甘州左衛指揮孫男九日銳今襲伏羌伯鋼鑑鉞
鑑鑽釧鐸鉞鐸甘州左衛百戶孫女二弘治乙卯七月朝廷賜名
其坊曰忠義以表厥宅里丁巳七月欽命所司於甘州擇地建祠
賜額曰武勇以春秋祭之公名著華夷功施社稷侯封廟食金書
鐵券輝映當時流傳百世蓋凜有生氣眞宇宙間大丈夫也銳襲

爵弘治元年命挂平蠻將軍印充總兵官鎮守湖廣尋改命總鎮
兩廣信賞必罰威行惠施功高不居詩書禮樂念念不置蓋有古
郤穀之風得非乃祖積功懋德及庭訓之所致歟

都御史韓公言行錄

雍

侍郎尹直

韓雍字永熙直隸吳縣人父以閭右徙實京師占籍宛平縣進士
歷仕正統成化間官至右都御史卒年五十七

公生秀穎異常書過目輒成誦成童選補順天府學生正統辛酉
以詩經中京闈鄉試明年登進士第癸亥拜湖廣道監察御史乙
丑奉命錄囚有碭山縣學教諭邱純因責膳夫祝磨兒其父令磨
兒遁去乃告純筆死棄屍他御史問勘誣伏尋屍偶於黃河傍得
一支解者認爲磨兒屍遂坐極刑公疑之遣人蹤跡得磨兒純由
是得白

戊辰按治江西吉之廬陵等縣凶徒乘歲饑劫掠勢甚熾公與巡
撫侍郎楊公盛設法捕首賊二百餘人悉寘重典地方以寧己巳

少保陳先生循知公之才特薦升都察院右僉都御史巡撫江西黜奸貪疏滯獄均徭役平市價恩威大著丙子劾奏王府及王教授違法等事上命大臣覆實革其護衛而教授以下坐罪有差英廟復辟調山西副使坐累致仕戊寅遷大理寺右少卿尋復右僉都御史問決強盜十八人內二人訴被同起二人讎指時左都御史寇公深云會問已明奈何公曰人命至重有詞且暫留問不實決未遲二人得留餘欲行刑公復曰若不留指者將誰與證始留四人後訴者得白錦衣指揮劉敬因石亨連坐有謂敬會邀亨至直房同飲欲坐朋黨公曰律之本意謂結交朋黨紊亂朝政者今與亨交而非亂政况亨得志時誰不蠅聚其門若以一飯卽坐此罪則曾赴宴會者何以罪之東漢時以朋黨二字害盡忠良覆轍可貽耶是冬奏敕巡撫大同宣府陞辭召至文華殿論遣之賜寶鈔三千貫蓋異數也至則卹軍士繕城堡糾治貪蠹震懾慮志有古守邊者風矣未還議事升兵部右侍郎有忌之者適英宗皇帝

上賓因事遷浙江右參政

成化乙酉兩廣蠻寇弗靖上命都督趙公輔充總兵挂征夷將軍印兵部尙書王公竑特舉公素有雄才能幹大事遂起公於浙拜都察院左僉都御史仍食從三品俸贊理征夷軍務公既受命會於南京眾議欲分江西軍從遊擊率達官由庾嶺入廣東大軍則從湖廣入廣西以賊在廣東宜逐之在廣西宜困之公曰不然古者仗鉞臨戎專制閩外謂可安國家利社稷雖專之可也夫兵有聚而爲正亦有分而爲奇今兩廣已無完郡而大藤峽賊巢穴不圖而趨其末未見其能濟苟全師至彼南可以攻大藤峽援高雷廉東可以應南韶西可以取柳慶北可以斷陽峒諸路勢如常山之蛇動無不應舉無不克何煩於逐乎自古蠻夷來寇不可以禮義較惟勝之而已叔敖云盜我薄人軍志曰先人有奪人之心薄之也所以兵貴拙速不尙老遲又何泥於困乎於是命將分兵諭以朝廷威福之重示以賊勢可滅之機眾歡呼咸願死戰不逾月

先破修仁荔浦次及大藤峽前後生禽斬首奪回被虜俘獲賊屬
共四萬一千七十有奇捷聞皇上嘉喜升公左副都御史提督兩
廣軍務兼理巡撫賜綵段六表裏敘功當蔭子公以與弟陸投錦
衣所鎮撫先是公與將士約能生禽被虜男女者准其功故無妄
殺之慘功成之日士皆斂迹無譁秋毫不漁於眾廣人名其所憩
亭曰運籌扁曰平蠻所以記其實也戊子公以兩廣土地廣遠恐
餘孽復生重貽邊患請於朝願得文武大臣分理其事上可其奏
升公右都御史總督兼巡撫於梧州開設總府居中調度兩廣副
總兵參將而下悉聽節制奈何承制專決已久一以繩下不貸大
吏以故得理者喜不得理者多不悅於是上有上書言公不法事若
干條皇上知公功勞遣使勘覆多虛公卽引疾再三陳乞上知其
誠惻特賜俞允俾致仕時年五十有二

公爲人洞達凱爽篤於孝友與人交不爲崖台有信義發擿奸伏
如神然每存心於愛人不事苛刻秉兵權於一方未嘗濫殺一人

政務填委不忘文事摘詞灑翰思如湧泉無少凝滯嘗作江西第

一樓等詩著平蠻錄多膾炙人口

並尙書張道撰行狀

公聰明才辨迴出流

輩按江西時適聞廣處州寇發剽掠及境公設法擊卻之當時巡

撫侍郎揚盛稱於眾曰韓繡衣聰明百倍於小子官民奏畱重按

一年回朝升廣東憲副不數月升僉都御史年未三十民情吏治

素所諳練風裁凜然凡臨眾決事動發百餘言皆引經援律無一

語疏滯處置事務靡不允當至今官民遵守之曰韓都例繼公巡

撫者以爲不及嘗念陳芳洲先生爲舉主赴鎮經泰和躬祭墓下

流涕不已曰士爲知己者死何能報也

瘞瘡公奉命以討有罪一

以仁義誠信宅心師至之始卽律之曰夫兵凶器也聖人不得已

而用之苟非以順而動不可也若等勿盡劉無辜勿濫容首惡勿

遏彼之來降勿爽我之號令斯事濟矣眾咸曰諾於是發偏師先

下荔浦修仁西延陽峒然後移兵斷藤橫石等八百餘寨所過之

地如振槁如破竹自成化乙酉冬十一月至丙戌春正月凡五征

不克者一舉而平之

公之用兵一運乎心德之微而全活擄掠之眾則公之仁足以協羣情矣首惡而罪必誅威震而刑不濫則公之義足以討有罪矣撫安來降而弗畔其約則公之誠足以化強暴矣號令必嚴賞罰必當又公之信足以及軍旅矣

取勝之師必在速戰乃分官軍面授方略水陸並進是歲七月一戰而克遂以七軍之在行者分爲五路八月進全州興安凡若干戰賊大敗九月又往廣西五路發兵進討荔浦修仁十一月師至大藤峽又釐爲二十五哨固守衝要四面夾攻賊預備險阻牢不可破以滾石擲木長鎗毒矢抗敵公忿然曰吾受天子重託生靈命脈在此一舉事若少緩則兵民膽喪鉅萬之眾肝腦塗地又曰文王之師攻必緩戰必徐者欲俟其革心順服而全之也公復下令且招且撫得向化致附者一萬三千其怙終者則天誅不可以畱乃申嚴號令以身先之肆兵前進萬眾驤呼聲搖山嶽一戰而

渠魁就縛勢若泰山之壓累卵商颯之拉枯朽羣凶失怙兔竄狐奔旬月之間攻破寨峒五百生禽一千有奇斬首七千三百俘獲賊屬奪回被擄男女三萬餘口燒毀賊巢得獲器械牛馬無算乃改大藤峽爲斷藤峽立石以告來世捷報於朝仍以向化者眾反側未安乃州治其地設巡司六所擇其夷心信服者數人授以土官而約束撫安之施以實惠量給以田使之耕各遂其生並平尹直贊曰長材大器風采桓桓贊戎執法理劇剽繁豹變於隱鵬息於搏愛遺江右功著嶺南奉身而退繼者維難

皇明名臣琬琰錄卷之十七

凡善與人

皇明名臣琬琰錄卷之十八

后集

修撰羅公言行錄

倫

楊尚寶

廉

羅倫字彝正江西永豐人進士第一成化閒官翰林修撰養病山閒卒年四十

性慷慨樂善不疑人欺遇事無所回避有不可輒面斥人舉成化丙戌進士策對大廷頃刻萬言中引程正公語人主一日之閒接賢士大夫之時多親宦官宮妾之時少執政欲節其下句倫不從直聲震於時奏名第一為翰林修撰會內閣大學士李賢遭喪去官朝廷畱之臺諫皆不敢論說倫詣其私第告以不可李公始以其言為然既數日復上疏歷陳古今起復之非是且曰如其不然必準富弼故事終喪劉珙故事言事反復數千言一本於天理人心之不可已者孔子曰勿欺也而犯之倫以犯顏切諫為大救時行道為急其負荷之重未嘗一日忘天下故發憤如是疏奏遂落職提舉泉州市舶司倫雖見逐而士論益榮之由是天下之士爭

自刮磨向之不言以養忠厚者為之一變而終倫之世臺省未嘗有起復者矣倫雖以此為人所知然亦以此取嫉於人明年召還復修撰改南京尋以疾辭歸開門授徒日以注經為業垂十年卒於退居之金牛山世之知倫者不過以其滂沛之文奇偉之節果敢之氣而已至其心之所欲為而力之所未逮未必盡知也嘗欲倣古置義田以贍族人或助之堂食之錢謝而弗受或衣之衣行遇乞人死於途輒解以覆之客晨至甬具飯其妻語其子曰瓶粟罄矣之旁舍干之比舉火日已近午亦曠然不以為意提舉泉州宮例應得折薪錢其人欺之以乏告即放遣之不復問予嘗遣人訪之山中結茅以居取給於隴畝往來共樵牧若無意於世者時或作為文章以發其感慨之意而人亦莫之知也

論曰倫之必為君子而不為小人較然矣如倫之才少貶以徇人雖欲窮晦其身寧可得耶以其所學進說於上世目之為狂何足怪也孟子稱豪傑之士雖無文王猶興若倫者今所謂豪傑非歟

無道於前而所立卓然人莫能奪之又曰倫才大不及志其青天白日足稱云陳獻章撰傳孤忠大節文山者為宋一人高風直氣羅

一峯者為今一人有文山此啓故有一峯此書有一峯此書故知

文山此啓此啓此書蓋有待駢枝縣附而自會者亦自然也予讀前史每見文山之烈未嘗不起千古凌厲之想但予晚生不能接

見文山眉宇徒切想望而已然越人去國期年得見似人者喜予雖不見文山得見似文山者喜矣今之世豈無似文山者哉成化

丙戌附驥一峯之尾登第得拜一峯泰山喬嶽白日青天蓋眞文山者矣不徒似也嗚呼曾幾何時而一峯謫矣及其再見又未數

月而一峯病矣又不數年而一峯卒矣嗚呼予於一峯當何如哉一峯跋文山此啓自謂一字一涕張東白跋一峯此書又謂一字

一涕予於一峯吾道之哭世道之哭朋友道之哭雖一字萬涕有不定以寫吾痛夫豈止一字一涕者哉莊景敷書於乎一峯為道

藝先覺為仁義郭郭為士庶依託為當世醫藥為沛入表之雲而

翔千仞之鸞為鼓萬物之風而架層霄之閣其心洞洞其性落落其文浩浩其行卓卓白日青天泰山喬嶽於乎一峯九原不作吾誰與歸吾終從子於冥漠陳獻章撰祭文人心皆孔孟世道皆商周此意無人會西風吹古邱白日金牛洞青雲丹鳳樓思君不可見新月上簾鉤周英撰

侍郎楊文懿公言行錄守陳楊尙寶瀛

楊守陳字維新浙江鄞縣人中進士歷仕景泰弘治間官至吏部

右侍郎卒年六十五贈禮部尚書諡文懿

公五歲就家塾日記數百言初學詩歌輒有奇語稍長習舉子業

詞理兼優夙出倫輩四方學者往往傳錄所作經義論策之文以

為式何喬新撰墓志銘憲宗皇帝初開經筵公為講官多所啓迪一日講

書武成篇公進曰魯論稱舜無為而治周書稱武王垂拱而天下

治是則聖人之治皆不勞而佚也然後世人主有深居禁中委政

內侍者乃召望夷之禍有高居無為肆情變豔者乃啓祿山之變

是何也蓋舜之所以無為者由其封山濬川以至舉相去凶無一

不盡其道武之所以垂拱者由其列爵分土以至崇德報功無一

不究其心皆嘗憂勞而有為乃治佚樂而無為也後世人主則孟

子所謂安其危而利其菑樂其所以亡者耳此聖狂治亂所分惟

陛下留意時左右聽者悚然

權倖有重公欲援之者使所親諭意公謝卻之私於其人曰吾猶

嫠婦也守節三十年今老矣豈白首而改節耶墓志詔集議祧廟

禮官請祧懿祖而以德祖比宋僖祖百世不遷公抗言禮天子七

廟祖有功宗有德乃孔子之言故凡號太祖者即始祖必事之以

配天若商周之契稷皆以功而非論其本統也宋之僖祖及我德

祖可比商報乙周亞圉非契稷比議者徒謂大儒嘗可取於王安

石之說而不從孔子遂使七廟之間既有始祖又有太祖太祖既

以配天而不正南向之位名與實乖豈先王之禮哉若為降而合

食為非禮則王者既立始祖之廟又推始祖所自出之帝而祀之

固無嫌也憲宗升祔請并祧德懿熙三祖自仁祖以下爲七廟異
時祧盡則以太祖擬商周契稷而祧主藏於後寢祫禮行於前廟
時享則尊太祖祫祭則尊德祖各不失尊庶無悖禮議者不能從
程敏政撰傳弘治元年春公上疏請上日御經筵及午朝聽政大略謂
陛下一日之間居文華殿之時多處乾清宮之時少則心清理明
聖德日隆矣優詔嘉納修憲宗實錄以公爲副總裁仍兼理部事
公上章請解部事專史職章再上皆不允踰年公又疏乞致仕且
曰吏部進退百官眾怨所集聞望如尚書王恕者尚招人言況臣
迂疏豈勝此任伏望賜臣致任養痾林下以盡餘年上不許致仕
命公以吏部侍郎兼詹事府丞史館供職如故公嘗言古人謂國
可滅史不可滅我太祖定天下卽命儒臣撰元史太宗靖內難其
後史臣不紀建文君事遂使建文數年朝廷政事及當時忠於所
事者皆湮沒不傳及今采輯尚可補國史之缺景皇帝已復位號
而英宗實錄標目猶書郕戾王附是宜改正舊例羣臣章疏畱中

者雖有可傳皆不得書乞以畱中之奏悉附史館擇而書之草奏
欲上以病不果墓志公天性孝友與人交篤於信義居嘗退遜體若
不勝衣言若不出諸口至商推義理論事是非曲直則侃侃直
視義所在勇往奮發雖壯夫不逮也嘗被命教內侍省教戒多去
爲近侍與公同事者率因之取寵貴而公獨無少資藉士論多之
公博學多識於書無所不讀遇有所得卽爲論著蚤歲嘗作五經
四書私鈔而詩書二經尤爲精到至其家庭授而用以取科者則
專門易學王俱撰神道碑先生志行高雅學博而才俊問學之功孜孜不
懈而天資穎敏絕人古今詩文每一過目輒爲倍誦於凡事物之
觸於目感於心者未始不卽之以賦詠作爲詩歌以見意李紹撰禮聞唱
和詩序公二子長茂元字志仁次茂仁字志道先後起家進士茂元
累官山東按察副使弘治甲寅河決張秋朝廷遣重臣治河而武
臣中貴各持有頭目糜用不貲茂元馳疏上聞以是得罪謫長沙
府司知尋謝病棄官歸屢爲當道薦起弗果弘治癸亥尚書馬文

升推轂轉安慶府知府茂仁今任刑部廣東司郎中先是委議問刑條例兼總本部十三司章奏諳達事體士論臆之諸孫美珩美璜美琚美瑀美瑤美環美瑜森然玉立又公之積慶云蘇志廣東布政陳公言行錄選

楊尚寶廉

陳選字士賢浙江臨海人進士歷仕天順成化間官至廣東左布政使卒年五十八

公少沈靜端慤不妄言笑從鄉先生陳璲游日坐一室誦習未嘗嬉戲做衣糲食人不堪其清苦而處之自如爲文理致深密讀之有味吳傳出巡江西風紀大振不以刑法立威官吏相戒自不敢犯憲宗嗣位公上疏言君子小人進退治道所係不可不慎言甚剴切提學南畿學者競爲浮華之文力欲變其故習徧歷郡縣居宿學宮默然端坐以身爲范令讀小學書暇則習禮一時諸生翕然感化

擢廣東布政使廣民疲困爲除徭役罷和買備振濟皆務爲惠養

計數辯冤獄閩人賴克哥等三十九人漁於海舟爲風漂至潮州守者獲之以通番論又邑民劉馬住及黃福等十九人被誣爲盜公察其冤悉釋之尤不畏貴倖中官有弟冒爲武職者逼娶寡婦爲奪還之於是乃有提督市舶司者倚進貢爲奸利役戶苦於供需特減三十人其後番人馬力麻與海商私通販易詭稱蘇門答刺國使臣市舶利其貨不問公發其僞時又有撒馬兒罕使臣泊六灣以獅子入貢浮海還國云欲往滿刺加更獅子公言此西域賈胡爲圖利耳使墮其謀必貽安南諸夷之笑國體所關甚非細故中官既蓄減役戶之怨且素利進貢及是每爲阻抑怨益深乃誣奏他事勘事者求事實不得必欲文議以罪竟逮公赴京廣人數萬擁留之公在道病作行至南昌而卒

公立志以古聖賢自期待潛修默識不求人知其學以克己求仁爲要因自號克菴讀書不資於文詞遇格言卽手錄於冊爲力行之助平生言若不出口視所當爲者則勇於爲之不顧利害其處

事緩而詳御下嚴而恕至是言動端莊雖家人見其終身然也身
既貴顯燕會惟服先人故衣帶客至瓦器蔬食相對無愧色自河
南聞喪還行裝蕭然車一兩而已及之官廣東騎驢出都門而而
去其儉約有寒士所不及者嗚呼此吾友陳公士賢之墓公有
天下不可奪之大節有足以濟天下之大才有不可遏於天下之
大勇國家承平日久士夫多奄奄無氣節間有之而檢身之功或
歉焉故其發之也不耀而其持之也不恆如吾士賢則何可議哉
其學識粹然一出於正其操履恪然一出於誠其居此官即欲盡
此職其行此事即欲盡此心其視去就升沈甚輕一在於生靈國
家餘不恤也宦轍所至無不感動響應者巡江西江西人到今萬
口一詞稱頌爲名御史南畿河南繼公提學者屢矣然切切感慕
者惟公公憂去河南士民遮道泣送者萬計復相率立生祠及去
思碑被閹誣時兵民數萬填盜衢巷號訴於詔使多涕泣者閹復
以賂公所黜吏張褻者證公吏死不從公名滿天下士夫無問識

不識論一時正人必僉曰陳某

張元禎撰墓表

吏部尚書康懿陳公墓志銘

俊

王文肅公

慎

弘治元年二月二十九日太子少保南京吏部尚書致仕莆田陳
公以疾終於家訃聞命加卹典又命舉壹惠之制於是諭祭以文
營葬以式具如故事而以康懿易名又允合經禮上念公先朝舊
臣所以軫不憖之悲而施寵終之恩如此吁可謂盛矣公葬有日
其家以公治命來請予銘予感公知己不能辭乃按其鄉人工部
侍郎劉公璋狀而銘之曰公諱俊字時英別號愚菴自幼聰警不
凡長遊郡庠治書經正統丁卯試鄉闈以閩藩第一人發解明年
中進士第授戶部主事累遷員外郎郎中成化乙酉升南京太常
少卿戊子召爲戶部右侍郎癸巳改吏部乙未升左侍郎丁酉滿
九載拜南京戶部尚書庚子奉敕改兵部參贊機務甲辰轉吏部
丙午尚書九載滿赴闕上嘉勞之賜以羊酒寶鈔俾還任無何疾
作抗疏乞休遂加太子少保致仕賜璽書馳傳還鄉仍命有司月

給廩米二斛歲供輿隸四人蓋歸既逾年而疾甚以至不起公爲人負才礪志自爲主事已綽有賢聲嘗督天津諸衛官兵采秋青草卽日奏減歲增之數三十五萬束令止輸原額蘇松諸郡折糧銀爲里豪所侵者七十五萬兩有奇公往徵之不數月悉輸內帑尚書金公濂大咨異之自是更景泰以至天順其所任職皆嚴辦而賢能之聲日益有聞辛巳朝廷出師征兩廣叛寇命公往督饋餉時郡邑殘破公私匱乏百方籌畫事克有濟大率如弛鹽商越境之禁俾得隨處貿易而引輸粟二斗於南雄梧州用是兵不乏食而民不出賦輿論稱之是冬母喪乞守制不許明年師還始歸莆又明年復任未幾而有太常之命先是爲少卿者多不檢一祠官缺請託紛然公至僉舉以公遂帖帖服蓋其爲務甚簡而公任之嘗不勞餘力識者固已知非公久處之地矣閱歲再拜遂入朝爲戶部尚書楊公鼎以剛扞自任不假貸於僚佐然獨重公事經公斷制者卽不復省屬時四方奏災異三邊告輸輓文移逕集諮

議旁午裁決如流不淹晷刻而靡不曲當人咸服公爲不可及辛卯京師饑公奉敕發太倉粟一百萬斛減價糶以利民權貴有乘時射利者公請於上凡糶以升斗計滿一石者閉不與其計遂沮而饑者獲濟壬辰上命將北征特敕公總督軍餉於秦晉諸邊公倍道疾馳比至則邊庾空竭歲且不登芻粟價湧而榆林延緩糧道險遠輸者病之公乃發金於內郡市易且修西安韓城同官徑道以便飛輓是行所向無敵虜酋授首公勞伐居多凱旋加俸一階尋遷吏部銓綜人物號爲清允比陟南臺荐更畱府剷除宿弊蓋不動聲色而事皆就緒不假威嚴而人自懼服名德老成上方倚毗而公乃引疾決去秩增宮保而祿之終身豈偶然哉公嘗以文學聘考庚辰會試乙丑南郊命公獻北海神壇冊封藩王持節充正使之荆府他凡大祭祀大燕享公無不與而上寵異之頒賜綵幣書籍之類亦不一而足吁如公者亦可謂榮遇也已公先世潁川人系出漢大邱長寔十九傳至隋莆田兵馬使邁始家於莆

曾祖福六祖明善考珪歷官文昌天長教諭皆以公貴累贈資政大夫南京兵部尚書祖妣黃氏妣鄭氏配馬氏皆累贈夫人子男二天敘以蔭補國子生天秩四女公春秋七十天敘等卜以某年月日奉柩葬文賦里瀨溪之原卽公歸老後所營壽藏也劉公又評公爲人沈毅簡重淵澄山峙望而知爲正人平居篤孝友寡言笑操履端方確乎不可拔旣仕以清白自持雖位至六卿蕭然不異布衣時此公實錄予無以易也遂併誌之而系之以銘銘曰於惟陳公閩產之奇負其才猷奮庸於時爰自卽曹致位卿相當一倚毗縉紳嘉仰功業煒煌志行卓殊白首不渝盟於策書一代鼎臣如公其幾天不憖遺奄其亡矣國有禮典哀榮始終匪徒爲公亦以勸忠惟公有予蚤以門庇世澤之徵庶其在此

皇明名臣琬琰錄卷之十八

皇明名臣琬琰錄卷之十九

刑部尚書惠安彭公行狀

部

宋僉事

端儀

后集

公諱韶字鳳儀八世祖戊始居莆田之涵口曾祖孟德妣某氏祖體正祖妣陳氏以婦節聞父思孝鄉宿儒母林氏公幼莊重警敏劬書不倦少長識趣已端公父不欲其汎讀以分日力惟課之舉子業公於暇日仍取古聖賢遺文及子史諸書觀之入郡庠再試於鄉未利而公父沒自是生業益替而弟妹皆幼母夫人以遲暮之年夙夜懷憂公歲授徒以給用慰母心景泰丙子預鄉薦明年丁丑會試中第七廷對賜進士出身除刑部山西司主事旣三載蒙恩贈父如其官封母爲安人未幾丁母憂服闋改廣東司升本司署員外郎有張岐者自外臺擢右僉都御史協管院事公以其人非才力論其不可而願朝廷收召王竑李秉葉盛以伸公論疏入詔獄都給事中毛弘等言公持論雖過心實懷忠得宥復職尋進本司郎中廣東爲司繁劇事多涉於難挾勢而席寵者左撞右

究公中立不倚屹然以定民之茹枉抱鬱失利而狂呼者則爲之
鋤疆剔蠹斂其有而歸之雖罹咎戾無所悔恨外戚之臣指揮周
遵與畿內民爭田願得內臣及錦衣衛官往躡勘丈量之會有旨
命公正法司官以行眾咸推公公至其地環視周而揮算工捐弓
尺徑歸上自劾之奏曰田本民有雖其戶報不及管業然地有高
下歲有旱潦細民頻年出賦以給公上早則資污下以補高仰潦
則資高仰以裨污下安有空閒可以別給且民者國之本食者民
之天食足民安民安則國安豈可以民田給貴戚重傷國本耶復
詔獄科道交章言其無他得釋俄而復有請荒田者先帝顧左右
曰彼不見周遵之事奈何又請耶立卻其奏庚寅升按察司副使
所至平冤滯黜奸蠹敦風俗卹民隱壬辰冬分巡川東道至開縣
有劉姓者戶先分二支一徙一畱徙者後復業與所畱家人爭里
役而負遂陰嗾安岳縣扈氏兄弟焚滅其家男女凡二十一人鄰
人爲訴於府府以爲事非干己且無證佐尼不行公至聞之大駭

督捕得扈氏并其徒十餘人一訊款服寘於法明年至合州屬邑
定遠曾姓羣從兄弟數家一日聞盜出沒邑人奔竄弟乘風入兄
室掠其貲誘之他盜兄迹知所由訴於官弟夜聚羣少殺之凡十
有二人盡死乃僞爲不知持狀詣公告公鞠之得凶黨七人斃於
獄其發奸摘伏類如此每出巡郡邑民爭挽肩輿冀先至其境乙
未春升按察使公之副憲也凡有淫祀在分司者悉去之至是以
二門外有廟祀五顯其事不經趙清獻公遺愛在蜀清風鐵面正
吾憲臣之式乃與同僚謀撤五顯像而設清獻神主於位錄朱門
問答有及時政與眞希元諭官僚之文名曰政訓以自警且以勵
僚屬陳言時事宜變於今者各王府祭葬省差內官及行人等官
以免勞費從之在蜀恩威兼著淑慝自分廉而不激明而不苛蜀
人懷而畏之至今數賢廉訪必首稱焉戊戌春升廣東左布政使
下車首集父老百十人問民所疾苦與利病所當興革者而施行
之先是農民補吏視房分罰其直名納公堂公曰取其財而責以

不貪可乎選俊秀善書者充之而積弊遂革鎮守內臣顧恆歲有進貢之儀里胥乘之求索多方民不勝其擾公疏言自古明王不寶遠物廣東民力竭矣守土臣以此事上爲恭不知凋傷國本爲害反大也監舶內臣韋眷請以均徭餘贖六十戶隸船司爲造辦貢獻之需公疏言今之官民富強不及於昔者蓋因害財之多故也使及今十分愛惜加意撙節猶恐無以爲繼况又更啓他端而益以雜用其何以善後哉願將眷所奏餘戶暫與一年以後遞年停罷臣民幸甚有詔減其半陳公甫以學行有聲於時公薦於朝曰國以仁賢爲寶臣才德不及獻章遠甚猶且叨厚祿願於獻章醇儒乃未見收用誠恐國家坐失惟善之寶至凡廣南一時名士公皆折節下之每於朔望受民詞日至千百紙決斷如流告戒諄諄如詔子弟民卒感之至有不平輒恥見公而自去者儀門外有土神廟亦更爲參政汪公廣洋之祠最後太監梁芳弟錦衣衛千戶某在鄉國私采禽鳥等物進貢官民俱罹其害公復上書言狀

忤旨調貴州布政使濱行之日廣之父老涕泣河下如去慈親追送數百里外者又若干人巡撫朱公英贈詩有獨有羊城臨發處西風卧轍鳥聲酸之句莅貴藩竟九閱月因俗爲之設施貴人安之亦如廣南先是太宰厯城尹公屢言公賢可大用先帝以是益深知之甲辰夏遂擢都察院右副都御史巡撫蘇松嘉湖等處公雖聲稱凜然而鎮之以靜不尚擊搏吏自不敢犯科而民益樂其愷悌乙巳夏召爲大理卿未上坐論鎮守內外等官貢獻非宜道改右副都御史巡撫順天等處兼整飭薊北軍務陳時政以弭天變議糧運以便軍民滿考蒙恩贈祖考考俱嘉議大夫都察院右副都御史祖妣妣皆淑人今上登極臣僚交章論薦召爲刑部右侍郎屬浙西不靖承詔巡視公疾馳至誅厥渠魁數人而劾罷守臣一方晏然嗣歲之春戶部言兩浙鹽法久壞命公以本官兼左僉都御史留治之公早夜講究利病所在而參伍其說以浙西通舟楫鹽之利多於浙東而浙東亭戶抑配尤甚因定其折價銀之

重輕及處州等處課額宜殺凡便宜事數條奏行之又憫煮海之
氓貧苦以其山場草蕩曬淋煎熬折閱征陪之狀略分八節具圖
以達宸聰浙江憲司僉事王輔與憲使毛鷄不相能日闕於公堂
公奏二人風憲失體左遷其官既還轉吏部左侍郎時三原王公
爲尚書得公爲貳皆不避權貴請謁路絕人服其公庚戌冬彗星
見於天津詔大臣言軍民利病時政得失公言軍民利病曰厚根
本曰減役錢言時政得失曰正近侍曰慎官爵時左右侵權者非
一公於正近侍其略曰內臣出入左右言語輕重能爲禍福人所
畏憚今軍馬錢糧人匠柴炭盡付其手分例相沿更相倣倣虛名
實支遮掩外觀誰能詰之比見凡有章奏無不先允而後下於該
部該部承而行之不復審處是失政體也及至有犯多從寬免有
毆人致死者竟不提問或有提問成獄旋復宥之是失刑威也耗
財妄費不惟不禁而反助之死者或有給還葬銀八千兩在者或
有許其蓋祠覓地第宅踰制服食求奇於斯極矣聲勢移人望風

震懾伏望陛下靜思及此大公至正以服其心克勤克明以折其
氣上法祖宗乾剛獨斷褒良善而親忠良遠佞媚而斥奢縱事務
歸於所司威福必由己出終篇又言朝廷一日萬幾安能勞心周
溥臣願陛下執其要焉臣獲隨午朝心念日奏尋常起數於事無
補然祖宗勤政之典乞師其意可也臣願自今午朝惟議經邦急
務如吏部有大升除禮部有大災異戶部兵部有緊急錢糧邊報
工部法司有緊關工程囚犯之類許先期開具事由奏乞聖駕定
日出御左順門侍衛一如午朝之儀事該各衙門會議者各官就
於御前公同計議如吏部升除大臣明言某官才德堪任某官資
望未可之類內閣輔臣亦同在彼詳論可否事體既定就行口奏
取旨奉行次日補本備照若係本衙門自行者亦就御前逐一陳
說有無故事兩疑情由請旨定奪若是事體重大一時難決者聽
各官先行博議於下候至朝時再議奏行仍乞溫顏俯詢曲折如
此不惟世事日熟於聖明耳目而羣臣高下邪正亦自可見有事

則行不分寒暑無事則止勿勞聖駕既不廢午朝之典又可率羣臣興事則凡時政得失軍民利病自可次第張弛矣上嘉之識者謂公此舉有潛消默運之方王子夏升刑部尚書數日命侍經筵公掌刑憲務明慎而以忠恕爲本嘗言刑以弼教使之畏威遠罪導之以善耳遇有骨肉相殘者輒憂形於色曰是吾之刑罰不足以止姦也謹於守法而亦常有法外之意公素鯁正貴戚中官往往爲之斂手時安遠侯柳景總鎮兩廣都御史秦公紘發其贓貨鉅萬事聞屬吏公抵景於法奏褫其爵景挾戚腕于內降欲以破公議之是非用擠秦於危地公執奏不易朝廷不以公爲然復下大臣廷議竟亦卒如公言其後景贓銀追及八百兩有旨免其餘欠公復言陛下優待貴近之臣如此臣固知陛下有所不得已也但臣等忝列守法之官不宜阿順以圖自便景應追贓數十未及一乃特蒙恩盡行蠲宥海內聞知貪饕之徒窺此舉措一旦釋之其如物論何且景贓既可免他日爵位亦可營求而復矣爵位既

復又可營求出鎮矣奸回藉口良善解體誠非國家之利也疏入不從左右有不樂公所爲者摘公官屬細過以怵公而伸己志公怛然由之終不爲所疑沮會亢旱求言公復因事納忠條陳四事其一以本部爲荆庶人事會本覆奏今半月有餘未奉敕旨及他奏請問有旬日方纔得旨者臣謂今日正一日二日萬幾之時若優游少斷不惟事見停滯亦恐志生驕惰羣臣左右安於故常不敢有所論列矣四方傳聞甚非細故此時政之得失一也又該本部先前問得內使內官王萌苗通高永犯該絞罪俱各累訴冤枉荷蒙聖慈饒死發充淨軍臣聞自古帝王雖貴近必刑者所以彰天討之公若殺人不死復何所畏憚乞自今以往勿復輕縱庶得法度均平人心悅服此時政之得失一也伏望陛下畏天勤政守法圖治事至物來隨卽予奪宮中外廷視爲一體推廣他類無不皆然何患時政之不善哉本部又先前問得百戶謝原管領隊軍何三等往昌國公墳上做工何三爲脫逃不還工錢被謝原腳踢

身死臣看得世情艱難財重命輕殺人犯法時常有之固非爲此一事但聞道路傳言今修皇親昌國公張巒墳塋比諸往年勦戚之家相去懸絕凡百制度務爲宏壯差官領軍萬數輪流上工計年不足恐非人臣所敢當計巒在地下豈能自安是則雖曰愛之非所以美之也上工官軍畏怕筆楚不得已出錢雇人中閒貧乏者隨上隨逃而管工官員又復請益前後展轉不得息休豈能無怨讟者哉此官民之利病一也本部又問得東安等縣知縣朱華等被神宮監官奏其違例差役陵戶臣看得順天府所屬州縣正役頗易應當雜差實爲浩瀚其丁多殷實之家往往投充陵廟墳戶及勇士校尉人匠各色身役以避民差致將見戶重疊加役富者累窮貧者逃竄村里蕭條人無生意宜將墳陵等戶定與優免幾丁餘者仍發州縣相兼見戶均當差使庶彼此各得其所此軍民之利病二也伏望陛下畏天恤民思前慮後將昌國公墳塋減去工程如式修造俾得早完仍敕該部將陵戶等役優免事例酌

量定奪以便遵守推此及彼由近及遠何患軍民之不安哉皆時所難言者三月充廷試讀卷官先是公嘗以疾在告旣已勿藥視事而二子濬瀚三孫定密某相繼天亡公疾寢加上疏乞休上勉畱再三仍令支俸在家調治公方以素餐自効而上眷益隆近臣醫官數命來視是年六月疏復連三上上念公情詞懇切特允所請命乘傳以歸有司月給米二石歲撥人夫四名爲國愛賢者猶望公病已復來以卒佐聖天子太平之治而南京監察御史宗彝嘗率同列言之於朝然公歸里後卽擇葬地於縣之文賦里石鼓山蓋不復有當世之念家居歲餘遂以乙卯正月十有三日考終距生宣德庚戌九月二十二日享年六十有六官自承直郎九遷而爲資善大夫訃聞上命禮部諭祭工部爲營葬域越月贈太子少保諡惠安公壯歲嘗構草亭扁曰從吾公閒自稱從吾生人遂號從吾先生元配黃氏贈淑人繼配黃氏封淑人先公五旬卒子男二長卽濬癸卯鄉貢士元配出娶永豐令陳公裕之女次卽瀚

用蔭補國子生以疾授嘉興縣丞側室陳氏出娶山東僉憲楊公琅女繼娶貴州憲使卓公天錫女女一側室姜氏出議配戶部主事余公徵之子楠孫男旣天亡三人今惟濬一子曰輔而瀚則公命猶子澧子實爲之後云公天資粹美涵養深厚其學以儒者爲宗務清明其心以求聖賢氣象色和貌溫而嚴毅果敢之氣自形終日端坐非繙閱經史則省察性情處己待人一於誠敬使人可卽而不可狎聞人片善則必紀錄服食器用不求鮮美玩好之物泊然無所動於心與之居竟日卒未嘗見其私喜愠在官守處事精明馭吏嚴整事無巨細必身親視國事如家事視民疾苦如在己身至誠貫徹上下所至如春風和氣著物隨所寓無不發生其立朝直前無所畏縮忠義激發不以禍福嬰懷讜言至計所以開上心救時弊別白是非邪正排姦佞而觸貂璫務使爲善者有所怙爲惡者有所懼暮年名德益尊而其自處退然如無所有是以上則九重知之愈深下則賢士大夫望之愈重以至行旅賤隸

亦皆知名云於弟龍龍友于篤至教養其子同己子葬族之不能舉者若干喪處邱里終始欲以質儉起頽風進修之功老而不倦未卒前數月猶簡所知云抵家半載村居寡學所存所行一故吾而已何由可善其後而減宿咎哉所著有名臣贊錄三卷續修莆陽志十卷在蜀有成都志二十五卷在吏部有天曹日記差祀恆山有北岳代行藁爲尚書有秋臺錄平生雜著詩文名滯稿總若干卷奏議一卷嗚呼天不慙遺海內共歎惟公功在朝廷惠及黎庶著書滿家揚名當代建立施設多至不可紀述謹掇其大略以俟立言之君子擇焉謹狀

僉都御史楊公言行錄

繼宗

楊尚寶

廉

楊繼宗字承芳山西陽城人進士歷仕天順弘治間官至左僉都御史卒年六十三

公爲童時性資鯁直言動不凡第天順丁丑進士觀刑部山東司政授貴州司主事獄中重囚動三五百計極梏年久多死於臭腐

公每提督必給與飲食令三日一櫛沐蘇活人命無算王忠肅公
薦知嘉興郡公至止帶蒼頭家僕一人如旅寓然御史楊公琅具
公善政奏聞旌異滿九載民老幼不忍舍去遮道畱之弗得立去
思碑後升浙江按察使下車之初憲綱一時爲之振舉初藩臬諸
司所用咸辦於下鎮守中官供給日費萬錢公一切革去之軍民
愛之如父母官吏畏之如神明未幾以內艱去任將行悉以廨舍
中器物付之有司一毫不以自隨篋中惟貯大明律書數卷衣數
襲而已制終詔起升左僉都御史巡撫順天地方外戚宦官莊田
多占民間地土公悉奪而還之權貴斂迹成化乙巳上疏左遷雲
南副使弘治元年升湖廣按察使復升左僉都御史巡撫雲南卒
於官

公爲人好善惡惡出於天性與人不苟合人多憚其方嚴居官三
十餘年其忠孝大節議論風采雖庸人孺子皆知其名並黎淳撰
神道碑孔子曰吾未見剛者孟子曰至大至剛以直養而無害則塞於天

地之間孔子孟子之所謂剛者吾未見其人矣見其似者可矣今
之君子若尚書王君公度御史謝君元吉太守楊君繼宗僉憲陳
君夢祥亦庶乎其似者非歟尚書不得其職數月去御史三上章
出百日謫去太守屢抗強武乞錢若水例致其仕去僉憲九載不
遷辟讒去羅倫撰送
陳僉事序吾聞侯以嘉興人物莫大於陸贄名宦莫過
於楊繼宗修志之餘皆欲大其祠宇實錄其行以萬古其人於天
下莊景撰嘉
興府志序漢楊伯起以清白著聞猶有可卻之金承芳治郡久
始終無一足敢暮夜及門者蘇子卿以死爲事史外猶有餘書承
芳抵官以來蕭然獨處齋閣此二者尤非夙昔之所多見也或謂
公別白大明節目大疏言論太激三者非自全之道此蓋其細者
也張寧撰
送行序

皇明名臣琬琰錄卷之十九

皇明名臣琬琰后錄之二十

南京刑部尚書張公墓志銘

瑄

童侍郎

軒

公諱瑄字廷璽別號古愚晚號安拙翁再號觀庵系出宋忠定公後世家句容曾祖曰宣元滁學教諭因僑寓於滁國初徙江浦遂占籍居焉祖克讓忠信孝友為鄉人所重考俊民行在左軍都督府都事以言事謫戍保安衛後用薦至京公時甫十歲妣喪隨考與姊李恭人僦屋以寓行裝屢空考後授知縣德清日趨公務公每旦受書於李恭人考常愛而器之曰吾聞祖以來有掩遺骸數萬者吾門昌大其在是兒乎後果以公貴祖考俱累贈資政大夫南京刑部尚書祖妣徐妣鄭黃朱顧俱贈夫人初正統閒公為縣學生始業舉子受禮經於姊夫李公侃尋中應天府辛酉鄉試刊行經義於錄明年李偕公同登壬戌進士觀政戶部李公後官至都察院僉都御史公以師禮事之終身奉李恭人如其母未嘗少衰甲子授刑部四川司主事時司寇俞公士悅待屬甚嚴每稱公

賢能以勵諸司戊辰以外艱去職景泰辛未服闋仍除湖廣司主事明年陞本司員外郎時太子少師兼吏部侍郎江公淵奉命南京等處公幹奉公才能欲與之俱適江以憂去不果是冬陞本部四川司郎中癸酉陞知府吉安吉安民素號健訟日不下數十百人公斷如流且屢辯疑獄痛革吏弊發奸摘伏如神吉民畏服然吉俗信鬼歲刻木以像神且冠裳聚眾迎送以徼福澤公禁之弗聽出遇諸途遂叱令棄像水中民首倡者悉寘諸法無何公遭重疾郡之長老皆曰神爲祟也請復之公執弗許病亦尋差郡民給路引者前例每引取銀四分謂之堂食前守悉爲已有公遵舊制祇收楮幣一貫仍爲公費丙子夏郡大饑公申上司不候報輒發廩以賑民賴存活者多郡學諸生有匱乏者輒分俸給之若彭教羅倫曾彥輩皆魁甲科爲名宦實公所造就也僚屬廉而貧者家有婚喪皆設法以助之又建閣於學以藏御書建祠於郡以祀忠節文廟府治橋梁道路皆修治完整公私一新時巡撫都御史韓

雍氣燄烜赫郡邑皆望塵雅拜惟公不爲屈蓋公居官剛正嚴明吏部每考治績恒居天下第一天順庚辰遂由郡守陞廣東右布政使去吉之日老稚扳留不獲存其靴郡中後人復建亭刻石以圖不朽公至廣會廣西流賊越境攻破屬邑連山公督官軍擒殺賊首莫文章等築城堡改邑治民賴以安賊徒周公轉等嘯聚於陽江縣黃江屯歲久道路不通新興縣頑民鄧李保糾結流賊殺害居民逋負糧差者幾二十年官不敢詰公皆勦除之甲申流賊復來劫掠民被害尤甚公復會兵逐殺賊乃遁去大籐峽蠻賊屢肆猖獗朝廷兩度出師頒給綵段銀牌等件以旌軍功公累受綵段一十八疋銀牌一十四面特賜公大紅織金雲鶴衣一襲銀錠寶鈔尤多後左布政使周鐸右叅政卓天錫相與歎公忠勤共求大學士商公輅爲文勒石以紀其績又嘗躬督各屬造預備倉六十二處修理陂塘圩岸四千六百六十六處修築廣州新會等府縣城垣一十二處廣袤尋丈若干瑩以磚石俱因民利而利之無

一怨者戊子轉左布政使先是各該吏典知印承差會同巡撫三司等官參撥公曰此布政司事也專之人莫敢侵己丑冬公滿九載當赴京軍民千餘奔走乞留於是巡撫鎮守等官交章薦公學行才識剛方仁惠乞留再任以慰民情詔可其奏辛酉朝廷錫誥命有操存端方才識通敏之褒封贈三代壬辰奉勅陞都察院右副都御史巡撫福建初所屬郡縣多無糧儲公命各建倉廩勸富民出粟以備凶荒民至今賴之沿海官軍先因事減支俸糧三十餘年遂以爲例公知其貧命依舊支給官軍感惠立石頌德閩安鎮出海有二港勝國時有鐵索橫截港口以禦海寇歲久廢沒公奏命所司造鐵索三每索長百有餘丈兩岸維以鐵樁中以舡二十隻駕之小港如大港之制而索差短由是海寇絕迹莫敢往來事詳載於學士林公文重脩閩安鎮記山海寇林壽六魏懷三等攻劫鎮城歲久不獲其鎮守等官屢被勅責公至盡皆成擒福安壽寧縣等地鄰江浙強賊羣聚阻塞道路公擒賊首葉旺葉春餘

黨盡散朝廷勅諭有處置得宜之褒鎮守太監盧蒙暴橫公裁抑之事聞革去鎮守人民稱快閩俗信陰陽拘忌有殯於家十餘載者公督屬責葬不數日出葬者七千餘棺甲午秋又奉勅巡撫河南風紀益振諸司少有不職公或知之輒惶懼謝罪時按察使何喬新副使陳選並有廉能聲公奏聞旌異後俱至大用人謂公有知人之明河南軍糧二十七萬石先在元城縣地方交兌公以爲元城非河南所屬難以鈐制改置倉於彰德水次軍民稱便乙未秋公以例入京議事因奏時宜若安插流民責成守令修舉武備甄拔滯才等一十八事該部皆議而行之河南大饑公發廩賑濟仍於城四門及各寺觀設粥以給饑者出官庫衣布以給寒者無居止者查關廂空屋土窯以處之活民不啻萬數戊戌改南京刑部左侍郎因見廣東司事繁卽添主事一員累歲繫逮罪囚不旬月閒各得其情問擬如律自是獄無冤滯壬寅秋以都御史侍郎通九載考滿赴京陞本部尙書南京御史何舜賓等坐犯贓罪微

州富民許通叟強奪人田當道爲之請囑公不聽咸正以法丁未
春公齒七十有一上章懇乞謝事退而家居尋受誥命贈封三代
如制公居家孝友慈愛每遇初度之日未嘗茹葷飲酒歲時祖考
忌辰亦必齋戒祭祀諸弟妹六人姪四人婚嫁教育之事公皆以
身任之先世產業悉讓諸弟不取仍以俸資周之雖疏遠宗族亦
皆使得其所初公將生母夢神授一兒旣而誕公容質俊麗目光
炯然孩提時性識聰敏稍長博極經史屢以學問師範於人諸生
若郁珍蔣達輩先後俱領鄉薦皆公門下士也爲詩文才思溢出
下筆立就自成一家且天性儉約於物無所嗜好惟聚書萬卷以
教子孫居官幾五十年自奉如寒士其視勢利蓋泊如也一日偶
得疾未屬續前數日猶作送儲考功赴召序聞地震起坐作詩皆
忠君愛國之語人多誦之平生所著有香泉稿二卷粉署餘閑稿
一卷凝清集八卷閩汴紀巡錄十七卷奏議八卷南征錄三卷安
拙類稿若干卷公生於永樂丁酉十七年七月七日卒於弘治甲

寅七年九月二十四日春秋七十有八夫人吳氏潘氏劉氏側室
查氏史氏魏氏楊氏生子男七人紘儒士學行方正雅有父風綱
山西布政司都事縉義官紘嘉興府檢校紘由舉人授樂安縣學
教諭綬應天府學生縉江浦縣學生於戲公學行淑諸人文章行
於世政事及於物功業著於時卓然爲國名臣雖用之秉鈞持衡
亦無不可今其已矣尙幸諸孤書香不墜豈天將食報於其後人
耶公旣卒該部以聞欽遣南京禮部致祭於家南京工部先以營
造墓域於江寧縣安德鄉唐家山之原將以弘治九年六月初九
日啟劉夫人之壙合葬先是公側室查氏夫人從子紘教諭就養
樂安終于官舍至是歸柩亦將窆焉諸孤先期奉其姻家陝西藩
司致仕左參議王公徽及其甥知府李公德恢所伏事行指軒衰
經稽顙乞銘且謂公遺囑必得童先生銘我瞑目無憾也顧軒不
腆之言奚足爲公有亡哉然公命也銘惡可辭銘曰偉矣張公才
鉅德宏敷歷中外名位兩崇粵昔乃祖傾廩惠窮長發其祥公實

慶鍾少而慧悟長益豪雄博稽經史智無不通逮登仕版剛介黜
同文章拔俗道義萃躬愛民如子事上以忠吉甌閩沐恩威並隆
禦災捍患所至成功肆晉司寇簡自九重執法不阿折獄在中矧
厚姻族資給甚豐瑤環瑜珥振振阜螽年踰七袞高朗令終唐家
之原馬鬣是封內銘玄室虹光燭空

知府張公言行錄

瑣

按察副使江源

張瓚字德潤廣東番禺人進士歷仕天順成化間官至知府卒年
六十二撫爲江南大都民繁物阜頗稱難治近年爲之守者惟閩
漳王公昇和易足嘉祥符王公宇清峻可尙耳今番禺張侯實兼
之焉而問學文章又過之遠甚有兄弟爭田者當路怙其重名久
不能斷侯一言定之有寄籍治內者前官憚其勢位莫敢差發侯
處之以公屬邑鄉豪殺人繫獄資緣貴要請囑百端而不爲之動
卒正其罪他如詭立戶計苟免科徵隱瞞丁口影脫軍匠與夫曹
屬糧里交通富民虐害良善吞併窮苦等弊革去幾盡而文學聿

興士風丕變故鄰境大旱連年饑殍盈道獨吾撫少豐不至甚乏
皆侯德足以格天感神且賑貸有方而然耳是以成化三年春郡
圃及四郊有野蠶成繭士民皆以爲侯之德化而侯若不聞今成
化四年夏境內野蠶作繭彌多眾遂詣庭聲賀願聞諸朝廷侯曰
休禎荐降聖世常有非不德能預聞之恐招物議止之黎近撰野蠶成繭歌
并却什器罷快手清詞狀抑豪右輕引錢制奸吏驅老兵絕乳媪
杜裁縫枷屠牛課諸生禮賢士不與燕會不徇私謁前之蠹政之
積弊一一革矣法不勝恩行必由式善者吐氣惡者潛蹤四民各
安其業無復先時之愁嘆非訾也瓊喜而忘寐每有公評廉健如
王祥符而仁恕過之翰墨如周莆田而公正過之當於古人中求
匹也禮部尚書徐瓊手書以長才治大郡正操利器遇盤根錯節時也清聲
雅聞溢於傳誦之口夫豈幸致南京吏部尚書王慎手書漳洲府知府張侯成
化十年夏到任秋七月洪水百姓淹沒發舟奔球活數百人給衣
食周財物亡者設齋具饌招魂以弔繼值旱災祈禱霽足學館從

新增眞負租具實奏免脩南橋民登坦途關港道大便灌溉士子
專經延他經以博人材鄉飲苟簡考禮宴耆碩以敦風化不爲勢
却撓法不爲奸瞞遣吏功德之盛皆爲實錄凡諸被患今列屋奠
居思欲以報生我之恩請文豎碑侯名瓊字德潤番禺人中進士
授主事以才擢知撫州通經學古才宏器遠威儀山立筆翰如流
廉靜惠利博浹物情願爲政若其緒餘今知潯州地之相去遼絕
民之相離日遠蒙惠懷德惟恐失墜雍按事實書謹以詔夫當道
者兵部郎中林讀漳州功德碑絕句云罷守三州臥兩山漳州面
目此碑間郡人欲識蒙菴老也傍斯文捉一班別紙錄上兩山先
生一笑作碑者林蒙菴於京師見其人慎許可人以是信之今
直靠他作證明師也蒙菴見拙詩當爲抵掌又云漳州功德碑絕
不類時樣文字亦一奇也絕句寄漳州林蒙菴刻于碑陰以彰太
守之美翰林檢討陳獻烏乎德潤乃至是邪方其進也予期君以
大用徵以常理謂其必得旣而不果遂迨其退也予期君以遐年

謂其不得於彼必得於此今也又不遂嗚乎德潤予以君故而今
而後不敢復評天下士也已大學士王

易州人物志

張鵬

戴給事中

銑

張鵬字騰霄號拙菴世爲保定涑水人曾祖思義祖彝仕國朝官
至慶府左掌史父槩兵部職方主事並以公貴累贈至資政大夫
太子少保兵部尙書公幼已負卓異不與里中羣兒嬉年十四失
所怙繼失所恃雖處癯疾而向學則勤勵不懈及入邑庠才思日
以充正統丁卯以詩經領順天府鄉薦景泰辛未中禮部會試廷
對賜同進士出身授山西道監察御史立朝譽謬有才名凡百施
爲務持大體略苛細嘗條奏時事關民之休戚者十而人服其切
直朝廷嘉納悉下有司施行之甲戌監會試公明之譽籍籍尋按
治隆慶等處乙亥監南和伯軍之湖廣丙子清理京畿馬政在在
卓振風裁賢聲益著天順丁丑武臣石亨恃寵作威福人莫敢犯
公奮不顧身率同列極譏其罪亨憾之竟被誣構謫戍遼東鐵嶺

衛尋改廣西南丹衛後亨事敗人服公晒見幾先甲申憲宗卽位
宥還乙酉召復舊官明年超擢福建按察使戊子夏廣西缺官巡
撫擢公都察院左僉都御史以往公常謫居其地備諳民夷土俗
凡政令之出甚合時宜而邊境用寧己丑言官劾中外大臣之不
職者誤及公上知公忠直獨留巡撫如故尋改理南京都察院事
是非予奪一以至公而臺綱振肅辛卯春復改都察院總督漕運
兼巡撫淮揚等處明年盜發境內申勅巡視鳳淮揚廬四府徐和
滁三州公以恩信爲治緝捕有方踰年盜息甲午仍還南京理院
事是年夏擢右副都御史巡撫寧夏丁酉召爲兵部右侍郎己亥
轉左侍郎壬寅特拜尙書甲辰春進階資政大夫冬加太子少保
自是多疾常在告蒙遣中貴湯藥之資偕太醫視療累乞致仕不
獲允後復請不已上察其意堅賜之勅俾馳驛以還命有司月給
米二石歲給役夫四人陞辭復賜鈔二千緡皆異數也實乙巳之
夏閏四月焉丁未今上卽位詔進資德大夫正治上卿居家優游

自適凡七年而終享年七十有二計聞詔有司營祭葬如故事賜
諡曰懿簡公之剛直貞介夷險一致凡六爲臺憲歷內地邊方者
八所至必感激自効竭盡心力而務臻宜民宜人之實其爲兵部
責任益重公以身殉國不計利害嘗戒僚屬曰處事不患不明特
患不公耳公則何事不可爲耶京營團操軍士多爲將領私役公
力陳其弊上卽日命內外大臣並臺諫官簡閱得數旣多得人且
精遂嚴私擾之禁申訓練之條營伍肅然故事主將偏裨缺人必
集廷臣各舉所知以待兵部請而用之年久寔廢或舉亦未盡公
公請覈實具名以聞否則有罰自是號稱得人遼東守臣以擒獲
老幼男女來獻者旣而悉分給中貴公懼將士肆貪殘以啟邊釁
具奏止之大同官軍失機於夏米公請治偏裨逗遛不進之罪及
大臣之統馭失律者並械赴京處置一時軍法大振雲南木邦爲
其屬孟密思柄專利侵侮恩柄因請自立爲官司領屬修職貢朝
議旣從之公言此夷未奉旨尙爾恣橫況從其請使之得志乎宜

降璽書以理論而抑之也上可其奏而人服其遠識公平居雖溫
和其處事則毅然執義不可奪有武臣冀得金齒衛叅將託權貴
人薦用公力言其人非將才不可用辯論反覆語益直色益厲而
竟不從有撫治流民者久不得遷上言流民非得風憲大臣治之
不可其意蓋自薦也公言是在人不在官如其怠曠雖風憲大臣
何益而事遂寢公臨政簡約每以生事喜功爲戒當歲饑四方奏
多盜而山西河南諸處尤甚公報言此輩特逼於饑不得已爲盜
耳惟罪首惡者一二餘悉宥之則其黨自散矣各道奉行未幾果
無事其居官處事蓋如此公爲人悃樸無華雖居顯要自奉如寒
士資性樂易莊重不立崖岸不輕笑語其色侃侃若不可親然待
人真誠故多樂爲之用云子六璇濟南府通判瑀珂玳琦瑾

皇明名臣琬琰后錄二十

皇明名臣琬琰后錄後集之二十一

副都御史謝公墓誌銘 士元

大學士李 東陽

公姓謝氏諱士元字仲仁其先上虞縣人在宋徙玉融州今福清
縣地也國初徙長樂縣始定居焉曾祖鍾祖琬考磐封建昌府知
府妣陳氏封恭人公以縣學生舉景泰癸酉鄉薦登甲戌進士授
戶部主事分納京儲首論時弊力與中官敵敵者忿幸公去繁其
羣吏因搆撫公罪不可得數年擢知建昌府建昌兵多竊民財武
官庇之公攝以危語皆畏法奸無所伏大新學校購書萬卷躬督
課授教習古躬禮表黃孝子譚節婦之門南城民得石像蒙以腐
鼠置屋瓦羣鴉噪其上民陽驚集眾發之以爲神趨者如市公取
其石碎于庭乃止有妖憑魯巫來言禍福忽自云吾畏謝公吾去
矣巫遂如常民有懷券訟田宅者公遙見輒謂曰何得以偽券給
我民遽伏罪僚佐問曰何以知之公曰彼所訟二紀前事其券乃
今式於是訟者漸引去郡再飢公稍出私俸富民爭開廩延糴民

賴以不困大理卿夏公時正考覈官吏薦公治行朝廷給誥命封其父母及妻九載民詣闕請留加從三品俸仍知府事以內艱去改廣信府治如建昌永豐縣有銀冶久闕處州越境盜鑛行旅幾絕公勒民兵東至靈鷲山下直趨之邏卒遇賊二三輩矢輒發公驚曰此誘我也亟止之不及伏果四起賊環刺公中左股血流滿鞞有巡檢大呼曰此謝公也賊乃退公裹槍出戰擣其窟而還後改永平府以外艱不赴服闋擢四川右叅政流民寇東鄉縣凡三劫公捕殺數百人或議徙縣公不可命守吏甃城浚隍戍以土兵後竟無變建始縣有頑民挾縣吏或邀于路以怵代者部使不至凡五十年公徑往得首惡羣黨盡散居六年陞本省右布政使上以全蜀非公不可乃用廷議擢都察院右副都御史巡撫其地吐番有大小二姓生熟二虜相煽爲亂吏告急公託行邊繕亭障嚴斥喉簡軍實番覺有備帥其醜獻羊豕羅拜道左公諭遣之奸民多代輸邊儲實不時納公核其數得米十三萬有奇歲大侵民流

入藩府公置廣室十餘區爲粥以食餓者飲病者以藥死則葬諸叢冢願歸者給驛傳送之所活萬計蓋其剴繁應變不局繩墨卒克有濟多類此可謂難已公在官兩迎父養事從父甚謹三弟終身不異財所得俸入使弟姪主其籍聚食干指或弗給自啜粥于堂以率儉族孤而貧者必爲之所建祠祀先置祭田若干畝家政尙肅內外秩秩尤好學非甚疾不廢吟諷所藏有約菴稿若干卷詠史三百首行于時公配陳氏賢而克相累封恭人三子長廷柱陳出舉鄉貢士次廷棐廷最縣學生孫三本寬本忠本裕公生洪熙乙巳三月乙亥日卒弘治甲寅六月庚辰日享年七十計聞上命禮部遣祭工部遣官營葬廷柱卜卒之又明年丙辰十二月二十四日葬公于懷安雞籠山奉狀請余銘墓子聞公夙具才行所至有聲績而爲郡尤著在建昌士夫爲立生祠刻碑頌德公聞而止之比去碑復立後嘗道郡郡人空巷出迓至擁其輿不可行此事編脩羅景鳴言甚悉景鳴嘗受公業今所爲著狀者也銘曰士

必歷試其長乃見公閱二郡治行獨擅久者建昌澤施尤徧前曹
後臺罔弗諳練內訓耕穡外督攻戰隨時樹功曷往非善民思太
守若覲公面彼情弗知公在藩憲史家者流有狀如傳庶有民社
干我民勸

王氏先塋之碑

吏部尚書王恕

王文肅公

傳

上卽大寶位繼承洪業圖任舊人乃首詔起尚書王公于家命有
司勸駕在道辭比至京又辭皆不可立拜吏部尚書未幾加太子
太保又辭不可蓋每辭皆答以溫詔有年德老成久繫人望之褒
公感知遇僣俛就職銓鏡人物澄汰流品振幽滯杜請託異時正
賦宿弊一旦掃除略盡至於大政事大號令凡廷論未決者公正
色讜言力扶國是聞者拱服蓋公既悉心奉國上亦虛己以聽志
叶道同行計施豈非千載一時之嘉會哉公在位五年爲弘治
四年五月賜誥命進階光祿大夫勲柱國勉恩三代曾祖彥成祖
眞考智皆贈光祿大夫柱國太子太保吏部尚書曾祖妣張氏繼

侯氏祖妣張氏妣周氏皆贈一品夫人雲漢之章照耀門闕雨露
之澤滲漉泉壤公感激圖惟不朽適予自南都入朝過予言曰恕
世家關中高祖樂耕府君以上皆居櫟陽司馬村元至正中曾祖
始徙三原之龍橋龍橋距司馬村七十里實爲唇齒之邦曾祖字
安止性耿介不羣治家勤儉人有緩急赴之恐後卒葬縣北三家
里與二妣合兆祖字惟眞侯夫人所出居鄉恂恂執禮嘗兩爲鄉
飲大賓縣大夫雅敬慕之生四子長諱禮好學樂善言動不苟卒
葬三家里祖塋娶任氏守節四十年辛勤撫育遺孤次卽先考字
仲智號西園翁淳誠謙虛禮賢好施篤於教子配先妣有賢行次
諱德篤實不欺勤於治生娶李氏次諱和爲人質直非善不交娶
袁氏恕昔爲寺副京師正室蓋夫人卒歸葬西園時景泰辛酉六
月也遂舉祖考妣伯妣叔考妣數喪而同窆焉天順甲申繼室張
夫人卒于江西藩司亦歸葬西園成化乙酉恕擢副都御史未久
先妣卒朝廷遣官賜祭戊子先考卒復賜祭遣進士蔡晟卽西園

治瑩域以己丑十月二十日襄事於是享祭之堂制勅之碑法所
宜有靡不具完扁其門曰王氏先塋厥後叔和兄約齋卒亦葬于
其次惟恕學寡能鮮幸際明聖以至有今日皆先祖考之敷遺也
不有紀述何以昭示我後人使知所自而廷承之乎君其爲我作
先塋之碑垂諸悠久幸莫大焉予聞公之家自渭川處士以來傳
六世積德百餘年宜臻顯融者久矣然猶務韜晦訖不一施用以
遺之後人以俟公而大發焉此公所爲積學勵行以出應時需敷
歷中外致位通顯而晚益際遇輸忠竭誠茂建勲業爲國元老蓋
公旣發其祖考之遺以顯融而光大之而復歛其餘贏以遺之子
若孫而公子七人並稱時彥一官留府兩舉鄉闈文學政事無愧
世濟諸孫纍纍亦復秀穎名門世胄當時鮮儷大書深刻植之墓
隧以侈上賜以彰先德垂之無窮詎曰匪宜詩曰三原之王系出
太原譜迭其傳派演枝蕃櫟陽之居龍橋之遷一德相承代產仁
賢蓄而未宣其宣其施其在公焉維公挺生英稟卓異奮身儒科

以階祿仕自痺而崇由遠而邇出入五朝綿歷四紀指斥權倖觸
冒忌諱一作匡拂時病磨切近貴苟利國家他非所計維公忠誠帝所簡知公
休于家驛使交馳公來在廷國有著龜一節始終不植黨私維帝
聖明日予舊老豈無寵章覆其祖考秩之冢卿爵之宮保兩國之
封載錫嘉號公拜稽首祇服休命匪臣之能祖考之慶懿美斯彰
優渥殊幸曷顯詩之傳之有永睠彼西園松柏蒼蒼三家里塋蔚
乎相望遺蔭後昆俾熾而昌更于百年眎此石章

大學士文莊正公墓誌銘

何尙書喬新

弘治八年春少保兼太子太保戶部尙書武英殿大學士正公以
疾臥家連章乞致仕優詔不允遣醫賜藥中官問疾賜食物是歲
二月戊午薨于城東之私第計聞天子嗟悼輟視朝一日賻寶鈔
一萬貫特進左柱國太傅諡文莊命禮部尙書倪岳左侍郎徐瓊
諭祭葬及祥禫亦皆有祭遣官次第行之工部差官造墳又官其
孫營尙寶司丞仍命行人宋愷護其喪歸將以明年十二月乙酉

葬于五龍池之原時喬新致政家居營遣使以公門生翰林院編脩蔣冕所述行狀求玄堂之銘且致其祖母夫人之言曰公治命也幸毋辭予憶在朝時公暇輒與公相過從論古今事得失公嘗語予曰吾與子相知不啻君實景仁不幸死則后死者銘之予曰諾哉意公言直戲耳別去四五年公猶不忘前乃知非戲也嗚呼方今作者如林子何人敢銘公墓然欲固辭又負公久要之言乃敘而銘之公諱濬字仲深其先世家泉之晉江元季有官于瓊者遭亂不能歸遂占籍瓊山曾祖諱均祿隱居不仕祖諱普臨高縣醫學訓科考諱傳賢而蚤卒及公貴曾祖祖考皆贈官同于公曾祖妣李氏祖妣柯氏妣李氏皆贈一品夫人公初舉進士改翰林院庶吉士與修寰宇通志書成升擢編修憲宗皇帝即位初開經筵以公充講官有白金文綺之賜成化元年以九載秩滿陞侍講脩英宗皇帝實錄成陞侍講學士丁母夫人憂解官歸服闋詣京復舊職奉命脩宋元通鑑綱目成陞翰林院學士十三年陞國子

監祭酒十六年進禮部右侍郎仍掌監事二十三年冬陞禮部尚書掌詹事府事修憲宗皇帝實錄公爲副總裁弘治四年八月實錄成加太子太保職如故是歲十月命公兼文淵閣大學士入內閣司制誥典機務公三上章辭上不允久之乃就職七年陞少保改戶部尚書武英殿大學士仍兼太子太保自始仕至今四十有二年矣公少孤力學天資過人六歲能詩弱冠著論謂許文正公仕元無能改於其俗又不得行己之道不仕可也耆儒碩師見其論初甚駭之已而又大歎服以爲先儒未有言及此者正統甲子舉于鄉爲廣東鄉試第一名兩試禮部名在乙榜當授教職辭卒業大學祭酒蕭先生鑑深器重之爲之延譽繇是名益重景泰甲戌復試于禮部名在前列建試爲第二甲第一名及選爲庶吉士讀書秘閣自六經諸史九流箋疏之書古今詞人之詩文下至醫卜老釋之說靡不探究發之文章雄渾壯麗四方求者沓至碑碣銘志序記詞賦之作流布遠邇然非其人難以厚幣請之不應與

修英廟實錄或謂少保于謙之死當著其不軌之迹公曰己巳之變微于公天下不知何如武臣挾私怨誣其不軌是豈可信哉眾以爲然功過皆從實書之兩廣用兵公上書李文達公具陳平寇方略文達繳上之詔以其策付總帥其後蠻寇削平用公策爲多時經生文士爲文以奇怪相高或不可句公考南京鄉試及禮部會試凡怪詞險語皆痛斥之怨排不恤也及爲祭酒尤諄諄爲學者言之文體乃復渾厚士有慕道德者或過爲詭異之行以徼名公因考會試發策言之士乃知道以中庸爲至詭異不足貴也其在太學論者謂師道尊嚴無愧李文忠公總理微密則文忠不及嘗謂朱子家禮最得崇本敦實之意然儀節略焉爲考諸儒所言作家禮儀節使好禮者可舉而行朱子微言散見於傳註語錄學者粹未易求乃采其精切者彙爲二十篇倣魯論語作朱子學的朱子綱目以正統爲主然秦隋之末有不可遽奪漢唐之初有不可遽予者乃作世史正綱著世變之升降明正統之偏全又謂西

山真氏大學衍義有資治道而於治國平天下之事缺焉乃采經傳子史有及於治國平天下者附以已見作大學衍義補今天子嗣位之初公書適成乃表上之上覽之甚喜批答有曰卿所纂書考據精詳論述該博有裨政治朕甚嘉之賜白金二十兩紵絲二表裏陞公尙書且命錄其副付其書坊刊行憲廟實錄成賜白金八十兩羅段八表裏仍遷宮保踰月遂有入閣之命蓋簡在上心久矣公雖堅辭皆溫詔勉飭不允所辭公在位務以寬大啟上心忠厚變士習凡人才進退政事廢舉一惟祖宗舊典是循首上二千二事陳時政之弊又請訪求遺書上皆嘉納洪武永樂以來凡百司朝覲命吏部都察院考其尤不職者乃黜之不過數十人其後吏部患人言務以多黜爲公方岳以下少有微瑕輒黜之黜者亦不敢訴公深知其弊言于上曰唐虞三載考績三考黜陟今有居官未半載而黜者所黜徒信人言未必皆實此非唐虞之法亦非祖宗舊制也上深然之會吏部上大小庶官當黜者幾二千人

乃勅凡歷官未三載者俱復其任雖經一考非有貪暴實跡者亦勿黜蓋用公之言也醫官有療疾往來公家者以失職怨冢宰王公奏許其短眾疑奏出公意科道以爲言上察其誣待公益厚公性剛直與大臣論政義所未安必反覆辯論言官論事亦以是非詰之不肯媵媵取悅公無歲不求歸前後凡十三疏上皆不允問勞賜賚之使踵相接于門文臣承恩眷未有如公者先娶金氏繼娶吳氏贈封皆一品夫人子男二長曰敦吳夫人出以蔭補國子生博學工文章先公五年卒次崑次崙皆殤亡季曰京側室唐氏出女二適馮顥岑英孫男二長卽當次甸平生著述甚多有瓊臺類稿瓊臺吟稿家禮儀節朱子學的世史正綱大學衍義補遺行于世又作莊子直解未成公博極羣書有舉僻事問之則曰出某書某篇退取書閱之良是尤熟本朝故典樂爲學者道之纏纏如目前事公今已矣世豈復得斯人哉嶺南人物自張文獻公有聲于唐余襄公崔清獻公有聲于宋迨公四人焉公晚登政府疾病

半之故見於功業者僅若此然大學衍義補一書其經濟之才可見矣使得久其位盡行其言相業豈三君子所及哉銘曰嶺海之隄靈氣充塞挺生偉人翊我皇極其人伊何曰惟文莊醅懿內實英華外彰乃官詞林乃登延閣乃侍講筵乃典國學穹碑厚碣輝映四方緗編青篇百世有光帝曰咨汝其代予言服休迓衡時惟汝賢公拜稽首臣老弗克寵命薦臨公乃就職公之在位調膺均平百吏奉法百度惟貞文爲國華位登保傅天旣生公奪之何遽立言則多蓄未盡施方策所存百世之思石麟峩峩南海之隩文莊之墳過者必肅

皇明名臣琬琰后錄二十一

皇明名臣琬琰后錄後集之二十二

翰林檢討白沙陳先生行狀

獻章

張主事

謝

先生諱獻章字公甫姓陳氏高祖判鄉曾祖東源祖永盛號渭川少戇不省世事好讀老氏書嘗慕陳希夷之為人父琮號樂芸居士讀書能一目數行下善詩卒之一月而先生始生母太夫人林年二十有四守節教育之祖居廣之新會縣都會村至先生始徙居白沙村白沙村去縣北二十里許天下士大夫重先生之道不斥其名字因其稱之曰白沙先生至於兒童婦女亦皆目其為陳道統云宣德三年戊申十月二十有一日生於都會先是有望氣者言黃雲紫水之間當有異人生焉黃雲紫水者新會之山川也又有占象者言中星見浙閩分視古河洛百越為鄒魯符先儒文公之說及先生生身長八尺目光如星右臉有七黑子如北斗狀音吐清圓大類中州產嘗戴方山中逍遙林下望之若神仙中人也生前一夕太夫人夢白龍入室其光如晝諸異夢類是自幼警

悟絕人讀書一覽輒記嘗夢拊石琴其音泠泠然見一偉人笑謂
曰八音中惟石音爲難諧今諧若是子異日得道乎因別號石齋
既老更號石翁少讀宋亡匡山諸臣死節事輒掩卷流涕一日讀
孟子有天民者達可行於天下而後行之慨然歎曰大丈夫行已
當如是也弱冠充邑庠生其師見其所爲文異之曰陳生非常人
也勢利不足以羈之矣明年丁卯中鄉試第九人錄經義一篇戊
辰辛未兩赴禮闈不第聞江右吳康齋徵君與彌講伊洛之學於
臨川之上君徒步上謁睹其風範讀其條教遂棄其學而學焉時
年二十有七也與彌性嚴毅來學者未與語先令躬稼獨待先生
異朝夕與之講究如家人父子受業歸暇日或與門徒習射禮於
曠野未幾流言四起眾皆危之先生漠如也時翰林院侍讀學士
錢溥謫知順德縣事雅重先生遺書先生亟起母貽太夫人憂先
生以爲然遂復遊太學祭酒邢讓一日試先生和楊龜山此日不
再得詩其辭曰能饑謀藝稷冒寒思植桑少年負奇氣萬丈磨青

蒼夢寐見古人慨然悲流光吾道有宗主千秋朱紫陽說敬不離
口示我入德方義利分兩途析之極毫芒聖學信匪難要在用心
臧善端曰培養庶免物欲戕道德乃膏腴文辭固糝糠俯仰天地
間此身何昂藏胡能追逸駕但能漱餘芳持此本鑽柔其如盤石
剛中夜攬衣起沉吟獨彷徨聖途萬里餘髮短心苦長及此歲未
暮驅車適康莊行遠必自邇育德貴含章邇來十六載滅迹聲利
場閉門事探討蛻俗如驅羊隱几一室內兀兀同坐忘那知顛沛
中此志竟莫強譬如濟巨川中道奪我航顧茲一身小所繫乃綱
常樞紐在方寸操舍決存亡胡爲謾役役斷喪良可傷願言各努
力大海終回狂讓得之驚曰龜山不如也明日颺言於朝以爲真
儒復出由是名振京師一時名士如羅倫章懋莊昶賀欽輩皆樂
從之遊欽時爲給事中聞先生議論歎曰至性不顯實藏猶羶世
卽用我而我奚以爲用卽日抗疏解官去先生旣出太學歷事吏
部文選日捧案牘與羣吏雜立廳事下朝往夕返不少怠郎中等

官皆勉令休對曰某分宜然也識者謂其抱負之大而克勤小物如此得孔子爲委吏乘田之意侍郎尹旻聞而賢之遣子龍從學先生力辭凡六七往竟不納成化己丑禮闈下第有神見夢於人曰陳先生卷爲某投之水矣其後二十年御史鄭文聞之禮部尙書從吏云某之爲也先是先生寓居神樂觀科道羣公往來請益無虛日旣而某被科道劾疑出先生故特惡之深且曰彼戴秀才頭巾爾動人若是脫居要路當何如邪揭曉編脩李東陽爲同考試官主事經房索落卷不可得欲上章自劾冀根究焉不果時京師有會元未必如劉戩及第何人似獻章之謠以及與夫販卒莫不嘖嘖歎恨門官某夢人太息曰天下經綸不屬陳先生矣先生亦自夢一龍躍出袖中竟沒于井識者聞之知爲先生道不行之兆也羣公往慰先生先生大笑莊昶進曰他人戚戚何太低先生大笑何太高二者將無過不及邪先生領之其居神樂也北士麤鄙者數人約日必共往困折之及見先生神觀洞然氣沮口噤不

能發一言致恭而退因語人曰異人也今右布政使周瑛時同遊太學所藏古人墨蹟愛踰拱壁先生借閱經旬瑛數取先生笑曰試君爾君得非所謂玩物喪志者乎瑛於是有所警發南歸羅倫贈文略曰曰沙先生處南海者二十餘年矣觀天人之微究聖賢之蘊克道以富尊德以貴天下之物可愛可求漠然無動其中者莊昶詩曰百年吾道在東周天下斯人豈易求誰爲齊王留孟子自知堯舜有巢由鳳凰氣象終千仞北斗光芒共九州萬里東南溟海闊蒼生何處問乘桴旣歸杜門潛心大業而道價響天下矣四方學者日益眾往來東西兩藩部使以及藩王島夷宣慰無不致禮於先生之廬先生日飲食其賓客了不知其囊之罄也自朝至夕與門人講學賓友論天下古今事或至漏下疊疊不少厭倦翌旦精神如故雖少壯者自以爲莫及也江右藩臬左布政使陳煒等修復白鹿洞書院成以山長書幣走生員劉希孟等聘先生爲十三郡士者師先生報書謝不往壬寅廣東左布政使彭韶上

疏略曰臣聞古昔聖帝明王諮詢敷求罔間遺逸小或致之夫或起之勤則賴以成顯著之事功靜則因以繫士心之嚮慕聲望手采蔚爲國華竊見依親監生陳獻章心術正大識見高明涵養有素德性堅定給假回還杜門養志沉潛聖賢之書實窺體要通達事物之理有見精微今年五十餘讀書踐履愈覺純熟孝義著聞人皆感動臣等自度才德不及獻章萬萬猶且叨食厚祿顧於獻章醜儒反未及見用非惟臣等之心誠有不安抑恐國家不及收用坐失爲善之寶也伏見天順年間英宗皇帝聞撫州民人吳與弼文行高古特加禮聘處以宮僚奈緣與弼老病辭不供職是以未見作用之效今獻章年方強盛大非與弼之比伏乞聖明以禮徵召必有以補助聖德風動士類疏聞憲宗皇帝可其奏命有司以禮勸駕先生以母老並久病辭時巡撫右都御史朱英懼先生終不起也具題薦末云臣已趨某就道矣因曰先生萬一遲遲其行則如予誑君何先生不得已起至京師朝廷用故事勅吏部考

試會疾上疏略曰臣累染虛弱自汗等疾又有老母朝夕侍養不能赴部聽選成化十五年以來左布政使彭韶右都御史朱英前後具本薦臣堪充任使吏部移文廣東布政司等衙門趣令起程臣以舊疾未平母年加老未能輒行府縣官吏承行文書日夕催迫不免強起就道而沿途病發隨地問醫扶衰補羸僅不大憊於成化十九年三月三十日朝見乃以久勞道路舊疾復作日復一日病勢轉增耳鳴痰壅面黃頭暈視昔所染無慮數倍眾目所覩不敢自誣又於八月二十二日得男陳景陽書報臣母別臣以來憂念成病寒熱迭作痰氣交攻待臣南歸以日爲歲臣病中得此神魂飛喪仰思君命俯念親情展轉鬱結終夕不寐臣之愚迷實不知所以自處也臣自幼讀書雖不甚解然於君臣之義知之久矣伏惟我國家教育生成之恩陛下甄錄收采不遺卑賤之德至深至厚於此而不速就以圖報稱於萬一非其情有甚不得已者孰敢驚虛名飾虛讓趨趨進卻於日月之下以冒雷霆之威哉臣

所以一領鄉書三試禮部承部檄而就道聞君命而驚心者正以此也緣臣父陳琮年二十七而棄養臣母年二十四而寡居臣遺腹之子也方臣幼時無歲不病至於九齡以乳代哺非母之仁臣委於溝壑久矣臣生五十六年臣母七十有九視臣之衰如在襁褓天下子母之愛雖一宜未有如臣母憂臣之至愛臣之深者也臣於母恩無以爲報而臣母以守節應例爲府縣所白已蒙聖恩表厥宅里是臣以母氏之故荷陛下之深恩厚德又出於尋常萬萬也顧臣母以貧賤蚤寡俯仰無聊殷憂成疾老而彌劇使臣遠客異鄉臣母之憂臣日甚愈憂愈病愈憂憂病相仍理難長久臣又以病軀憂老母年未暮而氣則衰心欲爲而力不逮雖欲效分寸於旦夕豈復有所惜哉臣所以日夜憂憊欲處而未能者又以此也夫內無攻心之疾則外不見從事之難上有至仁之君則下多曲全之士惟陛下以大孝化天下以至誠體萬物海宇之內無匹夫匹婦不獲其所者則臣之微亦豈敢終有所避而不自

盡哉伏望聖明察臣初年願仕之心憫臣久病思親不能自己之念乞放臣暫歸田里日就醫藥奉侍老母以窮餘年俟母養獲終臣病痊愈仍前赴部以聽試用則臣母子未死之年皆陛下所賜臣感恩益厚圖報益深雖死於道路無所復辭矣疏上憲宗皇帝親閱者再三明日授翰林院檢討俾親終疾愈仍來供職蓋異數也先生以表謝其略曰臣本菲材誤蒙薦舉又以老母在念沉痾在躬未得以仰承試用陛下憫其愚誠不加誅責使少寬旦夕之假已云幸矣而又慰之以溫言寵之以清秩使遂其欲去而勉其復來此誠天地之量日月之明雨露之恩出於尋常條格之外者臣雖至愚亦知銜負恩德圖報稱於親終疾愈之日不敢負朝廷待士之盛意不敢違臣子效用之初心也又曰臣瞻望朝廷違離在邇雖圖報有日而遲速未古俯仰愧怍無任感激戀慕表旣上又遲遲至於旬日始買舟南去學士李東陽贈別詩云只有報恩心未老更無辭表意全真諭德陸欽詩云逍遙佳客恣吟哦古寺

心齋長薛蘿本爲愛君觀國屢可堪思母望雲多東郊信有靈光
在西土空聞鳳翼過應笑病夫方鑄錯汗顏何處逐顏波蓋實錄
也某先生同省人也素忌先生重名及至京師使人邀先生主其
家已而先生僦居慶壽寺某銜之後因纂脩實錄陰令所比誣先
生學士某見之不平爲削去歸經南安知府張弼問出處對曰康
齋以布衣爲石亨薦所以不受職而求觀秘書者冀得間悟主也
惜乎當時宰相不悟以爲實然言之上令受職然後觀書殊戾康
齋意遂決去某以聽選監生薦又疏陳始終願仕故不敢僞辭以
釣虛名或受或不受各有攸宜爾弼唯唯暨歸歲有薦辟皆援詔
不行初應詔而起也道出羊城所至觀者如堵至擁馬不得行歸
之日有祥雲五色遮其第經日始散弘治改元以來郎中等官婁
性潘府萬某周某等先後疏薦庚申給事中吳世忠以先生及尙
書王恕侍郎劉大夏學士張元禎祭酒謝鐸等八人同薦與二三
儒臣入內閣柄用上方勅吏部查勘而先生歿矣是年三月十日

也享年七十有三歿之前數日蚤具朝衣朝冠命子弟扶掖焚香
北面五拜三叩首曰吾辭吾君復作一詩云託仙終被謗託佛乃
多修弄艇滄溟月聞歌碧玉樓曰吾以此辭世歿之日頂出白氣
勃勃加蒸竟日乃息前一夕五鼓鄰人聞車馬駢闐異之急出見
一人若王者狀儀節甚都出先生廬而去以爲大官至及旦詢之
無有也先是知縣左濬以醫來先生病已亟矣門人進曰藥不可
爲也先生曰飲一勺盡朋友之情飲已作詩遣之沒後一月提學
僉事宋端儀移文當道請入祀鄉賢祠都御史鄧廷瓚疏乞恩典
草已具尋卒御史費鎧巡撫雲南都御史李士質俱疏乞不拘常
例賜與贈諡諭祭不報是年七月二十有一日葬于圭峯之麓辛
向之原遠近會葬者幾千人左布政使周孟中賻白金三十星助
葬誄之以辭刻石于墓三府暨藩臬諸公門人親友遠近相續設
奠致賻殆無虛日於戲生死哀榮吾於先生見之矣先生少負氣
節每出少紉歸輒對伯兄泣不食房婢偶露體告太夫人必黜之

乃已初待學者甚嚴晚更平易孝弟出於天性事太夫人甚謹太夫人非先生在側輒不食食且不甘先生在外太夫人有念輒心動亟歸果然母愛子慕惟日不足太夫人頗信浮屠法及病命以佛事禱先生從之御史王鼎曰此見先生變通處也北行時不能別太夫人欲傲徐仲車故事伯兄不可曰吾弟爲人子吾獨不爲人子乎兄弟泣爭義感行路太夫人歿以七十年之孤子居九十年之母喪哭擗食素一如先王之禮太夫人耄耄康強如壯先生以古希年顧多病嘗慮一旦身先朝露不能送太夫人終故自太夫人七十年之後每夕具衣冠秉燭焚香露禱于天曰願某後母死也後喪太夫人服闋絕不衣錦繡曰向者爲親娛耳通判顧叔龍襲見先生束木帶解所束玳瑁帶贈至是反之一念衡山靡聞朝夕曰自今以往未死之年皆幸也事伯兄如父坐必隅坐雖跡處山林其愛君憂國之心視諸食祿者殆有甚焉憲廟之升遐也哀詔至先生如喪考妣有詩曰三旬白布裹烏紗六載君恩許臥

家溪上不曾携酒去空教明月管梅花知言者讀之當知先生之心無一日不在天下國家也爲人豁達大度不與物競未第時鄰人有侵其屋地者欲威之以力揚言於眾曰陳氏子異日他出我必辱於途及見不覺自失先生曰尺寸地吾當爲若讓其人慚竟不能作惡而去又有侵其田者處亦如之後復有盜葬其祖墓者先生怒曰此義不共戴天也彼不卽悛吾卽訟之官吾敢沽虛名而忘大義哉盜葬者聞之果悛巡撫湖廣都御史謝綬遺先生壽木甚美一日其交厚陳某卒遺言必得木如先生者其子以告卽舉以畀之林良者以畫名天下當作一圖爲先生壽惠州同知林璧至閱之愛甚亦卽畀之無吝色知縣趙某頗著貪聲懼先生遇當道露其事遺白金數錠爲太夫人壽先生不得已受之戒家人勿啟後某以贓去官追而還之其人感泣提舉汪廷貞慕先生特甚在海北時作懷沙亭以寓仰止亦數以白金爲先生壽其卒于官也盡封還以爲賻參政伍希淵僉事戴中輩以次各遺白金欲

新先生居卻不可乃營小廬山書屋以處四方學者初年甚窶嘗
貸粟於鄉人僉事陶魯知之遺田若干頃晚年按察使李士實倣
鄭富公故事破數百金買園一區在羊城之北甚廣先生封券至
于三四往返卒俱不受御史熊達倣洛陽故事欲建道德坊於白
沙以風士類先生不可乃議創樓於江滸爲往來嘉賓盍簪之所
榜曰嘉會先生曰斯可矣先是達亦以疏薦先生于朝大略謂宜
及先生年未艾而亟用之也都御史鄧廷瓚檄有司月致米一石
歲致人夫二名卻之以詩云孤山鶴啄孤山月不要諸司費俸錢
行人左輔出使外夷以其師意致白金三十星亦拒而不受其視
利若將挽焉如是太夫人兄弟之子陳敬幼無依先生收育教之
成人至割田廬以樹其家嘗買婢得邑人尹氏女旣而知之歎曰
良家子也命內人撫育如己女及笄擇婿嫁之友人莊昶病遺書
求先生門人知醫范規者往規者不能赴先生卽備行纏服食津
遣與人交無生死炎涼之別都御史朱英樞歸桂陽爲文遺子不

遠數千里設奠尙書彭韶御史袁道經歷張黻輩之歿也亦然其
聞羅倫袁道張黻之訃也皆設位哭爲之總服三月參政胡榮爲
提學僉事時雅重先生嘗選生員有異質者十餘人往受業今學
士梁儲參政李祥輩與焉其後榮遭母憂先生特行弔禮於新喻
及祭吳與弼墓於崇仁羅倫墓於永豐訪莊昶宅於江浦其論治
道以正風俗成人材爲急務知縣丁積之初知新會縣事也出其
鄉人給事中董旻書爲介求執弟子禮先生百凡啟迪以致四禮
大行民愛之如父母及卒于官先生綜理其後事如已事後民立
祠于白沙先生記之其始終成就皆先生之力也顧叔龍爲同知
知德慶州卒事遭不測先生毅然任其事曰朋友之責也後聞其
子某至乃已翰林院庶吉士鄒智以言事謫石城吏目其父自蜀
來怒其去官也日撻之賴先生諭之以理始釋其後智卒于順德
也劉大夏時爲右布政使吳廷舉時爲順德縣知縣先生相率厚
賻擇人扶而歸之李承箕裹糧自嘉魚數千里從學先生服食行

纏待如子弟復築楚雲臺以居之臺榜一聯云有月嚴光瀨無金
郭隗臺學士王鏊聞而歎之盛稱先生出處之正見黃公釣臺記
東筦林光始有志於學後爲貧累先生欲成之謀田於肇慶同知
張吉以光不歸乃不果其接引後學隨人材大小而成就之類如
此嘗慕先哲宋丞相崔菊坡之爲人也迎其像爲文祭于家隅坐
瞻仰若弟子之於師者久之程節婦鍾氏子也孀居二十七年貧
甚先生旣爲詩以嘉其節復遺帛以周其貧君子謂使先生大得
志表先德舉賢才當不遺餘力也其見義樂爲如飲食焉如是厓
山大忠祠慈元廟之建與夫祀典之舉也皆發議於先生與副使
陶魯右布政劉大夏僉事徐紘共成之大忠祠成太夫人夢金冠
三人從甲士數百謝于門慈元廟之未建也先生夢一女人后飭
立于大忠之上曰請先生啟之後十年建廟卽其所也故先生弔
慈元詩有依稀猶作夢魂通之句先生精神時與神明通居外海
陳謙宅有異人來見嘗夢遊天台至第八重而覺又夢一長髯道

士以布囊貯羅浮山遺之八月八夜忽夢玉宇無瑕碧雲燦爛南
斗下大書八字下有四人面西而行或隱或見臨沒夢與濂溪兩
厓答歌於衡山之五峯皆紀之以詩蓋其神之極清故所感如是
昔人所謂夜驗之夢寐者也北歸時泊舟江泝夜半有人呼急起
未幾水至溺死人畜無算因得免先生德氣粹面盎背無貴賤老
少莫不起敬給事中賀欽執弟子禮旣別肖先生小像懸于家之
別室有大事必啟焉羅倫改官南京脩撰先生謂曰子未可以去
乎倫卽日解官去按察使薛綱始疑先生及得於觀感乃悔歎卽
欲解官從學有詩曰欲拋事業留門下老驥那能學駿奔進士姜
麟以史事使貴州特取道如白沙以師禮見先生出曰吾闕人多
矣如先生者耳目口鼻人也所以視聽言動者殆非人也吾何以
名哉至京師有問之對曰活孟子活孟子都御史韓邦問劉洪官
廣東藩臬時每見詡一則曰無緣一則曰無福以不見先生爲恨
也嶺南士遊國學者北士必問曰遊白沙先生門否以一字一墨

爲符驗而因之以輕重其人焉壬寅別都御史朱英于蒼梧英預
約束參隨官俟先生至掖之從甬道出入先生力辭不能英歎曰
古之聖帝明王尊賢之禮有膝行式車者況區區乎有中貴謁先
生廬至江滸卻肩輿走數百步入京師時經南安知府張弼傲曹
參師盍公禮以待先生道出淮陽總戎平江伯陳銳往復差官具
人船護送極其禮意之隆暮年欲卜築衡山都御史沈暉創屋士
人某等割田以待左布政使周孟中甫下車卽謁先生於白沙欲
請先生入省南面坐受拜咨問以風一方以先生病不果嘗經畿
內山鄉熱甚思生菜值山民植者良少前此貴客重價求之弗獲
先生至山民羣來獻之寓京師時走家僮市靴於市工人聞自先
生亟易以佳者其至誠能動又往往如是先生之始爲學也激厲
奮發之功得之與粥爲多自臨川歸足跡不至城府朱英時爲參
議造廬求見卒避不見閉戶讀書盡窮天下古今典籍旁及釋老
稗官小說徹夜不寢少困則以水沃其足久之乃歎曰夫學貴乎

自得也自得之然後博之以典籍則典籍之言我之言也否則典
籍自典籍而我自我也遂築一臺名曰春陽曰靜坐其中足不出
闕外者數年有答張元禎問學詩曰古人棄糟粕糟粕非真傳眇
哉一勺水積累成大川亦有非積累源泉自涓涓至無有至動至
近至神焉發用茲不窮緘藏極淵泉吾能握其機何必窺陳編學
患不用心用心滋牽纏本虛形乃實立本貴自然戒慎與恐懼斯
言未云偏後儒不省事差失毫釐間寄語了心人素琴本無絃久
之又歎曰夫道非動靜也得之者動亦定靜亦定無將迎無內外
苟欲靜卽非靜矣於是隨動隨靜以施其功有示張詡詩曰知夜
則知朝西風漲暮潮千秋一何短瞬息一何遙有物萬象間不隨
萬象凋舉目如見之何必窮扶搖又曰登高未必高老脚且平步
平步人不疑東西任回顧豈無見在心何必擬諸古異體骨肉親
有生皆我興失之萬里途得之咫尺許得失在斯須誰能別來去
明日立秋來人方思處暑又曰兩脚著地此何關白雲與爾同去

還正當海闊天高處不離區區跬步間蓋其學初則本乎周子主靜程子靜坐之說以立其基其自得之效則有以合乎見大心泰之說故凡富貴功利得喪死生舉不足以動其心者其後造詣日深則又有以進乎顏氏卓爾雖欲從之未由也已之地位而駸駸乎孔子無意必固我之氣象矣其學有本原進有次第的然可據如此迨其晚年超悟極於高遠則又非他人所能窺測言語所能形容者矣其始懼學者障於言語事爲之末也恒訓之曰去耳目支離之用全虛圓不測之神其後懼學者淪於虛無寂滅之偏也又恒訓之曰不離乎日用而見鳶飛魚躍之妙門人各隨其所見所聞執以爲則天下之人又各隨其所見所聞執以爲稱果足以知先生之道也哉有詩曰十年無鮑叔一懶有柴桑蓋亦嘆天下之莫我知也所恃天下之大千百世之遠其心同其理同豈無知言者起誦其詩讀其書當有以知其人卓卓乎孔氏道脈之正傳而伊洛之學蓋有過無弗及也是故見諸日用雖與百姓同也至

於不言而信不怒而威聞風者興起沈化者心服蓋有莫知其爲之者使得大用於世綏來動和之效庶幾乎先生嘗以道之顯晦在人而不在言語也絕意著述有詩曰他年倘遂投閑計只對青山不著書又曰莫笑老儂無著述真儒不是鄭康成有勸之者對曰伏羲著述數畫耳況畫前又有易乎君子曰先生著述可謂富矣自一言演之可萬言自萬言斂之可無言今其詩文不下萬餘首獨非著述乎莊和讀先生詩集曰喜把炷香焚展讀了無一字出安排爲經爲訓真誰識非謝非陶亦浪猜又曰老誰靜裏都無事笑此山中亦著書帝伯皇王鋪敘裏乾坤今古笑談餘大學士李東陽始得先生藤蓑諸作也語人曰待某謝官絕煙火十年然後可屬和耳蓋皆知言者也其爲文也主理而輔之以氣雖不拘拘於古人之繩尺故自有以大過人者其爲詩也則功專而入神品有古人所不到者矣蓋得李杜之製作而無周召之情思妙不容言故其詩曰子美詩中聖堯夫又別傳後來操翰者三妙少能

兼今蒼梧山東皆梓行其集惜乎未全也至於書翰如其詩能作
古人數家字山居筆或不給至東茅代之晚年專用自成一家時
呼爲茅筆字好事者踵爲之有詩曰神往氣自隨氤氳覺初沐聖
賢一切無此理何由矚調性古所聞熙熙兼穆穆恥獨不恥獨茅
根萬莖秃又曰茅君頗用事人手稱神工又曰茅龍飛出右軍窠
皆指茅筆也天下人得其片紙隻字藏以爲家寶太夫人嘗夢星
斗燭天旁有人指謂曰此爾家秀才文字也與弼壻某貧不能自
振造白沙求書數十幅歸小陂每一幅易白金數星庚申朝廷遣
官使交南交南人購先生字每一幅易絹數匹攜者恨不多也先
生教人隨其資稟高下學力淺深而造就之循循善誘其不悟者
不强也至於浮屠羽士商農僕賤來謁者先生悉傾意接之有叩
無不告故天下被其化者甚眾南畿僧太虛知名當世亦以其學
求正於先生先生復書以逝者如斯夫不舍晝夜告之曰我以此
證也先是先生道南畿見太虛告以念老母太虛爲朝夕禮拜祝

願至先生歸相見乃已其篤信如此烏乎若先生者君子謂周子
之後一人而已者非邪詡也無似自成化辛丑見我先生於白沙
我先生卽以國士待其後受教多而辱愛厚臨歿具書趣至白沙
寄以斯文告門人羅冕曰吾道吾有所託矣示以詩云古往今來
幾聖賢都從心上契心傳孟子聰明還孟子誰今且莫信人言又
曰萬丈祝融何處山三年碧玉夢相關多少畫工傳不去都沒賢
今畫幅寬又曰病久唯聽命詩成不浪傳門前花十丈玉井正開
蓮數椽剛到地一棟正橫天不忘吾道在萬萬歲相連旣而曰孔
子之道至矣幸毋畫蛇添足又曰用斯行舍斯藏子其勉之吾言
止是矣嗚呼言猶在耳不肖詡斗筲之器何脩何爲而後可以少
副我先生付託之重乎先配張氏生子二人曰景雲作小詩得唐
人體裁曰景易充邑庠生先先生卒女二人壻黃彥民指揮倪麟
孫男三人曰田曰畹皆庠生曰豸尙幼繼室羅無出先生歿後門
人聚議以湛雨爲行狀李承箕爲墓銘梁儲爲傳而墓表則屬之

詡也湛之爲行狀也倉卒事多未備詡竊懼久而溷晦無傳重加
補葺僉事許胆嘗刻梓以傳矣嗣是有待於同門者數事復增入
焉雖恒言細行不敢有遺如昔人年譜之爲庶幾他日有與於斯
文者取而刪述之以爲世訓初不暇計其言辭之蕪且陋也謹狀

皇明名臣琬琰后錄二十二

